

## Hechos

*Jesús tojanašebuachená chë Uámana Espíritu jíchmuama*

<sup>1</sup> Teófilo, atšbe natsana librěšaňe tcbonjuábobema lempe ntšamo Jesús tojanmama y tojánabuatambama, chca tojanbojatšé orscana,

<sup>2</sup> y Běngbe Bětsá celoye tbojtanatšbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnama.

<sup>3</sup> Jesús cruciňe tojanóbana y tojtanayenentšana, ba soye chë ichmóněnga yojánebėbuacana, chca, chěnga jinŷanŷiyama cha ndegombre tojtanayenama. Canta bnětsana tentscuana cha yojánebėbuacana y Běngbe Bětsabe aměndayama chěnga yojanabuatambá.

<sup>4</sup> Canŷe, Jesús chabe ichmóněngaftaca yojětsemna ora, měntšá tojanaměndá: –Jerusalenentšana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tcbonjáuyana.

<sup>5</sup> Ndegombre, Juan entšanga bėjayeca tonjanėbaye; pero ndoňe baytesna, Běngbe Bětsá chë Uámana Espíritu bochanjíchmu, tšěngaftangbe ainaniňe jtsemádayama cháuamashěnguama ca.

*Jesús celoye tojtantsjuá*

<sup>6</sup> Canÿe, chë ichmónënga Jesúseftaca cánÿiñe imojtsemna ora, chënga tmojanjá: —¿César y chë Romoquëngbe amëndayentsana tašcochjatsebacá, y mora bënga, Israeloca entšanga, canÿe Rey quemochtsatsbomna ca?

<sup>7</sup> As Jesús tojanëyana: —Tšëngaftanga ndoñe quemátamna chë soyëngama jtsetatšëmbuana. Nÿe atšbe Taitá aiñe; y cha, chabe obenánaca echanjamánda mocna ora y ndayté chca chaopasama.

<sup>8</sup> Chë Uámána Espíritu tšëngaftangbe ainaniñe jtsemándayama chaojabo ora, tšëngaftanga obenana šmochanjóyëngacñe. Chentsana, ntšamo atšbiama šmotatšëmbcá, chë tcbonjabuatambá soyënga, entšanga šmochjáuyana Jerusalenentše, nÿets Judea luariñe, Samarioca y quem luarentša nÿets luarënguenáchnaca ca.

<sup>9</sup> Chë soyënga tojánayanentšana y chabe uatsjëndayënga imojtsonÿaye ora, Bëngbe Bëtsá, Jesúsbioye tbojtanatsbaná y canÿe jantšetëshe chábioye ibojútsbotse y ndoñe más tmonjanobená cha jinÿama.

<sup>10</sup> Jesús celoye yojtsetsjuama chënga bën imojtserreparánëntscuana, nÿe ndeolpe, uta boyabásata uafjantse entšayaca bopormánata chëngbe juachaca tbojabántsaye,

<sup>11</sup> y chëngbioye tmojanëyana: “Galileoca entšanga, ¿ndáyeca celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinÿcá cha celoye jtama, cachcá quem luaroye cha echanjésabo ca.”

*Júdasbe cuenta Matías tmojanábuayana*

12 Jesusbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscoñna bécoñe inamna, ndayéntscoca canÿe ochnayté jama yojanlesenciana nyëtšá.

13 Jerusalenoye tmojtanashjajna orna, chë yebnentša tsbanánoca tsoye tmojtanášëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiñá, Simón chë Celote ca uabobainá, y Judas, chë Santiagbe uaquiñá.

14 Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catšátangaftaca.

15 Chë tempo tmojánenefjna canÿe patse y uta bnëtsana Jesucristbeñe ošbuáchiyënga, y canÿe, Pedro tojantsá y tojanëyana:

16 “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabreñguiñe iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdashiftaca yochjanopásama; chcasna, Judas uayayënga tojanënatse Jesús chamuishachama.

17 Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuiñe jtsoservénama.

18 Tšëngaftanga šmondëtatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtëtšena y chabe uafsbentšana nyëtsca chabe chunchullëjuangá tojtsanáshana.

19 Jerusalenentše oyenënga chë soyama tmojántatsëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’.

20 Salmos librëšañe, Jesucristo uayayëngbe cucuatsiñe boshjuanabiama mëntsá enduábemana:

Chabe yebna éñañe chaotsemna

y ndocná chentše chaondëtsiyena ca.

Y mëntsánaca endayana:

Chabe cuenta inya chabe trabajo chaoma ca.

21 “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana,

22 Juan Jesúsbioye tbonjanabaye orscana y Bëngbe Bëtsá Jesúsbioye bëngbentsana celoye tbontanatsbanantscuana. Y mora šontsamna canya mënguentšá juabuáyanama, Jesús tojtanayenama entšángbioye bëngaftaca jábuayenama ca.”

23 As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías.

24 Chora Bëngbe Bëtsáftaca mëntsá tmojanencuentá: “Bëngbe Utabná, aca nÿetscangbe ainana icuabuatma; chcasna, šminÿanyé nda quem útatentsana cochjuábuayanana,

25 canye ichmonacá Júdasbe cuenta chaotrabajama. Judas ya ndoñe canye ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

26 Y nda chë ichmoná yochtsemnama jtso-tatšëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiamá imojanjuabná mo canyë Jesusbe ustonacá, cachcá ntšamo chë bnëtsana canyë uatsjëndayëngbiama chënga imojanjuabnacá.

## 2

*Chë Uámana Espíritu ošbuachiyëngbeñe tojánamashëngo*

<sup>1</sup> Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cányiñe canyë luarentše imojtsemna.

<sup>2</sup> Ndeolpe, celocana mo canyë jabuache binyiëcá yojtsaishauenana y chca, tša jabuache shaue-nanana tojanóshjango nyets yebnentše, chënga imojtsetbiámanentše.

<sup>3</sup> Y chora bichtajënga mo iñeshcá yojónyña y canyánýabeñe yojójtaye.

<sup>4</sup> Chca chë Uámana Espíritu tojánamashëngo chëngbe ainaniñe jtsemándayama; chora nyetscanga tmojanontšé inyetsá biyangana, chënga tempo ndmabiyañe, ntšamo chë Uámana Espíritu yojtsamcá chënga inyetsá chamotsebiyama.

<sup>5</sup> Chë tempo Jerusalenentše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama.

<sup>6</sup> Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë

inÿe luarocana áshjajnënga imojtsuenana chë Jesucristbeñe ošbuáchiyënga inÿetsá biyangana jtsóyebuambnayana, ntšamo cada ona chënga imojanbiyacá.

<sup>7</sup> Chë soyëngama entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna.

<sup>8</sup> Chcase, ¿ntšámoyeca bënga imojtsobena chënga joyaunayana cach bënga mondëbiyacá ca?

<sup>9</sup> Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca,

<sup>10</sup> Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna;

<sup>11</sup> chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

<sup>12</sup> Chë causa nÿetscanga imojtsenjanaye y ntšamo jtsejuabnayama ntsetatsëmbcá imojtsemna y imojtsentjanaye: “¿Ndayá chë soye yojtsayana ca?”

<sup>13</sup> Pero ínÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

*Ntšamo Pedro chora tojanoyebuambá*

14 Chentšana, Pedro tojantsá chë inÿe bnëtsana canÿe ichmónëngaftaca y jabuache tojanontsé chë entsanga jáuyanana, mëntsá: “Atšbe entsanga judiënga y nÿetscanga Jerusalenentše oÿenënga, tšabá šmochjouena. Ntšamo tojopasama cbochanjábuayenaye, as chacmësertama.

15 Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe.

16 Pero ntšamo entsopasánamna, Bëngbe Bëtsabe juabna oyebuambnayá Joel mëntsá tojanábema:

17 Bëngbe Bëtsá mëntsá tojánayana: ‘Quem lu-are jopochócama te chaojtsobeco ora, chë soyënga echanjochnëngo.

Atše chanjama, atšbe Espíritu nÿetscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entsanga mochantsëtsësnaye;

tšëngaftangbe bobontsëngna, atše chanjama soyënga mochantsonÿaye mo otjenay-oquëcá;

y tšëngaftangbe bëtsëjëmëngna atšbe soyënga mochantsotjénaye.

18 Chca ora, atše chanjama nÿetsca atšbe oservénëngbiama, boyabásenga y shembásenga, chëngbe ainaniñe atšbe Espíritu cháumashënguama, as chënga atšbe soyëngama entsanga mochantsëtsësnaye.

19 Atše chanjama bëts soyënga celoca;

y quem luariñe echántsemna buiñe, ñeshe y  
ngona mo jantsetëshcá, atšbe obenana  
jinÿanÿiyama.

<sup>20</sup> Cabá chë puerte uámana te, chë Bëngbe Utabná  
bëts soyënga jamama ndobuache ora,  
shinÿe ndoñe queochátsbuashinÿinÿana  
y juashcona buánganëtema mo buiñcá  
echántsemna.

<sup>21</sup> Y as, ndánaca Bëngbe Utabná tbojtsotšëmbuaná,  
cha bochanjatsbocá.’

Chca Joel tempo tojanábema ca” —Pedro  
tojánayana.

<sup>22</sup> Chora Pedro tojatanëyana: “Israeloquënga,  
šmochjouena ntšamo cbochanjauyancá: Bëngbe  
Bëtsá ndegombre tcmónjaninÿanÿé, Jesúsbioye  
chabe trabajo biamnayá cha tbojánbemama. Chë  
soye Bëngbe Bëtsá tcmónjaninÿanÿé, Jesús chë  
Nazaretocáftaca cha tojanma bëts soyëngaca  
y ójnanana soyëngaca, Bëngbe Bëtsabe obenana  
jinÿanÿiyama. Cach tšëngaftanga chë soyëngama  
šmondétatšëmbo, Bëngbe Bëtsabe obenánaca chë  
soyënga tšëngaftangbeñe Jesús tonjánmayeca.

<sup>23</sup> Ndegombre tšëngaftangbe cucuatšinë Jesús  
tmonjáboshjona, pero cabá ndëboshjona ora,  
Bëngbe Bëtsá tojanjuabó ntšamo jopásana  
yoyamnama; y ntšamo tšëngaftanga cháftaca  
šmochjanmámnaca cha inatátšëmbo. Tšëngaftangna  
Jesús šmonjanishache y šmonjanma cha  
chamóbama y chamocrucificama, bacna  
entsangbe cucuatšinë.

<sup>24</sup> Pero Bëngbe Bëtsá tojama cha cháuatayenama; y  
chë obanëngbe luarentšana tbojatsbocá, er ndoñe



yonjopodena cha obaná chaoquedama ca” –cha tojánayana.

<sup>25</sup> Chora Pedro tojatanéyana: “Rey David tempo Jesusbiamá mēntsá tojěftsanabema, ntšamo cha Bēngbe Bētsábioye tbojaniyanama:

Atšbe Utabná, aca sempre átšeftaca condbétsemna, y siempre átšeftaca condboquedá atše juajabuáchama, chíyeca ndocná queochatobenaye atše jauátjanama.

<sup>26</sup> Chíyeca atše corente oyejuayá sěntsemna, y atšbe uayášaca cbontsatschuaná.

Atše masque chanjóbana, tšabá sěndětatsěmbo aca atšbe Bētsá, atše chaitayenama cochjamama.

<sup>27</sup> Aca, Bēngbe Bētsá, obanēngbe luarentše ndoñe quešchóhatsboshjona, y ndoñe quecochatsleséncia acbe uámana oservenabe cuerpo chaotsopochocama.

<sup>28</sup> Aca chē tšabe benache šconjaninŷinŷé, ntšamo tšabe vida jtsebomnama.

Aca átšeftaca condbétsemnama, atše puerte oyejuayá sěntsemna ca –David tojěftsanabema ca.”

<sup>29</sup> Chentšana Pedro tojatanéyana: “Baconga y batanga, šontsemna ndegombre tšēngaftanga jábuayenana tšabá chacmésertama. Bēngbe temp-sca bēts taitá David tojanóbana y tmojanatbontsá, y bēnga montsemna cha tmojanatbontsá luare béconana.

<sup>30</sup> Cach David canŷe Bēngbe Bētsabe juabna oyebuambnayá inamna. Cha tšabá inatátšēmbo Bēngbe Bētsá bētská tbojanšbuáchenama, Davidbe

entšanguentšana canya, Cristo, cach Davidcá rey jabemama.

<sup>31</sup> David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojëftsanabema, obanëngbe luarentše Cristo ndoñe ntjëftsebošjonana y Bëngbe Bëtsá ndoñe ntjalesénciana chabe cuerpo chaotsopochocama ca.

<sup>32</sup> Bëngbe Bëtsá tojama Jesús cháuatayenama y bënga cha fsënjinye. Chíyeca bënga fsëntsetatšëmbo chca ndegombre bëtsemnama.

<sup>33</sup> Bëngbe Bëtsá, Jesús celoye tbontanatsbaná chabe catšbioica jtsatsmënama jtsemándayama, y Bëngbe Bëtsá chë Uámana Espíritu Jesúsbioye tbojanëntšabuaché ntšamo chë Taitá tbojanšbuachenacá. Ntšamo tšëngaftanga šmontsonyá y šmontsuenancá entsemna, Jesucrísoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca.

<sup>34</sup> David ndoñe Jesuscá celoye tonjána, pero mëntšá tojëftsanábema:

Bëngbe Bëtsá atšbe Utabná Crístbioye tbonjaniyana:

‘Atšbe catšbioica cochtsetbemana,

<sup>35</sup> acbe uayayënga acbe cucuatšinë chamo-  
quedama atšbe obenánaca chjamëntscuana  
ca.’ ”

<sup>36</sup> Chora Pedro tojatanëyana: “Tšëngaftanga nÿets Israeloquënga šmochtsetátšëmbo, atše ndegombre cach Jesusbiamá sëntsóyebuambnama. Cha tšëngaftanga šmonjancrucificá, pero Bëngbe

Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

37 Chë soyënga tmojanuena ora, entšanga cochtsetšenánënga imojtsemna, y Pedro y chë inÿe ichmónëngbioye tmojanëyana: —Baconga, ¿ndayá mora jamama šojtsamna ca?

38 As Pedro tojanëjua: —Ngménaca šmochtenójuaboye bacna soyënga šmojtšamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháuamashënguama.

39 Bëngbe Bëtsá chë soyënga tcmonjanašebuachená tšëngaftangbiama, tšëngaftangbe básengbiama y nÿets chë bën luarënguenache imomna entšangbiama, nÿetscanga chë Bëngbe Utabná Bëngbe Bëtsá chábioye jabama chaojubuáyänënga ca.

40 Inÿe palabrëngnaca Pedro tojatanëyana y bëtscá tojanabuayená mëntšá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentšana šmochtsojuánañe ca!”

41 Ba entšanga imojtsanošbuaché ntšamo Pedro tojanëyanama y tmojánenabaye. Cach te mo unga uaranga entšanga nÿetsá tmojanoboté, Jesucristbeñe ošbuáchiyënga jtsemnama.

<sup>42</sup> Chënga corente imojtseboše jtsamama chë Jesusbe ichmónënga imojtsabatambá soyënga. Tšabá yojtšacohebiona nÿetscanga cánÿiñe jtsemnama y imojanamana mo chë Jesucristbeñe ošbuachiyëngcá cánÿiñe jtseyayana y cánÿiñe Bëngbe Bëtsáftaca jtsencuéntayana.

*Ntšamo chë natsana Crístbeñe ošbuáchiyënga vida imnabomna*

<sup>43</sup> Nÿetscanga imojtsenjnanaye, chë ichmónënga bëts soyënga y inÿe soyënga chabe obenana jinÿanÿiyama chamomama Bëngbe Bëtsá tojánmayeca.

<sup>44</sup> Nÿetsca chë Jesucristbeñe ošbuáchiyënga sempre cánÿiñe mo canÿacá imojtsemna y nÿetsca chëngbe bomna soyënga nÿetscangbiamama yojtsemna.

<sup>45</sup> Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë ínÿyenga tojtsëjabotcá.

<sup>46</sup> Cada te imojanamana Bëngbe Bëtsabe bëts yebnentše jénefnana cha jëtschuayama, y yebnënguenache cánÿiñe imojtsesaye oyejuayënga y ndoñe ojëndayënga.

<sup>47</sup> Chënga imojanamana Bëngbe Bëtsá jtsatschuanayana, y nÿetsca entšanga imojtsejuabnaye chë Jesucristbeñe ošbuáchiyëngbiamama tšabe entšanga imojamna ca. Y cada te Bëngbe Bëtsá yojtšama más ošbuáchiyënga chamóbotema, chë ndëmuanÿyenga cha yojtsatsebacayënga.

### 3

*Pedro canÿe coshétbioye tbojanshná*

1 Canye te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtsencuéntayana.

2 Bëngbe Bëtsabe bëts yebnentše canye cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canye luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojt-sachnějuanënga lemošna chaótejañama.

3 Pedro y Juan Bëngbe Bëtsabe bëts yebnoye jamashënguama chë cosheto tojánanye ora, canye lemošna chátbioye yojótejañe.

4 Chatna chë šocá imojtsonýaye, y Pedro tbojaniyana: “Scochtsënýaye ca.”

5 As cha yojtsënýaye y yojtsejuabnaye ndayá chjójyëngacñe ca.

6 Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

7 Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšiñe y shëmiabeñe añemo yojtsatsbomna.

8 As chë cosheto, canye jontsënjëse tšabá tojtantsá y tojanontsé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojtsayontsëjnaye y Bëngbe Bëtsá ibojtsatschuanaye, tbojanshnama.

9 Chë Bëngbe Bëtsabe bëts yebnentše imojétsemnënga nÿetscanga cha tmojáninÿe tšabá jtsanana y Bëngbe Bëtsá jtsatschuanayana.

10 Chënga imnatátšëmbo cha chë cosheto yojamnana, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entšanga lemošna jotejañama. Cha tšabá yojsatsmënamna entšanga ojnánánënga imojtsemna.

*Ntšamo Pedro tojanoyebuambá Salomonbe Amashjuana ca uabáinentše*

11 Chë cosheto ya shnaná ora, ndoñe yontseboše Juan y Pédrëbentšana joluárana. As, nÿetsca entšanga ojnánánënga tmojanótjajo chë amashjuana otsbojebniñe, Salomonbe Amashjuana ca uabáinoÿe, chë Juan, Pedro y chë cosheto shnaná imojétsemnoÿe.

12 Pedro chë entšanga tojánanÿe ora, tojanéyana: “Taitanga y mamanga, Israeloquënga, ¿ndáyeca chë soyëngama ojnánánënga šmojtsemna? ¿Ndayeca nÿe šcojtsëbuútja? ¿Šmojtsejuabná nÿe bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca?”

13 Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinÿanÿé chabe oservená Jesús chë más uamaná yomnama. Cha tšëngaftanga chë mándayëngbe cucuatšinë šmonjánboshjona chamóbama. Pilato enjétseboše Jesús jëtsboshjonama, pero tšëngaftanga Pilatbe

delante šmonjánayana chca ndoñe šmontsanboše ca, y chíyeca Pilato ndoñe tbontanboshjona.

14 Jesús uamaná y nyetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boy-abása, entsá obanayá, chabuatsboshjonama.

15 Y chca, chë ndegombre tšabe vida chašmotsebomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninye y chama fsëndétatšëmbo.

16 Jesús puerte obená endmënayeca, quem cosheto añémoca entsatsmëna. Ntšamo šmonjinye y šmonjatatšëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

17 “Taitanga y mamanga, atše sëndétatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbcá.

18 Tempo, Bëngbe Bëtsá chë chabe juabna oyebuambnayënga tojanamëndá entsanga jábuayenama, chë Bëngbe Bëtsabe Uámana Uabuayaná puerte ngmënana yochtsanbomnama. Morna, ntšamo Bëngbe Bëtsá tojanayancá ya tonjochnëgo.

19 Chcasna, ngmënaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe

oyejuayana chašmotsóbmñama,

<sup>20</sup> y tšëngaftangbioye bochanjíchmua Jesús, chë tempo chabe Uámana Uabuayaná Bëngbe Bëtsá tbojanbemá.

<sup>21</sup> Canÿe te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá.

<sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canÿe chabe juabna oyebuambnayá ntšamo atše sëndmëncá, cmochanjayentšíchmua. Cha tšëngaftangbentsana echanjábocna y tšëngaftanga cmontsamna ntšamo chacmojtsëtsëtnacá cha jtseyeunanana.

<sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentsana luaroa jtsemnama y chamotsepochochama ca’ —cha tojánayana.

<sup>24</sup> “Y nÿetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonÿacá.

<sup>25</sup> Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canÿe trato tojábema; chë soyënga cabá tšëngaftangbiama entsemna. Bëngbe Bëtsá Abrahámioye mëntsá tbojaniyana: ‘Chë ácbentsana entšángbeyeca tšabe bendicionënga chanjama nÿetsca quem luarentša entšangbiama



ca.’

<sup>26</sup> Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnana ca” —Pedro tojánayana.

## 4

### *Pedro y Juan Jerusalenentša mandadëngbe delante*

<sup>1</sup> Pedro y Juan cabá entšanga imojtsëtsësnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga.

<sup>2</sup> Chatna entšángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtna.

<sup>3</sup> As, Pedro y Juan tmojánishëche y ya jëtiñe yojtsemna causa, cárceloye tojanëtame yëfsanëntscuana.

<sup>4</sup> Masque chca, banga entšanguentšana, ntšamo Pedro y Juan tbojanayancá tmojanuenënga, aíñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna.

<sup>6</sup> Chéntšnaca imojtsemna, chë bachnangbe más uámana amëndayá Anás ca uabainá, Caifás,

Juan, Alejandro y chë bachnangbe más uámana amëndayëngbe nyëtsca pamíllangnaca.

<sup>7</sup> Chora chënga tmojanmandá Pedro y Juan junatsama, y chëngbe tsëntsaca tojanatsá y mëntsá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

<sup>8</sup> As Pedro, chë Uámana Espíritu chabe ainaniñe corente jtsemándayëse, mëntsá tojanéjua: — Israeloca mándayënga y bëtsëjëmënga,

<sup>9</sup> mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.

<sup>10</sup> Chcasna, ntšamo tojopasama cbochanjabuayená, chca, tšëngaftanga y nyëtsca Israeloca entšanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiama Bëngbe Bëtsá tojanma cháuatayenama.

<sup>11</sup> Jesusbiana Bëngbe Bëtsabe uabemana palabrënguiñe mëntsá endayana: “Chë yebna jebuanënga tmontsanaboté ndëtsbé, mora chë más bëts uashacuanëšentše entsejájona ca”. Tšëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna.

<sup>12</sup> Nyë cha yobena tšëngaftanga játsebacama. Bëngbe Bëtsá ndocna inyë entšábioye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nyë Jesucristbe obenánaca aíñe ca

—Pedro tojánayana.

<sup>13</sup> Chënga imojenjnaná Pedro y Juan tša añémoca ibojtsóyebuambnama tmojáninye ora, y chata tempo nduatsjínýenata y librëša nduabuatmata bétsemnama tmojántatsëmbona ora. Chca chë mándayënga tmojántatsëmbona chata Jesúseftaca bayté ibojamnama.

<sup>14</sup> Y entšanga imojtsonýaye chë tmojanshná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámuana.

<sup>15</sup> As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye.

<sup>16</sup> Chënga imojtsentjanaye: “¿Ndayá chátaftaca mochjama ca? Jerusalenentše oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.

<sup>17</sup> Pero entšanga chama ndoñe más chamondëtsencuéntamna, chata mochjáuyana: ‘Ndoñe más entšángbeñe Jesús šmattsebáyana; y ndoñe chašmonjouenëse, jabuache castigo šochántse bomna ca.’ ”

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiamana entšángbeñe jtsabuátambayana.

<sup>19</sup> Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominýiñe ndoñe

tšabá quenátsmëna tšëngaftangbioye aïñe joyau-nayana y chábioye ndoñe.

20 Er bënga queftsátobena jtsajbanana oyebuambnayana chë tifjinÿe y tifjouena soyëngama ca.”

21 Chë mandayëngna chátbioye tojtsanautatjá, pero chentšana tmojtanabáshejuana. Nÿetsca entšanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinÿenana ntšamo chata jácastigama.

22 Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

*Jesucristbeñe ošbuáchiyënga Bëngbe Bëtsá tmojan-impadá más añemo chauatšatama*

23 Pedro y Juan ya tmojtanabáshejuana ora, tbojánata chë inÿe ošbuáchiyëngaftaca jateninÿenama y lempe ntšamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá.

24 Chënga chca tmojanuenentšana, nÿetscanga cánÿiñe tmojanontšé Bëngbe Bëtsáftaca mëntšá jencuéntama: “Bëngbe Utabná, aca chë nda tojama celoca, fshantse, nÿetsca béjayënga y lempe ntšamo chenache yomncá,

25 chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entšanga yapa imojtsetsátjaye ca?

¿Ndáyeca imojtsejuabná nýe bonamentiama soyënga jamana?

<sup>26</sup> Quem luarentša reyënga y amëndayënga imoprontánënga,

nýetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama.

<sup>28</sup> Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama.

<sup>29</sup> Morna Bëngbe Bëtsá, mouena ntšamo chënga montsichamo, bënga jasúfriama cašojsamna ca; chcasna, cochjama bënga fchayobená Jesusbe tšabe noticiënga bëts añémoca entsángbeñe jtsóyebuambnayama,

<sup>30</sup> y cochjama acbe obenánaca šoquënga tšabá chamotsatsmënama y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

<sup>31</sup> Bëngbe Bëtsáftaca jencuéntama tmojanpochocá orna, chë tmojánenefjnentše tojanangmëmana; y nýetscangbe ainaniñe chë Uámana Espíritu tojanontsé más jtsemándayana, y chënga

tmojanontsé más añémoca Bëngbe Bëtsabe soyëngama entšanga jábuayenama.

*Nyetsca bomna soyënga nyetscangbiamama yojtsemna*

<sup>32</sup> Jesucristbeñe ošbuáchiyënga, nyetscanga canye juabna imojtsebomna y ainaniñe cach canye ebionana. Ndocná ntjatichamuana chabe soyënga nye chabiamama yojtsemna ca, pero aña imojtsichamo, “atše séndbomna soyënga nyetscangbiamama entsemna ca”.

<sup>33</sup> Chë Jesusbe ichmónëngna puerta obenánaca mëntšá imojtsichamo: “Fsëñjinye y fsëntsetatšëmbo Bëngbe Utabná Jesús obanënguentsana tojtayenama ca.” Y Bëngbe Bëtsá yojtsama chë ichmónënga bëtsca tšabe bendicionënga chamotsebomnana.

<sup>34</sup> Jesucristbeñe ošbuachiyëngbeñe ndocná yonjamna ndayánaca uajabotá, er nyetscanga fshantse o yebna bomnënga imojanamana jtsatobuíyana, y chë crocénana

<sup>35</sup> chë ichmónëngbioye jayentšbuáchiyana, ntšamo tojtsëjabotcá nyetscanga jujátayama.

<sup>36</sup> Chca tojanma canya Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá.

<sup>37</sup> Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiamama chaoservema.

## 5

*Ntšamo Ananías y Safirafaca tojanopasá*

<sup>1</sup> Inamna canýe bacó, Ananías ca uabainá, y chabe shemna, Safira ca. Chatna canýe fshantse tbojániye.

<sup>2</sup> Ananías y Safirna tbojanenóyeunata; chcasna, batśá crocénana cachatbiama tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nýets crocénana ntsachetśá chë fshantsama tbojanosháchiñe ca.

<sup>3</sup> As Pedro tbojanianyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocenánama jabuambayama ca? Acna chë fshantsama tcmojtabuená crocenánentsana cach acbiana batśá tcontábojama.

<sup>4</sup> Cabá ntsatobuiye ora, chë fshantse ácbeshe endánmëna y tcojtsatobuíyentsana chë crocénana acbiana y chánaca condánobena ntšamo tcojtseboścá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nýe entśángbioye quecatabuambná, sinó Bëngbe Bëtsánaca ca” —Pedro tbojanianyana.

<sup>5</sup> Ananías chë palabrënga tojanuena ora, obaná tojánshajaye. Y nýetscanga chama tmojántatśëmbonënga corente imojtsauatja.

<sup>6</sup> Chentśana, básefta bobontsënga tmojánashajjna y Ananíasbe cuerpo entśëjuaca tmojanandmaná y jauátbontsama tmojanamba.

<sup>7</sup> Mo unga horèntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama.

<sup>8</sup> Chora Pedro tbojantjá: —Ndegombre šmëyana, ¿chë šmonjayana nÿetsnama chë fshantse šmojiye ca?

As chë shema tbojanjuá: —Aíñe, nÿetsnama fsënjiye ca.

<sup>9</sup> Pedro tbojaniana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebonnama ndoñe šontsobatmana ca? Acbe boyá jauátbontsama tmonjuambënga muentse bësoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentse obaná tojánshajaye. Chë bobontsënga tmojtanamáshjna ora, obaná Safira tmojáninÿena; asna, chentšana tmojanamba y cachabe boyabe juachaca tmojanatbontsá.

<sup>11</sup> Y nÿetsca Jesucristbeñe ošbuáchiyënga chentše imojtsemnënga y nÿetscanga chë soye tmojántatšëmbonënga, corente imojtsauatja.

*Ba bëts soyënga chë ichmónënga tmojanma, Bëngbe Bëtsabe obenana jinÿanÿiyama*

<sup>12</sup> Chë Jesucristbe ichmónëngaftaca ba bëts soyënga entšángbeñe yojtsebinÿna Bëngbe Bëtsabe obenana jinÿanÿiyama; y nÿetsca Jesucristbeñe ošbuáchiyënga imojanamana Bëngbe Bëtsabe bëts yebnocá jénefnana, Salomonbe Amashjuana otsbojebnentše.

<sup>13</sup> Chë ínÿenga, chë Jesucristbeñe ndošbuáchiyëngna, imojtsauatja Jesucristbeñe



ošbuáchiyëngaftaca jtsenutana; pero entšangna chë ošbuáchiyëngbiana tšabá imojtsencuëntaye.

14 Bëngbe Utabnábeñe ošbuáchiyënga más imojtsóbotena, bëtscá boyabásenga y shembásengnaca.

15 Tša bëts soyënga chë ichmónëngaftaca yojtsebinÿna; chíyeca entšanga imojanamana jutšnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachnëjuana ora, nÿe mo chabe sómbrënaca chëngbe cuerpëjana chaochnënguama, shnánënga jtsatsmënama.

16 Jerusalén chábuañe pueblënguentsana ba entšanga imojanamana jabana, y šoquënga y bacna bayëjbe juabna uambayënga imojtsëyabó; y nÿetscanga shnánënga imojtsatsmëna.

*Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama*

17 Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna.

18 As chë ichmónëngbioye tmojánishëche y chë bëts pueblentša cárceloye tojtsanëtame.

19 Pero ibetna, Bëngbe Utabná canÿe ángel tbojanichmó y chë utámenentša bëšašangá cha tojánatëfjo, chënga tojtanëbuacna y mëntšá tojanëyana:

20 “Motsajna, Bëngbe Bëtsabe bëts yebnentše šmochjámashjna, y entšanga šmochjabuayená ntšamo cuanjama chë nÿetsca tescama yomna tšabe vida jtsebomnama, Jesucrísoftaca cánÿiñe mo canÿacá jtsemnëse ca.”

21 Ntšamo tmojanuencá, yěfsana cabá cachěse Běngbe Bětsabe běts yebnoye tmojána y tmojanontšé entšanga jabuátambana.

Chěntscuana, chě bachnangbe más uámana aměndayá y chabe ústoněnga, chě Israeloca bětsějeměngcá mándayěnga y inye chentša aměndayěnga tmojánachembo jénefnama y jenóyeunayama; as chora chěnga tmojanmandá chě utámenocana chě ichmóněnga jobiatšama.

22 Pero chě soldaděnga chě utámenoye tmojánashjajna ora, chěnga chentše ndoñe tmonjánanyena. Chcasna, chěnga tmojtaná chě mándayěnga chca jaúnayama.

23 Y tmojánayana: “Chě utámenoca fsěnjínýena lempe tšabá endětsětámeñe y soldaděngna nyetsca běšašangá monduabojanyanga; pero fsěnjatěfjo y tsoye fsěnjámashjna orna ndocná chibiátinýena ca.”

24 Chě bachnangbe aměndayěnga y chě Běngbe Bětsabe běts yebnentša soldaděngbe aměndayá chca tmojanuena ora, yojsětěmnana y imojtsentjanaye ndayá chentšana yochjanopásama.

25 Chorna, chěnga imojtsemnentše canye boyabása tojánashjango y měntšá tojaněyana: “Chě šmojutámiěnga mora Běngbe Bětsabe běts yebnocá montsemna, entšanga montsabuatambá ca.”

26 Chě soldaděngbe aměndayá tojána soldaděngaca, chě Jesusbe ichmóněnga junatsama; pero nye tšabá tmojaněnatse, er chěnga entšangbiama imojtsauatja, nderado cachěngbioye ndětšběngaca muantsėbaye.

27 Chěngbioca tmojaněshejajna ora, mandayěngbioye tmojaněnatse; chora chě

bachnangbe más uámana amëndayá mëntśá tojaněyana:

<sup>28</sup> —Běnga jabuachana tcbontsěuyaná y tcbonjáuyana ndoñe šmontselesenciana jtsóyebuambnayama chě boyabása Jesús tojánayana yojtsemna jabuátambama soyěngama ca. Masque chcasna, mora tšěngaftanga nyětsca chě Jerusalenentśa oyeněnga chabe soyěngama šmojtسابuatambá y šmojtseboše, cha tojanóbanama castigo běngbeñe chaotsemnama ca.

<sup>29</sup> Chorna, Pedro y chě inye ichmóněnga tmojánayana: —Běnga šontsamna natsana Běngbe Bětsá joyeunayana y chentśana entśangbioye.

<sup>30</sup> Chě Taitá, nda běngbe běts taitanga monjánadorana, cha tojama Jesús cháuatayenama, chě nda tšěngaftanga šmonjanóba canye cruciñe juajabonjěse.

<sup>31</sup> Běngbe Bětsá tbontatsbaná y chabe catšbioica tbojětstbema, jtsaměndayama, y tbojábema entśangbe Unachayá y Atsebacayá, chca, Israeloca entśanga ngmėnaca chamuenójuaboma bacna soyěnga imojtsamama y chca amana chamotsajbanama, y chěngbe bacna soyěngama perdonáněnga chamotsemnama.

<sup>32</sup> Běnga fsěntsichamo ndayá běnga ndegombre tifjinye Běngbe Bětsá chca jtsamana ca; chě Uámana Espíritnaca chě soyěngama endbétsoyebuambnaye. Běngbe Bětsá endbėtsama chě Uámana Espíritu cháuamashěngo chě tmojtseyeunaněngbe ainaniñe jtsemándayama ca —chěnga tmojánayana.

<sup>33</sup> Chě mándayěnga chca tmojanuena ora, puerta tmojanotjayaná y tmojánbošena chě ichmóněnga

jtsëbáyama.

<sup>34</sup> Pero chë mándayënguentsë yojtsemna canyë fariseo, Gamaliel ca uabainá. Chana canyë ley abuatambayá inamna y entšanga puerte imnar-respetana. As cha tojantsá y tojanmandá chë ichmónënga ratotema chentsana jubuacnama.

<sup>35</sup> Chentsana chë inyë mándayënga tojanëyana: “Israeloca taitanga, puerte cuedado šmochtsebomna ntšamo quem boyabásengaftaca šmochjamama.

<sup>36</sup> Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canyë uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tontsanopochocá.

<sup>37</sup> Chentsana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nÿetsca chabe ústonënga tmontsanáshana.

<sup>38</sup> Chíyeca atše cbëyana, quem boyabásenga matabáshejuana y ndocá mataborlánana. Ntšamo chënga montsamancá, nÿe entšangbe juabna y nÿe chëngbe trabajo tojtsemnëse, betscó echanjopochóca.

<sup>39</sup> Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyënjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiama ca” –cha tojanëyana.

Y as chënga Gamaliel tmojanoyeuná.

40 Chcasna, chë ichmónëngbioye tmojánachembo, tmojtsanachebuánganja y tmojanëyana Jesusbe uabáinaca entšángbeñe ndoñe chamondëtsoyebuambná ca; y chentšana tmojtanabáshejuana.

41 Chora chë ichmónënga chë amëndayëngbentsana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservënga bëtsemnayeca.

42 Chentšana, chënga cada te imojanabu-atambá y Jesús, chë Uámana Uabuayaná, chë Cristo bëtsemnama entšángbioye imojanabuayiyná, Bëngbe Bëtsabe bëts yebnentše y yebnënguenáchnaca.

## 6

*Chë ichmónëngbiana ujabuáchanënga tmojanëbuáyana*

1 Chë tempo, Jesucristbeñe ošbuáchiyënga betsko imojtsóbotena. Chora chë Jesucristbeñe ošbuachiyëngbentše, chë judiënga griego biyanga batšá imojtsetsátjaye y chë judiënga hebreo biyangbiana mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

2 Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga

jtsajbanana Bëngbe Bëtsabe palabra oyebuamb-nayana nÿe chë viudanga jtsanÿenama chë to-jtsëjaboto soyënguiñe.

<sup>3</sup> Chcasna, baconga y batanga, tšëngaftanguentšana canÿsëftanga mëbuáyana, tšabá mandbomnëngcá šmëbuátmënga, chamotsemna osertánënga y chë Uámana Espíritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye.

<sup>4</sup> Y bëngna šontsamna nÿets tempo Bëngbe Bëtsáftaca jtsencuéntayana y Bëngbe Bëtsabe palabra entšanga jtsabuayiynayana ca” —chënga tmojánayana.

<sup>5</sup> Nÿetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerta ošbuachiyá cha inamna y chë Uámana Espíritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entšá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá).

<sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšašentše jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más

ošbuáchiyënga betsko imojtsóbotena. Y ba judiëngbe bachnángnaca tmojanontsé Jesucristbeñe jtsošbuáchiyana, ntšamo chë ínÿenga imojtsanošbuachecá.

### *Esteban tmojánishache*

<sup>8</sup> Esteban, Bëngbe Bëtsabe obenana y chábentšana tšabe bendicionënga yojtsebomnëse, entšángbeñe bëts soyënga yojtsama.

<sup>9</sup> Báseftanga “Ya Cachcá Atabashejuana Oservénënga ca” uabainëngna tmojanontsé Estébanoftaca enatsëtsnayana. Chënga imojamna judiënga Cirenoquënga, Alejandrioquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”.

<sup>10</sup> Pero chë Uámana Espíritu tojanma Esteban chaóyebuambama bëts cá osertanacá, y chíyeca chënga ndoñe imontsobena ntšamo cha jojuana.

<sup>11</sup> As chënga báseftanga tmojanëbuénaye Estébanbe contra podesca soye chamuayanama, mëntšá: “Cha fsënjoyeuná Moisesbiana y Bëngbe Bëtsabiana ndoñe tšabá jtsóyebuambnayana, mo cuafjoyanguangcá ca.”

<sup>12</sup> Chcase chënga tmojanma entšanga, bëtsëjemëngcá mándayënga y ley abuátambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojuíchëmo.

<sup>13</sup> Y tmojanënatse básefta entšanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana:

“Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama.

<sup>14</sup> Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochóca y caochjama bënga nÿe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëftsanabuatambacá ca.”

<sup>15</sup> Chë mándayënga y nÿetscanga chentše imojétsetbiamanënga Esteban tmojanonÿinÿé ora, tmojáninÿe chabe jubiá yojtsebuashinÿinÿana mo canÿe ángelbe jubiaca.

## 7

### *Ntšamo Esteban tojanenëuyaná*

<sup>1</sup> Chora chë bachnangbe más uámana amëndayá, Estébanbioye tbojantjá: —¿Ntšamo acbiamá montsichamcá ndegombre yojtsemna ca?

<sup>2</sup> As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endméná, Abrahámbioye tbojánebëbocna, cha Mesopotamioca yojaniyena ora; tbojánebëbocna, Harán bëts pueblocá joyéнанama cabá nda ora,

<sup>3</sup> y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinÿinÿiye luaroye cochjá ca.”

<sup>4</sup> As Abraham chabe luare Caldea tojëftsanboshjona y tojána Haránoca joyéнанama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmotsiyenentše.

<sup>5</sup> Pero quem luariñe ni mo base fshantse ndoñe tbonjëftsanatšetá, ni mo ndayentše jtsiyenama.



Pero aĩne Abrahám bioye tbojanšbuachená chë fshantse jatsetayama, chabiamá y chabe básengbiama, Abraham tojóbanentsana. Chca tbojanšbuachená ora, Abraham ni canýe šešona bonjánbomna.

<sup>6</sup> Y Bëngbe Bëtsá mëntšá tbojanianyana: “Chë ácbentšana entsanga, ínýengbe luaroca áshjajnënga mochántsemna, y choca oyenënga chëngbe oservénënga chëngbioye mochanjábiama y canta patse uatëntscuana jabuache mochanjasufrina ca.”

<sup>7</sup> Y mëntšánaca tbojanianyana: “Pero atše chanjácastigaye chca oservénënga chacmojábiama luarentša entsanga; y as, chentšana chë ácbentšana entsanga mochanjésebocana y mora bontsemna luaroye mochanjésabo y muentše atše šmochántsadorana ca.”

<sup>8</sup> Bëngbe Bëtsá Abrahám bioye tbojanšbuachená nýe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinýnamna tbojanmandá chabe šešona, boyabásetema tojonýná ora, base bobachtema chë más delicadentše jatëtsana. Chíyeca, chabe uaquiñá Isaac tojanonýná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëts pamíllangbe taitanga.

<sup>9</sup> “Quem uaquiñënga bëngbe bëts taitanga monjamna. Chëngna, chëngbe uabentsá Josébioye envidia innabomna y tmojtsatanobuiye,

Egiptoeye canÿe oservenacá chamotsánatseñama. Pero Bëngbe Bëtsá Josébioye nÿets tempo ibnauájabuachana,

<sup>10</sup> chíyeca nÿetsca chabe ngmenënguentšana tbojanatsbocá y Bëngbe Bëtsá tojanma cha chaotsetatsëmbuama tšabá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyejuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnënguentše oyenëngbiámnaca.

<sup>11</sup> “Chë tempo, Egiptó y Canaán luariñe bëts shëntsana tojanóshjango y puerta ngménana yojtsemna y bëngbe bëts taitanga ndoñe imontsobena saná jónÿenama.

<sup>12</sup> Pero Jacob tojántatsëmbona Egiptoca saná yojtsemnama; asna, chabe uaquiñënga, chë bëngbe bëts taitanga choye tojanichamó. Chora yojamna chë natsanama chënga Egiptoeye jama.

<sup>13</sup> Uta soyama chënga tmojttesaná ora, José chabe catšátanga tojanëyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiana tojántatsëmbona.

<sup>14</sup> Chentšana, José tojanmandá chabe taitá Jacob y nÿetsca pamíllanga Egiptoeye chamotsama. Canÿsëfta bnëtsana shachnënga imojamna chë Egiptoeye tmojánanga.

<sup>15</sup> Chcasna, Jacob Egiptoeye tojána choca joyéanama. Choca cha tojanóbana y chë inÿe bëngbe bëts taitángnaca.

<sup>16</sup> Jacob y chabe básenga, ntšamo imojtsobancá, chëngbe cuerpo Siquem bëts puebloeye

imojtsatambaye y tmojanëtebuantsá, Abraham tojëftsanbuamé cuevëshënguiñe. Abraham canye crocenánama Hamorbe uaquiñëngbioye, chëshënga yojtëyentsbuamiñe Siquem puebloca.

17 “Ntšamo Bëngbe Bëtsá Abrahámioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna.

18 Cabana, Egiptoca inye rey tojanojayé y cha Josébioye ndoñe tbonjanabuátmana.

19 Chë reyna, bëngbe entšanga, chë bëngbe bëts taitángbioye tojanaingñé y tojanma chënga puerta chamosufrima; tojanamëndá, chë tmojtsónyña šešonatémënga cachcá jtsënyayana chamotsóbanama.

20 Chë tempo canye básetema tojanonýná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ishinýentscuana.

21 Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché.

22 Chca, chë Egiptoquënga imnatátšëmbo soyënga Moisés tmojanbuatëmbá y canye uámana entšá tojánbocna jóyebuambayama y ndayánaca jamama.

23 “Canta bnëtsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entšanga imojtsemnama.

24 Canye, Moisés tojáninye canye Egiptocá canye Israelocábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba.

25 Moisés yojtсанjuabnaye chë Israeloquënga yojtsošertana, Bëngbe Bëtsá yochjanma cach Moisesbe obenánaca chë Egiptoca mandentsana chëngbioye játsebacama ca. Pero chë Israeloquënga ndoñe yontsësertana.

26 Yëfsana, Moisés tojánanýena útata, cach Israe-locata, ibojtsentsjanaye; chora cha betesco tojána jetsëuyanama y tojanéyana: ‘Tsëndata catšata šondmëna, ¿ndáyeca šojtsentsjanata ca?’

27 As, chë ínýabioye ibojtsentsjanayá Moisésbioye tbojtсанajuatsëntse y tbojaniyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca?’

28 ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’

29 Moisés chca tojanuena ora, Madián luaroye tojtсанachá y choca yojoyena inýe luarocana ash-jangonacá. Chentše uta uaquiñata yojéftsabamna.

30 “Chentsana canta bnëtsana uatëse, entsanga ndoyena luariñe, Sinaí tjañe béconana, canýe ángel tbojánebëbocna zarzësha yojtšángbototjuanentše.

31 Moisés yojenjaná ndayá yojtsonýama y tšabá jinýama tojanobeconá ora, tojanuena Bëngbe Bëtsá mëntšá ibojtsatsëtsnaye:

32 ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebomna choye jontješiyama.

33 As Bëngbe Utabná tbojaniyana: ‘Mot-senóshecbotsca, er aca contsemnentše nýe atšbiamu luare endmëna, er átšnaca chentše sëntsemna.

<sup>34</sup> Ndegombre sēnjinye ntšamo atšbe entšanga Egiptoca montsesufrina y sēnjouena chēngbe oy-abojuayana, y atše sēnjabo chēnga jabátsebacama. Chcasna, mabouena, Egiptoye cbochanjíchmuca ca' —Bēngbe Bētsá tbojaniyana.”

<sup>35</sup> Chentšana Esteban tojaněyana: “Quem Moisés entšanga tmojtsanaboté y tmojaniyana: ‘¿Nda bēngbeñe tcmēnjajayé mandado y chē tšabá o ndoñe tšabá ftsamama chacuayanama ca?’ Masque chca, Bēngbe Bētsá mo mandayacá y atsebacayacá tbojesanichmó, chē zarzēshentše tojanobinýná ángeloftaca.

<sup>36</sup> As Moisés, bēngbe bēts taitanga Egiptocana tojésanébuacna y bēts soyēnga tojanma, y inye soyēnga Bēngbe Bētsabe obenana jinýanýiyama Egiptentše, chē Buángana ca uabaina mar bėjayentše y entšanga ndoyena luarentše, canta bnětsana uatěntscuana.

<sup>37</sup> Cach Moisés Israeloca entšanga mēntšá tojaněyana: ‘Bēngbe Bētsá tšēngaftanguentsana canya bochanjábema atšcá Bēngbe Bētsabe juabna oye-buambnayá ca.’

<sup>38</sup> Moisés Israeloca entšángaftaca yojěftsemna chē entšanga ndoyena luaroca. Choca chē entšanga tmojánenefjna Sinaí tjañe béconana. Chentšana canye ángel Moisésoftaca tojanoyebuambá, bēngbe bēts taitángbioye chē buayenana soye Moisés chaóyebuambama, chē entšanga tšabe vida jónýenama palabrénga; y Moisés chca tojanma, bēngnaca chē palabrénga jouenama jobenayama.

<sup>39</sup> “Pero bēngbe bēts taitanga ndoñe tmonjánbošena joyeunayama, masna nýe

tmojtsanaboté y Egiptoeye jesshēconama imojtsaiseboše.

<sup>40</sup> Moisés cabá chē tja tsjuanoca chē ángeloftaca yojtsemna ora, chēngbe bachnangbe más uámána amēndayá Aarónbioye mēntšá tmojaniyana: ‘Bēngbe Bētsabe cuenta šmayentšpormá canye buashinÿinÿana soye jadórama, bēnga chašúnatsama. Er bēnga quemátstatšēmbondayá yojtsopasana Moisés, chē Egiptocana šonjētsēbuacnáftaca ca.’

<sup>41</sup> As tmojanma canye buashinÿinÿana soye mo canye uacnabecá y cha jadórama ba bayēnga tmojanēbaye, y tmojanóboyejuanga cachēnga chē soye tmojanpormáyeca.

<sup>42</sup> Chē causa, Bēngbe Bētsá chēngbentšana tojtsanojuánañe y cachcá tojesanēñyaye chēngbe bacna soyēnga causa, estrellatēmēnga chamot-sadoránama. Chca jochnēnguama, Bēngbe Bētsabe juabna oyebuambayēngbe librēšañe mēntšá endayana, ntšamo Bēngbe Bētsá tojanayancá:

Israeloca entšanga,

¿Atše jētschuayama bayēnga chešmēnjanēbaye y chē soyēnga chešmēnjanátšēmbona,

chē canta bnētsana uata entšanga ndoyena luar-entše tšēngaftanga šmonjēftsemna ora?

<sup>43</sup> Atše jadóra cuentna, chē Molocbiamama jebna soye šmonjanacutsá y cha šmonjánadorana,

y chē Refánbe estréllacnaca cachcá šmonjánama.

Chē soyēnga mo Bēngbe Bētsá cuenta šmonjánbomna y cach tšēngaftanga šmonjanobopormá jadórama.

Mora chë causa atše chanjama, Babilonientšana más chcoye tšëngaftanga chacmotsënatsama ca” —chiñe endayana.

<sup>44</sup> “Bëngbe tempsca bëts taitanga entsanga ndoyena luaroca, chë jatsjacama opodena yebna imnabomna; chë yebnentše Bëngbe Bëtsá chëngaftaca tojanoyebuambá. Inajebna ntšamo Bëngbe Bëtsá Moisésbioye tbojanmandacá, y cha tojanma ntšamo chaojebuama Bëngbe Bëtsá tbojaninÿinÿecá.

<sup>45</sup> Bëngbe bëts taitangna chëngbe taitángbentšana chë jatsjacama opodena yebna chëngbiamá tmojanóyëngacñe, y chënga chë Canaán luaroye Josuéftaca, chë inÿe luaroquëngaftaca jéntsjava tmojána ora, chë jebna soye tmojanamba y chocna, Bëngbe Bëtsábeyeca chentša entsángbioye Israeloquëngbentšana tmojtanëbuacna; y chë jebna soyna chë tmojanayëñjaná luarentše tojanoquedá, rey David yojëftsiyenëntscuana.

<sup>46</sup> David tšabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaot-siyenama.

<sup>47</sup> Pero Salomón inamna nda chë Bëngbe Bëtsabe bëts yebna tojanjebuá.

<sup>48</sup> Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

<sup>49</sup> ‘Celoca endmëna chë luare ndayentšana atše tsmánda,

y quem luare endmëna nÿe mo canÿe tšenëtemcá  
ndayentše atšbe shecuatšënga chjacjaye.

As, ¿ntšamo atšbiana jebna yebna šmochjajebo  
ca?” –chë Utabná jayanana–;

‘o ¿ndaye yebnentše atše jóchnama chjobenaye,

<sup>50</sup> ndegombre cach atše nÿetsca chë soyënga ti-  
jamëse ca?” ”

<sup>51</sup> Esteban mëntšánaca tojanëyana:  
“Tšëngaftanga nÿets tempo josértama ndëbošënga  
šmondmëna; šmondbomna ainana mo chë Bëngbe  
Bëtsábeñe ndošbuáchiyëngbe ainancá, y Bëngbe  
Bëtsabe soyëngama nduauenanënga šmondmëna.  
Tšëngaftanga ndocna te quešmátsboše chë Uámana  
Espíritu joyeunayana. Ntšamo tšëngaftangbe bëts  
taitanga monjaniyencá, tšëngaftángnaca cachcá.

<sup>52</sup> ¿Bëngbe Bëtsabe juabna oyebuamb-  
nayënguentsana, ndábioye tšëngaftangbe bëts  
taitanga ndoñe monjanacmena? Chë Bëngbe Bëtsá  
tojanichamó entsanga chënga tmojtšanëbaye, y  
mëngna entsángbioye imojanabuayiyiná Cristo, chë  
ntšamo Bëngbe Bëtsá yobošcá amá yochjánabama.  
Pero morna, uayayëngbe cucuatšinë cha  
šmojábošhona y šmojóba.

<sup>53</sup> Bëngbe Bëtsabe mandënga angelëngaftaca  
tšëngaftanga šmonjanóyëngacñe, pero chë soyënga  
ndoñe quešmátsyeunana ca” –cha tojanëyana.

### *Esteban ndëtsbéngaca tmojanóba*

<sup>54</sup> Chentša mándayënga chca tmojanuena  
ora, Estébanoftaca tmojanotjayaná y tmojane-  
naftëšbonzentsé, rábiaca imojtsemnama.

<sup>55</sup> Pero chë Uámana Espíritu Estébanbe ainaniñe  
corente yojtsemádaye. Celoye yojontješiye y



Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catsbioica yojtsatsana.

<sup>56</sup> As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catsbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontsënja.

<sup>58</sup> Chentšana, chënga chë pueblentšana tmojt-sanábocna y ndëtsbéngaca tmojt-sanatëchënganja. Chë Estébanbioye mal tmojanquedangna entšayangá tmojt-sanenátsejca y canÿe bobontse, Saulo ca uabainá, tmojesanábonyiñe chaotsinÿenama.

<sup>59</sup> Ndëtsbéngaca imojtsénanantscuana, Esteban Bëngbe Bëtsáftaca ibojtsencuéntaye y mëntšá tojánayana: “Bëngbe Utabná Jesús, atšbe espíritu šmóyëngaca ca.”

<sup>60</sup> Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

## 8

<sup>1</sup> Saulo chentše yojtsemna y tšabá imojtsama ca yojtsejuabnaye, Esteban tmojanóbama.

*Saulo yojánama chë Crístbeñe ošbuáchiyënga chamotsesufrínama*

Cach te, ínÿenga tmojanontšé Jesucrístbeñe ošbuáchiyënga Jerusalenentše ucamenana y jtsamana puerta chamotsesufrínama; chcasna,

chënga tmojtsanacheta y Samarioye y Judeoye tmojanáshana. Nýe chë Jesucristbe ichmónënga ndócnoye tmonjánacheta.

<sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiamma puerte tmojánenobošachna.

<sup>3</sup> Chëntscuana, Saulo yojtsentšena Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámiamma.

*Felipe Samaria luaroca tšabe noticiëngama yojanabuayiná*

<sup>4</sup> Y Jesucristbeñe ošbuáchiyënga tmojanáshanëngna nýetsquénache imojánabuayinaye Jesusbe tšabe noticiënga.

<sup>5</sup> Chca, Felipe Samarioye tojána y tojanontsé chë Bëngbe Bëtsabe Uámana Uabuayaná, Cristbiamma, chentša entšanga jábuayenama.

<sup>6</sup> Entšanga imojánenefjuana Felipe joyeunayama y tmojáninýe bëts soyënga cha jtsamana, Bëngbe Bëtsabe obenana jinýanýiyama. Chënga nýetscanga ntšamo Felipe yojtsichamcá tšabá imojtseyenana.

<sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentšana imojtsaisebocana; y banga jama ndobenënga y coshetënga tšabá imojtsatsmëna.

<sup>8</sup> Chë soyama chë pueblentša oyenënga corente imojtsóyejuaye.

<sup>9</sup> Pero canýe pueblentše Samarioca inamna canýe boyabása, Simón ca uabainá; cha tempo

inamna canye bocjuaná y chë Samarioca entsanga chabe soyëngama imojánenjanaye. Cha yojánichamo cha canye uámana entsá canjamna ca.

10 Y chábioye corente imnayeunana nyetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inyanynayá ca.”

11 Y ndegombre chënga corente imnayeunana, er cha chë bocjuanana soyëngaca bayté chë entsanga ingñénënga y ojanánënga yojtsabamna.

12 Pero chë luarentša entsangna, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye.

13 Y cach Simónënaca Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninye Felipe chë bëts soyënga Bëngbe Bëtsabe obenánaca jamana, y chama ojananá yojtsemna.

14 Chë Jerusalemoca imojtsemna ichmónënga tmojántatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó.

15 Pedro y Juan Samarioye tbojánashjango ora, chentše Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espíritu chëngbeñe cháumashënguama jtsemándayama.

16 Er cabá ni mo cányabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga

jtsemnama imojtsebóseyeca.

<sup>17</sup> As Pedro y Juan chëngbe bestšašiñe cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

<sup>18</sup> Simón tojáninÿe, chë ichmónënga entsángbeñe cucuatšënga tmojancjá ora, chë Uámana Espíritu chëngbeñe jamashënguana. As chora Simón chë ichmónënga tojanëyana: —Quem crocénana mosháchiñe,

<sup>19</sup> y átsnaca chë obenana šmatšetá, y ndábeñnaca cucuatšënga chaijajajó ora, chábeñnaca chë Uámana Espíritu cháuamashëngo ca.

<sup>20</sup> As Pedro tbojaniyana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocenánaca jobuámiñama yopodena ca tcojajuabó causa!

<sup>21</sup> Ndegombre, aca bëngftaca ndoñe quecátsmëna, ni bëngbe trabajo acbiamá quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa.

<sup>22</sup> Ngmënaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna.

<sup>23</sup> Atše sëntsetatšëmbo, acbe ainaniñe tša bacna juabnënga ínÿengbiamá yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojaniyana.

<sup>24</sup> As chora Simón tojanëyana: —Bëngbe Utabná atšbiamá šochjaimpáda, ntšamo šmonjauyancá ndoñe chandëpasama ca.

<sup>25</sup> Pedro y Juan, ntšamo Bëngbe Utabná Jesucrist-biama tbojaninýcá y ibnatatšëmbcá entšanga imo-jtsëtsëtsnaye. Chentšana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entšanga abuayinyaye.

*Felipe y chë Etiopía luaroca reinabe uajabuachaná*

<sup>26</sup> Chentšana, Bëngbe Utabnabe canýe ángel Felípbioye tbojanianyana: “Moprontá y tsmána luarëngoye motsa, Jerusalenentsána Gaza ca uabaina bëts puebloye benachëjana ca.” Chë benachna entšanga ndoyena luarëjana yojanachnëngona.

<sup>27</sup> As Felipe yojëftsëtsbaná y tojána. Benachiñe tbojáneninýena canýa Etiopía luarocáftaca. Etiopía luaroca canýe reiná inamna y chë boyabásana chabe uajabuachaná y chabe crocénana bojanýá inamna. Chana Jerusalenoye tojánabo Bëngbe Bëtsá jadórama.

<sup>28</sup> Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnáyá Isaíasbe uabemana librëša yojtsaiualíaye.

<sup>29</sup> Chora chë Uámana Espíritu Felípbioye tbojanianyana: “Mobeconá y chë cochësha juachaca cochtsaye ca.”

<sup>30</sup> As Felipe betesco yojobeconá. Chora yojouena chë Etiopía luarocá, Isaíasbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

<sup>31</sup> Y chë Etiopía luarocá tbojanjuá: —¿Ntšamo šochjosérta, ndocná šonjabuayenase ca?

Y Felípbioye tbojaniyana: –Diosmanda, atšbe cocheshoye másëngo y atšbe juachaca mabótbema ca.

<sup>32</sup> Isaíasbe uabemana librëšañe mëntšá yojtsalíaye:

Cha tmojanánatse mo canÿe oveshá jóbama cuafjuanatscá;

y chë mo canÿe oveshá tmojtsëtsbotjná ora, cha iytëca jtsemnana,

chánaca cachcá, chacá tondaye chenátanayana.

<sup>33</sup> Entšanga tmonjanma cha puerte chaosufrima, mo cha canÿe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiana jacuéntana,

quem luarentša chabe vida tmontsanbojuaná causa ca.

<sup>34</sup> Chora chë Etiopía luaroca uajabuachaná Felípbioye tbojaniyana: –Diosmanda, šmobuayená, ¿ndabiama Bëngbe Bëtsabe juabna oyebuambnayá chca yojtsichamo, cachabiama o ínÿabiama ca?

<sup>35</sup> As Felipe tojanontsé, chë Isaíasbe librëšañe yojtsayana sóyeca, Jesusbe tšabe noticiënga jábuayenama.

<sup>36</sup> Chentša bënëse, canÿe béjaye obëjniñe juachañe ibojtsachnëjuana. Chora chë uajabuachaná tojánayana: –Muentše béjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

<sup>37</sup> As Felipe tbojaniyana: —Jesucristbeñe n̄yets acbe ainánaca tcojtsošbuáchese, aíñe echanjopódia juabáyama ca.

Y chē boyabása tbojanjuá: —Aíñe, sēntsošbuaché Jesucristo Bēngbe Bētsabe Uaquiñá yomnama ca.

<sup>38</sup> As chē Etiopiocá tojanmandá chē cochēsha chauátotonama. Chentšana, n̄yets útata chē béjayoye tbojanashēbēbuástjango y Felipe, chē Etiopioca uajabuachanábioye tbojanabaye.

<sup>39</sup> Chē béjayentshana tbojtanbocna ora, chē Uámana Espíritu Felipe ibojtsánatseñe y chē uajabuachaná ya ndoñe más Felípbioye ibontson̄yaye, pero corente oyejuayá yojtsatoñe.

<sup>40</sup> Felipe tojántatšēmbona Azoto bēts puebloca yojtsemnama, y chentšana tojána n̄yetsca pueblēnguenache chē tšabe noticiēnga abuayiy-naye, Cesarea puebloye jashjanguēntscuana.

## 9

### *Ntšamo Saulo Crístbeñe ošbuachiyá tojanóbema (Hch 22.6-16; 26.12-18)*

<sup>1</sup> Saulo chēntscuana cabá Bēngbe Utabnábeñe ošbuáchiyēnga yojanautatjná jtsēbáyama. Chama cha tojána chē bachnangbe más uámana amēndayábioye,

<sup>2</sup> uabemana tsbuanachangá jauátjañama, as chēchangaca jobenayama chē Damascoca judiēngbe enefjuana yebnēngoye jama, y chocna, chē Jesucristo tojanin̄yan̄yé Benache ustoniñe, boyabásenga o shembásenga toján̄yenēse, jótabayama y Jerusalenoye junatsama. Y chca jamama tojánbocna.

3 Pero ya Damasco béconana yojsaye orna, nÿe ndeolpe chabe juachañe celocana canÿe bÿets tcuinÿe tojanbuashinÿinÿena.

4 Chora Saulo fshantsoye tojánshajaye y canÿe oyebuambnayana tojanuena, mÿentšá: —Saulo, Saulo, ¿ndáyeca chca šcojtsacmena ca?

5 As Saulo tbojantjá: —¿Nda comna, Bÿengbe Utabná ca?

Y chÿe oyebuambnayana tbojanjuá: —Atše sÿendmÿena Jesús y aca condama atšbe entšanga chamotsesufrínama.

6 Pero matÿetsbaná y Damascoye mamáshÿengo; chentše canÿa cmochanjabuayená ndayá jamama cmojtsemnama ca.

7 Chÿe Sáuloftaca imojánajna boyabásenga tša auatjanánÿenga imojtsemna y chíyeca ndoñe imontsobena jóyebuambayana; er nÿe chÿe oyebuambnayana tmojanuena, pero ndocná tmonjáninÿe.

8 As Saulo fshantsentšana tojtantsbaná y tojtanobuchatefjona ora, tondaye yontsobena jinÿana. Chcasna, chÿe inÿenga tmojëftsanobuacuetÿentšé y chca, Damascoye tmojanánatse.

9 Chentše yojëftsemna unga te, jinÿama ntsobencá, ni ntjascá y tondaye ntjofšiyá.

10 Damascoca Jesucrístbeñe canÿe ošbuachiyá inoyena, Ananías ca uabainá. Cha Bÿengbe Utabnábioye mo otjenayoquécá tbojáninÿe y Bÿengbe Bÿetsá tbojaniyana: —Ananías ca.

As cha tbojanjuá: —Bÿengbe Utabná, ¿ndayá chjama ca?



11 Y Bëngbe Utabná tbojaniyana: –Moprontá y motsa chë “Ndericho tsáshenañe ca” uabáinoye, y Júdasbe yebnentse cochjanotícia canye boyabásabiama, Saulo ca uabainábiamá, Tarso pueblócá; cha mora Bëngbe Bëtsáftaca bentsencuénta.

12 Saulo ya tonjinye mo otjenayoquécá, canye entsá Ananías ca uabainá entsamashjuana y chabe cucuatšënga chabe bestšašine entsejájua, chca, cha chabuatabínynama ca.

13 Ananías chca tojanuena ora, tojánayana: – Bëngbe Utabná, banga ba soyënga chabiamá šmonjacuentá; Jerusalenoca tša bacá acbe entsanga imomnënga tojáborye.

14 Y mora entsebomna mando chë bachnangbe amëndayëngbentsana, muentse aca otšëmbuanënga jótabayama ca.

15 As Bëngbe Utabná tbojaniyana: –Motsa, er atše cha sënjuábuayana atšbiamá chaotrabajama; chaóyebuambama ndoñe judiëngbeñe, reyëngbeñe y Israeloca entsángbeñnaca, y chca, chënga atšbiamá chamotatsšëmbonama.

16 Atše cha chanjinýinýiye ntsachetšá ibojtsemna átšbeyeca jasúfriama ca.

17 As Ananías tojána Saulo yojtsanmëna yebnoye. Tojánamashëngo ora, Saulëbe bestšašine chabe cucuatšënga tojanjájó y tbojaniyana: “Jesucrístbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínynama y chë Uámana Espíritu acbe ainaniñe jtsemándayama cháumashënguama ca.”

18 Cachora, Sálübe bominjentshana mo beonbe bobachëshengcá tojantquécjana, y chca, ibojstatabinyña; chora tojantsbaná y tojanenábaye.

19 Chentsana, Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

### *Damasco puebloca Saulo entsanga yojanabuayiná*

20 Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama.

21 Chë imojtsuenanënga nyëtscanga imojtsenjnanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšinë jabáshejuanama.”

22 Pero Saulo cada ora más añëmoça yojtsóyebuambnaye y puerte tšabá yojaninyänyná Jesús Bëngbe Bëtsabe Uámana Uabuayaná bëtsemnama. Chýeca chë Damascoca judiënga ndoñe imontsobena ntšamo cha jojuana.

### *Ntsamo Saulo judiëngbentsana tojtsanachá*

23 Bayté tojanochnëngo ora, judiënga tmojanenoyeuná ntšamo jamëse Saulo jóbama,

24 pero Saulo chë soye tojántatšëmbona. Bnëté y ibeta, chë bëts pueblentša bëšašanguenache chënga chabiamama imojananýá, jtsóbama;

25 pero chë Jesucristbeñe ošbuáchiyënga, ibeta, cha canýe bëts sbarëcuiñe tmojtsanatsuumá,

y chë pueblentša shëconana tapiëšëjana tmojtsanëštjango. Chca cha tojanotsbocá.

### *Saulo Jerusalenoca*

<sup>26</sup> Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nÿetscanga imojtsebiauatja y ndoñe imontsošbuaché Saulo Jesucristbe ustoná yojtsemnama.

<sup>27</sup> Chcasna, Bernabé Sálëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninÿama, ntšamo Bëngbe Utabná tbojaniyanama y ntšamo cha Damascoca tša añémoca Jesusbiana entšanga tojánabuayenama.

<sup>28</sup> As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiana bëts añémoca entšanga yojanabuayiyná y

<sup>29</sup> yojanoyebuambná y imojanenatsëtsná chë griego biyá judiëngaftaca; pero chëngna imojt-senëyeunana Saulo jtsóbama.

<sup>30</sup> Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

<sup>31</sup> Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nÿetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espiritbe

uajabuáchenanaca, Jesucristbeñe ošbuáchiyënga más tmojanoboté.

*Pedro Enéasbioye tbojanshná*

<sup>32</sup> Pedro yojánabuache nÿetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámnaca tojána.

<sup>33</sup> Lida pueblentše canÿa tbojáninÿena, Eneas ca uabainá. Cha jama ndobená inamna y posufta uata jutsněshañe chca inajájona.

<sup>34</sup> Pedro tbojanियana: “Eneas, Jesucristo tcmón-jashná. Matëtsbaná y acbe tjuashe motsejacadá ca.” Y cachora chë jama ndobená tojtantsbaná.

<sup>35</sup> Nÿetscanga chë Lida pueblentše y Saronoca oyenënga chë entšá shnaná tmojáninÿe. Y as, chënga bacna soyënga amana tmojtsanajbaná y cach orscana tmojanontšë Bëngbe Utabnábeñe ošbuáchiyana.

*Pedro tojanma Dorcas cháuatayenama*

<sup>36</sup> Chë tempo, Jope puebloca yojaniyena canÿe shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nÿets tempo tšabe soyënga yojánama y yojanamana chë tojtsëjabetënga jujabuáchana.

<sup>37</sup> Pero chora, šocana tbojanshache y tojt-sanóbana. Tmojtsanbebé chentšana, canÿe tsoye tsbanana tsañoca chabe cuerpo tmojtanaajajó.

<sup>38</sup> Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betscó Jope puebloye mabo ca.”

<sup>39</sup> As Pedro tojéftsantsbaná y chë uta boyabásaftaca tojána. Choye tmojánashhajna ora, tmojanánatse chë Dórcasbe cuerpo yojtsemnoye, tsbanánoca; chorna, nÿetsca viudanga šachénaca Pédrëbioye tmojanóbobuashcona y imojtsinÿinÿnaye chë Dorcas yojuajonaná entšayangá y cmešëjuangá, cabá chëngaftaca yojéftsemna ora.

<sup>40</sup> Pedro tojanmandá nÿetscanga chentšana chamotsebocanama; chora Pedro yojshëntsamentšiye y Bëngbe Bëtsáftaca ibojencuentá. Chentšana, Pedro chë obanábioye tbojanonÿinÿé y tbojaniyana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninÿe ora, tojanótbema.

<sup>41</sup> Chora Pedro tbojanábuacueshache y tbojtanatsbaná. As Pedro tojánachembo nÿetsca chë Jesucrístbeñe ošbuáchiyënga, chë viudanga y chë ínÿenga, y Dorcas ainá tojtaninÿanÿé.

<sup>42</sup> Chë soye nÿets Jope pueblentše tojanótatsëmbona y banga Bëngbe Utabnábeñe imojtsošbuáchiye.

<sup>43</sup> Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

## 10

### *Pedro y Cornelio*

<sup>1</sup> Cesarea pueblentše inamna canÿe boyabása Cornelio ca uabainá; cha inamna chë Italiano ca uabaina soldadëngbe amëndayá.

<sup>2</sup> Cornelio Bëngbe Bëtsábioye ibnarrespetana y nÿetsca chabe yebnentša oyenëngaftaca Bëngbe Bëtsá puerte imojánadorana. Becá crocénana

inaquëcñayē chë judiënga ndbomñëjémënga jujabuáchama y sempre Bëngbe Bëtsáftaca ibnéncuentayē.

<sup>3</sup> Canyē te, mo bëts mošenana ora, cha botamana tojáninÿe mo otjenayoquëcá, mëntsá: Bëngbe Bëtsabe canyē ángel Cornelio yojtsemnoye yojtsamashjuana y tbojaniyana: —¡Cornelio ca!

<sup>4</sup> Cornelio chë ángelbioye ibojtsonÿaye y auat-jananá tbojaniyana: —Taita, ¿ndayá yojtsemna ca?

Y chë ángel tbojaniyana: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye.

<sup>5</sup> Chcasna, mora básefta boyabásenga Jope bëts puebloye michamó y Simón, chë Pedro ca mondu-abobuatmá, moye chamuánatse.

<sup>6</sup> Cha posada entsebmna inÿe Simónbentse, chë bobáchëshiñe trabajayabe yebnentse. Chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtsatanoñe ora, Cornelio chabe oservenënguentsana útata tojánachembo y canyē soldádnaca, chabe uajabuachaná, Bëngbe Bëtsá adorayá;

<sup>8</sup> lempe ntšamo yojopasacá chënga tojanacuntá y chentsana Jope puebloye tojanichamó.

<sup>9</sup> Yëfsana mo nÿetsto ora, chënga benachiñe Jope béconana imojtsajnëntscuana, Pedro yebnentša tsbanánoye tojánasëngo, Bëngbe Bëtsáftaca jencuéntama.

10 Becá tbojánishēntsena y jasama yojtseboše; pero imojtsebopróntantscuana, Pedro mo otjenay-oquécá mēntśá tojáninýe:

11 Celoca yojtsatēfna y mo canýe bēts entśayējuacá yojtsabá y nýets canta sibientśana yojtsějonyana.

12 Chē entśayējuañe imojtsemna nýetscna bayēnga, ósjojnaye bayēnga y nýetscna shloftśēngnaca.

13 Y tojanuena canýe oyebuambnayana mēntśá: —Motsbaná, Pedro; mobaye y quem bayēnga mose ca.

14 Chora Pedro tojánayana: —Ndoñe, atśbe Utabná. Atśe ndocna te chiyáise Moisesbe leyíñe ndoñe yondēlesenciana jasama bayēnga y chē jasama ndoñe tśabá imomna bayēnga ca.

15 Y cachiñe tojtētanuena chē oyebuambnayana mēntśá: —Bēngbe Bētsá tojalesenciá y canýe bayá tśabá jasama yomna ca tojayanēse, aca ndoñe matsjuabnana chē bayá jasama ndoñe tśabá yontsemna ca.

16 Chē soye unga soyama chca tojanopasá chentśana, chē entśayējua celoye tojtanátsjua.

17 Pero Pedro ndoñe yontsetátśēmbo ntśamo tojaninýcá ndayá chabiamama yojtsayanama. Chēntscuana, chē Cornéliēbe ichmónēnga noticiánana Simónbe yebnoca tmojánashjajna y shjoca bēšoca imojtsobátmana.

18 Tmojanchembo ora, tmojanēnoticiá Simón, chē Pedro ca uabobainá, chentśe taibojatanama.

19 Pedro, ndayá tojáninýama chabosertama yojtsenójuabnantscuana, chē Uámana Espíritu

tbojanianyana: “Mouena, muentše mora unga boyabásenga cmontsenguá.

20 Motsbaná, mocana matastjango y yapa ntjatenujuabnaycá chéngaftaca cochjá, er atše chénga sēnjichamó ca”.

21 As Pedro tojtanastjango y chē tmojánashjajnēnga tojanēyana: —Atše sēndmēna chē šmontsenguá cha. ¿Ndáyeca moye šmojabo ca?

22 Chora chénga tmojanjuá: —Cornelio šonjichamó. Cha endmēna chē soldadēngbe amēndayá, canye tšabá mándbomna entšá y Bēngbe Bētsábioye adorayá, y nyetsca judiēnga chabiamá tšabá mondbétsoyebuambnaye. Bēngbe Bētsabe canye ángel chábioye tbojabuayená ntšamo jamana aca chábioye chacotsama, as chē ndayá cha jauyanama cojtsebomncá cha jouenama ca.

23 As chénga tojanēmashengo y posada tojanēyentšame. Yēfsana Pedro chē unga boyabásengaftaca tojána. Básefta Jesucrístbeñe ošbuáchiyēnga Jope pueblentšēnga Pedro tmojantjēmbambá.

24 Chē inye yēfsana Cesarea puebloye tmojánashjajna. Chentše Cornelio Pédrēbiamá yojtsobatmana, y Cornelio tojanēbuaja pamíllanga y tšabe amiguēngnaca chentše imojtsemna.

25 Pedro tojánashjango ora, Cornelio tojánbocna jajébenguama y chabe shecuatšentše yojoshēntsamentšiyē cha jadórama.

26 Pero Pédrēna tbojtanatsbaná y mēntšá tbojanianyana: —Matētsbaná, atše cach aquēcá nye canye entšá sēndmēna ca.



27 Pedro Cornélioftaca encuéntaye chë yebnentše tojánamashëngo y ba entšanga tojánanÿena, chentše tmojanójotënga.

28 Chora Pedro tojanëyana: —Cach tšëngaftanga šmondëtatšëmbo chë judiëngbe leyënguiñe endayana ndoñe yondopodena canÿe judío ndoñe judío entšàngaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿé atše ndocna te šondmëna ínÿabiama jatsjuabnayana cháftaca jenútanama ndoñe tšabá yondmëna ca.

29 Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmojobetše ca?

30 As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuéntaye y ndeolpe sënjinÿe atšbe delante canÿe boyabása uabuashinÿinÿana entšayaca bopormaná.

31 Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca.

32 Básefta boyabásenga Jope bëts puebløye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.”

33 Chcasna, cachora sënjichamó aca jobetšama, y aslëpaye jabama tcojóyaunama. Y as

morna, n̄yetscanga Bēngbe Utabnabe delante fs̄entseprontana jouenama lempe nt̄samo Bēngbe Bētsá tcmojamandacá ca –cha tojánayana.

*Nt̄samo Pedro tojanoyebuambá Cornéliēbe yeb-nent̄še*

<sup>34</sup> Pedro chora tojanont̄sé mēnt̄sá jóyebuambayama: –Mora at̄še šontsosertana, ndegombre Bēngbe Bētsabiama n̄yetscanga cachcá uámanēnga imomnama.

<sup>35</sup> N̄yets luarēnguenache Bēngbe Bētsá júbuajana cha tmojtsatschuaná y t̄šabe soyēnga tmojtsamēnga.

<sup>36</sup> T̄šēngaftanga šmondētats̄ēmbo, Bēngbe Bētsá Israeloca ent̄šanga tojánabuayenama, t̄šabe noticiēnga jtsóyebuambnayēse, chēnga n̄yetscanga ainaniñe t̄šabe ebionana chamotsebonnama, Jesucrist̄beyeca; y cha endmēna n̄yetsca ent̄šangbe Utabná.

<sup>37</sup> T̄šēngaftanga šmondētats̄ēmbo nt̄samo n̄yets Judeoca tonjanopasama. Chē soye Galilea luaroca tojanobojat̄sé, Juan ent̄šanga yojanabuayiyná orscana, chēnga bacna soyēnga amana chamotsajbanama y chamuenábayama.

<sup>38</sup> Smondētats̄ēmbo nt̄samo Bēngbe Bētsá, Jesús Nazaretocábioye tbojanábuayanama y tojanma chē Uámana Esp̄iritu chabe ainaniñe cháuamashēnguama, y tojanma Jesús corente obená chaotsemnama; y šmondētats̄ēmbo nt̄samo Jesús enjánana ent̄šangbiama t̄šabe soyēnga amiñe y n̄yetscanga chē Satanás yojánama chamosufrimēnga áshnaye, er Bēngbe Bētsá cháftaca yojtsemna.

39 “Bënga fsënjáninÿe y fsëndëtatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canÿe cruciñe jacrucificáse.

40 Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama.

41 Cha nÿetsca entsangbe delante ndoñe chenátanbocna, pero aíñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentsana bënga cháftaca fsënjanse y fsënjanošsé.

42 Cha šonjichamó entsanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiama y ainëngbiama yochjayana tšabá o ndoñe tšabá tmonjamama.

43 Bëngbe Bëtsabe juabna oyebuambnayënga nÿetscanga cach Jesusbiama tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

*Ndoñe judiënga chë Uámana Espíritu tmojanóyëngacñe*

44 Pedro chë palabrënga cabá yo-jtsóyebuambnantscuana, chë Uámana Espíritu tojánamashëngo nÿetsca chë imojtsuenanëngbe ainaniñe jtsemándayama.

45 Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espíritu ndoñe judiëngbeñnaca cháuamashënguama Bëngbe Bëtsá tojanmama.

<sup>46</sup> Chënga imojtsuenana chënga injëtsá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

<sup>47</sup> Chora Pedro tojánayana: “Pero mëngna chë Uámana Espíritu tmonjóyëngacñe ntšamo bënga tmonjoyëngacñécá. Chcasna, ndocná queochatobenaye jamana chënga uabáinënga ndoñe chamondëtsemnama ca.”

<sup>48</sup> As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

## 11

*Ntšamo Pedro chë Jerusalemoca imojánenefjuana ošbuachiyëngbioye tojanëyana*

<sup>1</sup> Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema.

<sup>2</sup> Pero Pedro Jerusalemoye tojesaná ora, báseftanga chabiamama ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentše base bobachtema tëtšenënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca.

<sup>3</sup> As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

<sup>4</sup> Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana:

5 —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninÿe celocana mo canÿe bëts entsëjuacá átšbioye enjëtsabeconaye y nÿets canta sibiocana enjëtsëjonÿana.

6 Y botamana sënjanrrepará ndayá chë tsoye bëtsemnama y sënjáninÿe choye monjëtsemna uamna y tjoca bayënga, ósjojnaye bayënga y nÿetscna shloftšëgnaca.

7 Y sënjanuena canÿe oyebuambnayana mëntsá: “Motsbaná, Pedro; mobaye y quem bayënga mose ca.”

8 Chora atše sënjánayana: “Bëngbe Utabná, ndoñe; atše ndocna te chiyáisese chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.”

9 Chentšana cachiñe sëntëtanuena chë celocana oyebuambnayana mëntsá: “Bëngbe Bëtsá tojalessenciá y canÿe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.”

10 Chë soye unga soyama chca tonjanopasá y chentšana chë entsëjua celoye tontanátsjua.

11 Y cachora unga boyabásenga Cesarea pueblocana ichmónënga, chë posada sëndbomnentše tmonjánashjajna, atše janguanguama.

12 Y chë Uámana Espíritu šonjanmandá atše yapa ntjatenojwabnaysá chëngaftaca jama; y quem chnënguana Jesucristbeñe ošbuachiyëgnaca átšeftaca tmonjána. Nÿetscanga canÿe entsá Cornelio ca uabainabe yebnoye fsënjánamashjna;

13 y chana bënga šonjanacuntá ntšamo tojáninÿe, cachabe yebnentše canÿe ángel ibojtsebiatsana y

mëntšá tbojaniyana: “Básefta boyabásenga Jope bēts puebloye michamó y moye chamuánatse Simón, chē Pedro ca monduabobuatmá,

<sup>14</sup> y cha cmochanjabuayená ntšamo aca y acbe yebnentša oyenēnga šmochjotsbocá ca.”

<sup>15</sup> As, atše jóyebuambayama sēnjanbojatšé orna, chē Uámana Espíritu tonjánamashēngo chēngbe ainaniñe jtsemándayama, ntšamo bēngbeñe natsana tonjanamashēngcá.

<sup>16</sup> “Chora sēnjanenujubó ntšamo Bēngbe Utabná tonjánayanama: ‘Ndegombre, Juan entšanga bėjayeca tonjanēbaye; pero Bēngbe Bētsá chē Uámana Espíritu bochanjíchmuá, tšēngaftangbe ainaniñe jtsemándayama cháuamashēnguama ca.’

<sup>17</sup> Chcasna, chēngnaca Bēngbe Bētsá chē Uámana Espíritu tonjatšatá, ntšamo bēnga, chē Utabná Jesucristbeñe ošbuáchiyēnga, šonjanatsatacá. Y chca, atše ndoñe quetsátsmēna canye tša uamaná, Bēngbe Bētsá jauyanama ntšamo cha yobošcá ndoñe chaondētsemna ca.”

<sup>18</sup> Jerusalemoca Jesucristbeñe ošbuáchiyēnga chē soyēnga tmojanuena ora, ndocá más tmojanantjá y Bēngbe Bētsá tmojtanchuá, mēntšá: —¡Asna, Bēngbe Bētsá chē ndoñe judiēngnaca tojalesenciá chēngbe bacna soyēngama ngmēnaca chamuatenójuaboma y chca amana chamotsajbanama, chē nyetsca tescama yomna tšabe vida chamotsebomnama ca!

*Ntšamo Antioquía pueblaca tojanobojatšé, entšanga Jesucristbeñe ošbuáchiyana*

<sup>19</sup> Esteban tmojanóba chentšana, tmojanontšé chē Jesucristbeñe inye ošbuachiyēngnaca

jatëcamiyama. As chentšana báseftanga yojsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nÿe judiëngbiama.

<sup>20</sup> Pero báseftanga imojamna Chipre y Cirene luaroquënga, y chënga Antioquía bëts puebloye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase.

<sup>21</sup> Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

<sup>22</sup> Jerusalenoca Jesucristbeñe ošbuáchiyënga chë soye tmojánatatsëmbona ora, Antioquía luaroye Bernabé tmojanichmó.

<sup>23</sup> Bernabé choye tojánashjango orna, tojáninÿe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nÿetscanga tojanabuayená chamotsiyena nÿets ainánaca Bëngbe Utabnábeñe jtsošbuáchiyëse.

<sup>24</sup> Bernabé inamna canÿe entšá tšabe soyënga amá, chë Uámana Espíritu chabe ainaniñe yojtsemándaye y bëts cá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso puebloye tojána Saulo janguanguama,

<sup>26</sup> y tbojáninÿena ora, Antioquía luaroye tbojëftsanbetše. Antioquía luarentšna canÿe uata nÿetsá Jesucristbeñe ošbuáchiyëngaftaca cánÿiñe

ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oye-buambnayënga Jerusalenocana Antioquía luaroye tmojána.

<sup>28</sup> Chënguentšana canya Agabo ca uabainá tojantsá y chë Uámana Espíritbeyeca tojánayana, mëntšá: “Njets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora.

<sup>29</sup> Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocénanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama.

<sup>30</sup> Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbioye.

## 12

### *Santiago tmojanóba; Pedro tmojanëtame*

<sup>1</sup> Chë tempo, rey Herodes básefta Jesucristbeñe ošbuáchiyënga tojánishëche jutámiamá y játsëtšenama.

<sup>2</sup> Tojanmandá espadējaca chamóbama Santiago, Juanbe catšata;

<sup>3</sup> y Herodes tojántatšëmbona judiënga chë soye tojanogúsetama; as, cha tojanmandá Pédrënaca



chamutámiamama. Chca tojanopasá chë levadúraca ndëpormana tandëse sayté, Bashco fiesta ora.

<sup>4</sup> Pedro tmojánishache orna, Herodes tojanmandá chamutámiamama, y chë cárceloca soldadënga cantátanga tmojanenojatá cántentše cha chamotsebojanÿama. Herodes yojétsejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama.

<sup>5</sup> Chcasna, Pedro yojtsétámema y chë soldadëngna corente imojtsebojanÿá. Pero Jesucristbeñe ošbuáchiyëngna bëts cá Bëngbe Bëtsá imojtseimpadana Pédrëbiamama.

*Bëngbe Bëtsá tojanma Pedro natjëmbana cárcelocana cháuaisebocnama*

<sup>6</sup> Canÿe te yojtsájamna Herodes entsangbe delante Pedro juabocnama. Chë te ibetna, Pedro yojtsomañe y cátaoica canÿe soldado yojtsemna; uta cadenëjuaca yojtsabatsëcna y inÿe soldadëngna bëšócana chë utámeniñe imojtsebojanÿá.

<sup>7</sup> Ndeolpe, Bëngbe Utabnabe canÿe ángel tojánbocna, y lempe chë utámeniñe yojtsebuashinÿinÿana. Chora chë ángel tëchañe Pédrëbioye tbojánbojajo, tbojanfšená y tbojaniyana: “Betsco motsbaná ca.” Y cachora chë cadenëjuangá Pédrëbe buacuatšënguentshana tojanatquécjana,

<sup>8</sup> y chë ángel tbojaniyana: “Matichëtjo y matóshecochëtjo ca.” Pedro tojanma ntšamo chë ángel tbojaniyancá, y chora chë ángel tbojátaniyana: “Mataquëfsayé y šmasto ca.”

<sup>9</sup> Pedro utámenocana chë ángel ibojtsëstona, pero ndoñe yontsetátšëmbo aíñe ndegombre o ndoñe bentsemna chë ángel yojtsama cha chocana

cháuissebocnama; masna, ibojtsinÿana mo canÿe otjénayoca cuaftsemncá ca.

10 Y útentse chë soldadënga imojtsebojanÿajana chata tbojánachnëngo y yerëša bëshásoye tbojánashjango, chë ndayëša yojanamna tsáshenoye jabocnama; y chë bëshásana nÿe cachabe ponto yojotëfjo. Chentsana tbojëftsanbocna ora, canÿe tsáshenëjana ibojtsaye, y nÿe ndeolpe chë ángel Pédrëbentsana yojtsojuánañe.

11 Nÿa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentsana y lempe ntšamo judiënga átšeftaca jamama imojuabnámnaca ca.”

12 Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentse banga cánÿiñe imojtsemna, Bëngbe Bëtsáftaca encuéntaye.

13 Pedro chë tsashenoica bëshásoca tojanchembo ora, canÿe oservená, Rode ca uabainá, tojánbocna jarrepárama.

14 Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bëshoca yojtsemna ca.

15 Chë tsoca imojtsemnëngna chora tmojaniana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojaniana: “¡Chabe ángel ctsemna ca!”

16 Chëntscuana Pedro cabá yojtsechembuana; tmojánëbiatëfjo y tmojáninÿe ora, chënga puerte imojenjnaná.

17 Pero Pedro tojánefjatsëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentsana tojanéyana: “Ntšamo tonjopasama Santiago y chë Jesucristbeñe inÿe ošbuáchiyënga šmochjaúnayeca.”

Chora Pedro chë yebnentsana tojtáisebocna y ínÿoye yojáta.

18 Tojanbinÿna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa.

19 As Herodes tojanmandá Pedro chamotsenguanguama; pero jtsinÿenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentsana tojanmandá chë cha imojanbojanÿá soldadënga jtsëbáyama. Chë soyënga tojanochnëngo chentsana, Herodes Judea luarentšana tojëftsanbocna y Cesarea luaroye tojtsanoñe, y choca tojtsanoquedañe.

### *Herodes tojanóbana*

20 Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canÿe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida inmabomna Heródesbe luaroca sanángaca.

21 Chcasna, rey Herodes inÿe tescama tojánachembo. Chë tena, jóyebuambayama Herodes

uámana entšayaca vojtopórma y vojótbema chabe mándaye tbemanentše; chentšana tojanonguamé.

<sup>22</sup> Chora entšanga tmojanontsé mēntšá uayebuáchana: “¡Chē entsoyebuambná cha entšá ndoñe quenátsmēna! ¡Chana canye dios entsemna ca!”

<sup>23</sup> Cachora, Bēngbe Bētsabe canye ángel tojanma Herodes šocana chaboshachama, chabe cuenta Bēngbe Bētsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chē tempo más bētská entšanga Bēngbe Bētsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chē Marcos ca uabobuatmá, chátaftaca tmojéftsanbetše.

## 13

### *Bernabé y Saulo tbojanbojatsé Bēngbe Bētsabe trabajo jamama*

<sup>1</sup> Antioquía luaroca Jesucristbeñe ošbuáchiyēnguentše imojtsemna Bēngbe Bētsabe juabna oyebuambnayēnga y ošbuachiyēngbioye abuátambayēnga. Chēnga imojanabaina Bernabé, Simón (chē Sibetá ca uabobuatmá), Lucio Cirenocá, Manaén (nda tojanoboché cányiñe Herodes, chē Galileoca réyefata) y Saulo.

<sup>2</sup> Canye te, Bēngbe Utabná imojtsatschuanaye y chama tondaye ntjascá imojtsemna ora, chē Uámana Espíritu tojánayana: “Mora šmochjaleséncia Bernabé y Saulo

tšəngafangbentšana chabuétsebocnama; chatna canye trabajuama sənjabacacá ca.”

<sup>3</sup> Bəngbe Bətsá jətschuayama tondaye ntjascá imojtseemnəntscuana y cháftaca imojtsencuəntantscuana, chəngbe cucuatšənga chatbe bestšaše juatsboica tmojancjá, chatbe trabajuiñe chaújabuachama Bəngbe Bətsá jtseimpadánese. Y chentšana chátbioye tmojtanadiošoftá.

### *Bernabé y Saulo Chipre luaroca*

<sup>4</sup> As Bernabé y Saulo, chə Uámana Espíritbeyeca ichmónata, Seleucia ca uabáinoye tbojánata y chentšana bejaycá, Chipre luaroye.

<sup>5</sup> Salamina bəts puebloye tbojánashjango ora, tbojanontšé Bəngbe Bətsabe palabrama entšanga jábuayenama, chentša judiəngbe enefjuana yebnənguenache. Juan Marcos mo chatbe uajabuachanacá ibojtsebmna.

<sup>6</sup> Njəts chə luarəjana tmojánachnəngo orna, Pafos puebloye tmojánashjajna; y chentše tmojáninyəna canye judío tatšəmbuá, Barjesús ca uabainá. Cha yojánichamo cha canjamna canye Bəngbe Bətsabe juabna oyebuambnayá ca, pero ndoñe chca yonjamna.

<sup>7</sup> Chə tatšəmbuá inatrabájaye chə Chipre luaroca mandadbiama, Sergio Paulo ca uabainá; y chə mandadna corente osertaná inamna. Cha yojtseboše Bəngbe Bətsabe palabra jouenama; as tojanmandá Bernabé y Saulo jobiatšana.

<sup>8</sup> Pero chə tatšəmbuá, grieguiñe Elimas ca uabainá, Saulo y Bernabebe contra yojtsemna y yojtsama chə mandado ndoñe

chaondëtsošbuáchema, ntšamo chë Jesucrístbeñe ošbuáchiyënga imojanošbuachecá.

<sup>9</sup> Chora, Saulo chë Pablo ca imojanábobuatmabe ainaniñe chë Uámana Espíritu corente yojtsemándaye; as chë tatšëmbuábioye yejuana ibojonýinýiye,

<sup>10</sup> y tbojanियana: “¡Abuambnayá, puerte bacna entšá, Satanasbe uaquiñá y tšabe soyënga ndoñe chaondëtsebínýnama trabajayá! Bëngbe Utabnabe nýetsca ndegombre soyëngama aca contsichamo uayátsenaye soyënga yojtsemna ca.

<sup>11</sup> Mora, Bëngbe Bëtsá cmochanjacastíga, jtaná cochanjoquéda y baseftayté jinýama quecochato-benaye ca.”

Cachora Elimas mo ibetiñcá yojoquéda y ibojt-songuaye canya buacuetëntšnana chabuánatsama, jtaná yojtsemna causa.

<sup>12</sup> Chë mandado chca tojáninýe ora, Jesucrístbeñe yojtsošbuaché y yojenjnaná Bëngbe Utabnabe soyënga tojanatsjínýama.

### *Pablo y Bernabé Antioquía pueblentse, Pisidia luaroca*

<sup>13</sup> Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona.

<sup>14</sup> Pergentšana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judiëngbe enefjuana yebnoye tbojánamashëngo y tbojanótbema.

<sup>15</sup> Moisesbe leyíñe y Bëngbe Bëtsabe juabna oyebuambnayëngbe uabemana librëšangañe

tmojanalía orna, chë enefjuana yebnentša mándayënga canya tmojanichmó chënga jáuyanama: —Israeloquënga, bënga fsëntseboše entsanga chašmabuayená, nderado ndayá jayanama šmojtsebomněse, muentša entsanga añemo chamotsebomnama ca.

<sup>16</sup> As Pablo tojantsá y entsángbioye cucuátšeca tojánefjatsëmbo iytëca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga.

<sup>17</sup> Israeloca entsanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnama, chënga Egiptoca inye luarocana ashjajnëngcá imojoyena ora. Y chentsana, cachabe obenánaca chë luarocana chënga tojésanëbuacana.

<sup>18</sup> Canta bnëtsana uata nyetsá, Bëngbe Bëtsá entsanga ndoyena luaroca chënga yojanëuantana,

<sup>19</sup> y cha tojanma chë Canaán luaroca canysëftentša entsanga chamopochocama y bëngbe bëts taitanga chëngbe fshantsënga nduiñënga tojánabiama.

<sup>20</sup> Chë tempo, chë Bëngbe Bëtsá Abrahámbioye quem fshantse jatšetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentsana, Bëngbe Bëtsá chëngbiama mandadënga tojánabiama, Bëngbe Bëtsabe juabna oyebuambnayá Samuel chëngbe mandayá yojëftsemna tempëntscuana.

21 Chentšana, Israeloquënga Samuel tmojanimpadá canÿe rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentsá.

22 Más chcoyna, Bëngbe Bëtsá Saúlbioye chë mándayentšana tbojtsanjuaná, y chentšana Davídbioye mo chëngbe reycá tbojánbema. Chabiamá Bëngbe Bëtsá tojánayana: ‘Atše sëndétatšëmbo, David, Isaíbe uaquiñá, canÿe tšabe entšá yomnama y chama atše sëndoyejuá, y cha sempre endëprontana ntšamo atše stsebošcá jtsamama ca.’

23 Davídbentšana canÿe entšá Jesús enjamna, nda Bëngbe Bëtsá tbojanichmó Israeloca entšanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá.

24 Cabá Jesús ndëbocna ora, Juan nÿetsca Israeloquënga tojanabuayená bacna soyënga amana chamotsajbanama y chamuenábayama.

25 Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átšbentšana echanjabo canÿa, y atše mercedo taitatobuajoñe ni mo jotsejbiyama chabe she-cochëtjonëshentša corriëja jajafjonama ca.’

26 “Chcase morna, Abrahámbentšana entšanga y ndoñe judiënga Bëngbe Bëtsá adórayënga; bëngbiamá entsemna quem buayenana soye, chë Bëngbe Bëtsá entšanga játsebacana.

27 Masque cada ochnayté, Bëngbe Bëtsabe juabna oyebuambnayëngbe uabemana palabra



monjanalía chëngbe enefjuana yebnentše, Jerusalemntša oyenënga y chentša mándayënga ndoñe quenjátanësertana nda Jesús bétsemnama, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá.

<sup>28</sup> Y masque ndocna bacna soye tmonjáninÿena Jesús jóbanama chabotsemnama, Pilato tmojanimpadá chaomandá chábioye jóbama.

<sup>29</sup> Chentšana, lempe ntšamo Bëngbe Bëtsabe uabemana palabrenguiñe iuayancá Jesús seftaca tojanochnëngo ora, chabe ústonënga chë cruzocana tmojtanëštjango y tmojanatbontsá.

<sup>30</sup> Pero Bëngbe Bëtsá tojanma Jesús cháuatayenama.

<sup>31</sup> Chë Galileocana Jerusalemoye cháftaca tmojánanga, baytentscuana Jesús yojánebübuacana; y morna, lempe ntšamo Jesusbiama tmojaninÿcá, chënga entsángbeñe montsoyebuambná.

<sup>32</sup> “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá,

<sup>33</sup> cha tonjama, bënga chë chëngbe entsanguentsëngbiama, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrenguiñe, segundo salmentše mëntšá tojanábema, ntšamo Bëngbe Bëtsá Jesús bioye tbojanianama:

Aca atšbe uaquiñá condmëna.

Mënté entsanga sënjinÿanÿé aca atšbe Uaquiñá comnama ca.

<sup>34</sup> Y tempo Bëngbe Bëtsá chabe uabemana palabrënguiñe tojaninÿanÿé cachá jamama Jesús cháuatayenama y ndoñe cachiñe chaondóbanama, mëntsá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá, tšëngaftanga cbochanjátšataye ca.

<sup>35</sup> Inÿoca Bëngbe Bëtsabe uabemana palabrënguiñe, Salmos librëša uabiamnayá, mëntsá tojanábema ntšamo Jesús Bëngbe Bëtsábioye tbojanianama:

Aca ndoñe quecochatsleséncia atšbe cuerpo, chë acbe Uámana oservenabe cuerpo chaotsopochocama ca.

<sup>36</sup> David, chabe tempo imojoyenëngbiana tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbioye tmojanëtabuantsá luarentše, y chabe cuerpo tojanopochocá.

<sup>37</sup> Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atše sëntseboše tšëngaftanga quem soye chašmotsetátšëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbeyeca, nÿetsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyiñe iuayancá tmojanmama, chënga ndoñe tmonjanobená chca perdonánënga jtsemnama; nÿe Jesúsbeñe jtsošbuáchiyëse chënga perdonánënga jtsemnana.

<sup>40</sup> Cuedado šmochtsebomna, ntšamo Běngbe Bětsabe juabna oyebuambnayēnga tmojanayancá, tšēngaftangaftaca ndoñe chaondochnēnguama.

<sup>41</sup> Běngbe Bětsá mēntsá tojánayana:

Smochjouena. Tšēngaftanga chē ntšamo atše ti-jayancá šmojtsábotenga,

ojnanánēnga šmochántsemna y šmochanjóbana.

Tšēngaftanga cabá vida šmobomnēntscuana, atše bēts soyēnga chanjēftsema,

y masque ndánaca chē soyēngama chacmojt-sacúnta,

tšēngaftanga chiñe ndoñe quešmochatošbuáchiye ca” –Pablo tojanoyebuambá.

<sup>42</sup> Pablo y chabe enutēnga chē judiēngbe enefjuana yebnentsana tmojēftsanbocna ora, chē ndoñe judiēnga chēngbioye tmojanaimpadá, chē inye ochnaytescama chē soyēngama más jábuayenama.

<sup>43</sup> Chentše chē te jénefnama tempo tojanopochocá ora, ba judiēnga y ndoñe judiēnga, chē Běngbe Bětsábioye imojánadorana mo chē judiēngcá, Pablo y Bernabé tmojaněseto. Y chatna chēnga tmojanabuayená nyets tempo chamotsejuabnama, Běngbe Bětsá chēngbiamama tšabe soyēnga yojtsamama.

<sup>44</sup> Chē inye semana, chē ochnaytena, nya mo nyetsca chē pueblentše oyenēnga tmojanobeconá Běngbe Bětsabe palabra jouenama.

<sup>45</sup> Pero ba entšanga choye jouenama tmojánama chē judiēnga tmojáninye ora, tmojanotjayaná, ba entšanga Pablo imojtseyeunanama; as

chënga tmojanontsé mocá ichámuana ndayá cha yojtsóyebuambnama, y chábioye oyenguayana.

<sup>46</sup> As Pablo y Bernabé más añémoca mëntsá tbojánayana: “Endánëyta, natsana tsëngaftanga, chë judiënga šmomnënga, Bëngbe Bëtsabe palabra jshabuayenana. Pero tsëngaftangna chë palabra šmontsaboté, y šmontsejuabná tsëngaftangbiana ndoñe tsabá yontsemna chë nyetsca tescama yomna tsabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama.

<sup>47</sup> Er Bëngbe Bëtsá chama šjanichamó, mëntsá jauyanëse:

Aca tcbonjuábuayana chë ndoñe judiëngbioye tsabe noticiënga jábuayenama, chaósertama.

Y chca, aca chëngbiana cochántsemna mo canye binñayacá.

Chca, ácbeyeca nyets luarënguenache entsanga atše chanjatsebacá ca.”

<sup>48</sup> Chë ndoñe judiënga chca tmojanuena ora, puerte imojtsóyejuaye y tmojanontsé mëntsá ichámuana: “Bëngbe Utabnabe palabra tsabá bëngbiana entsemna ca.” Y chora, chë nyetsca tescama yomna tsabe vida jtsebomnana Bëngbe Bëtsá tempo tojánabacacanga, tmojanontsé Jesúsbeñe jtsošbuáchiyana.

<sup>49</sup> Y chca, nyets chë luariñe más entsanga Bëngbe Bëtsabe palabra imojtsuenana.

<sup>50</sup> Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentsa uámana taitángaftaca,

jamama Pablo y Bernabé chabosufrima y chë luarentšana jtëbuacnama.

<sup>51</sup> As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio pueblöye tbojtsanoñe.

<sup>52</sup> Pero Jesucristbeñe ošbuáchiyënga corente oyejuayënga imojtsemna, y chë Uámana Espiritu chëngbe ainaniñe corente yojtsemádaye.

## 14

### *Pablo y Bernabé Iconio pueblöca*

<sup>1</sup> Iconioca, Pablo y Bernabé cánÿiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chiyeca, ba judiënga y ndoñe judiënga Jesucristbeñe imojtsošbuaché.

<sup>2</sup> Pero chë judiënga Jesucristbeñe ndošbuáchiyënga, chë ndoñe judiëngbioye tmojanayënjaná, Pablo y Bernabebiana podesca chamotsejuabnama.

<sup>3</sup> Chiyeca, Pablo y Bernabé bayté chentše tbojanototoná y ndauatjcá Bëngbe Utabná Jesucristbiana tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninÿanÿé, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nÿetscanga iuababuánÿeshanana.

<sup>4</sup> Pero nÿetsca chë pueblentša entšanga ndoñe cachcá imontsejuabnaye; ínÿenga chë judiëngaftaca imojtsemna, y ínÿengna chë Jesucristbe ichmonátaftaca.

<sup>5</sup> As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtsbéngaca jtsëbáyama.

<sup>6</sup> Pero Pablo y Bernabé chama tbojántatšëmbona orna, tbojtsanëchañe Listra y Derbe puebloye, Licaonia luaroca, y choca chábuañe luarëngoye;

<sup>7</sup> y chë luarënguenáchnaca, chata Jesucristbe tšabe noticiënga entšanga tmojanabuayená.

*Listra puebloca, ndëtsbéngaca Pablo tmojtsanatëchënganja jtsóbama*

<sup>8</sup> Listra puebloca inamna canye boyabása jama ndobená. Ndocna te yondobena jana, chca cosheto inónyña causa. Chë boyabásana yojtsetbema

<sup>9</sup> ouenana ntšamo Pablo yojtsichamcá. Y Pablo chábioye tbojanonýinýe ora, tojántatšëmbona chë šocá tša yojtsošbuáchema, shnaná jtsatsmënama;

<sup>10</sup> as Pablo, juayebuáchenëse tbojaniyana: “¡Motsbaná y acbe shecuatšëngaca tšabá motsaca!”

Chora chë boyabása, canye jontsënjëse tojantsá y yojóntša anana.

<sup>11</sup> As chë entšanga, ndayá Pablo tojanmcá tmojáninýe ora, tmojanontšë uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátsuma mo entšatcá ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inýe diosëngbiama oyebuambnayacá. Páblëbioye chca imojtsábobuatma, er cha más yotsoyebuambná.

13 Zeusbiama chentša bachna inabomna canÿe yebna chë pueblo chaboca, chábioye jadórama. Chë bachna, uacnënga tojanënatse y uantšefjushangá tojanëyamba chë Zeus jadórama yebnentša amashjuanoye; y cha y chë entsanga imojtseboše chë uacnënga jashebuáyana y jajuinÿiyana, chca, chë ichmonátbioye jadórama.

14 Bernabé y Pablo chama tbojántatsëmbona ora, entsáyá tbojtsanenántšajatanëca, entsanga jinÿanÿiyama, ntšamo chënga imojtsamcá chata tondaye yonjógusetama, y tbojëftsannotjajo entsangbe tsëntsajana y mëntšá ibojtsaychembumbuana:

15 “Baconga y batanga, ¿ndáyeca chca šmojtsama ca? Bëndata cach tšëngaftangcá entsata fsëndmëna. Muentše bëndata fsëntsemna nÿe jábuayenama Bëngbe Utabná Jesucristbe tšabe noticiënga, tšëngaftanga chë quem ndoserverna soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nÿetsca béjayënga y lempe ntšamo chenache yobinÿncá.

16 Masque tempo, Bëngbe Bëtsá entsanga tojanalesenciá cada ona chaoma ntšamo tojtsejuabnacá, tšabá cachëngbiama yojtšémnayeca,

17 Bëngbe Bëtsá ndocna te ntjájbanana tšëngaftanga jtsinÿanÿnayana, cachá tojama tšabe soyëngaca, mocna Bëtsá cha yomnana. Cha endama tšëngaftangbiama chauaftema y chë matënga botamana chaoshájonama, y becá saná cmondatsatná; y cha endama tšëngaftangbe ainaniñe corente oyejuayana

chašmotsebomnama ca” –chata tbojánayana.

18 Masque chë soyënga tbojánayana, nÿe batsatema más bën y ya ndoñe matbënjanobenata chë entsanga jtsëuyanana uacnënga jashebuáyama, chca, chátbioye jadórama.

19 Chca ora, básefta judiënga tmojánashajna Pisidioca, Antioquíocana y Iconiocana, y chentša entsángbioye tmojanayënjaná, Jesucristbe ichmonatbe contra chamotsemnama. Chcasna, Pablo ndëtsbéngaca imojtsénanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca.

20 Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebløye tojtesaná; y chë yëfsana, Bernabéftaca Derbe puebløye tojána.

21 Derbe puebløca Jesucristbe tšabe noticiënga entsanga tmojanabuayená, y chca, entsanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiøye.

22 Chë luarënguenache chata ibojánana chë Jesucristbe ustonëngbioye atañémuaye, cada te chábeñe más chamotsošbuáchema. Y entsángbioye tmojanéyana: “Bëngbe Bëtsabe amëndayøye jamashënguanma, bënga šontsamna quem luarentše bëtscá jëftsepadecénana ca.”

23 Nÿetsca ošbuachiyëngcá enefjuanenache, bëtšëjemëngcá mándayënga tmojanabacacá, chentša Jesucristbeñe ošbuáchiyënguentšana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye



ntjascá imojtsemna y cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšiñe chamotsemnama, ndábeñe chënga imojtsošbuaché.

*Pablo y Bernabé, Siroca Antioquía puebloye tbojtanata*

<sup>24</sup> Pisidia luarëjana tbojánachnëngo ora, Panfilia luaroye tbojánashjango.

<sup>25</sup> Perge pueblentše Jesucristbe tšabe noticiënga entšángbiyoye tmojanabuayená, y chentšana Atalia puebloye tbojánata.

<sup>26</sup> Chentšana, Bernabé y Pablo, bejaycá tbojtanata Siroca Antioquía puebloye. Chentša entšanga Bëngbe Bëtsá tmojanimpadá chata chabe cucuatšiñe chabotsemnama, chë trabajuiñe chaotsanÿenama; y chorna, chë trabajo ya tbojanpochocá.

<sup>27</sup> Choye tbojtanashjango ora, nÿetsca Jesucristbeñe ošbuachiyëngbiyoye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninÿanÿé, chë ndoñe judiëngnaca chamotsobename Jesucristbeñe jtsošbuáchiyama.

<sup>28</sup> Y Pablo y Bernabé bayté chentše tbojanotoná Jesucristbeñe ošbuáchiyëngaftaca.

## 15

*Ichmónënga y bëtsëjemëngcá mándayënga Jerusalemoca tmojánenefna jencuéntama*

<sup>1</sup> Chë tempo, báseftanga Judeocana áshjajnënga tmojanontšé, Antioquía pueblentše, chentša Jesucristbeñe ošbuáchiyënga mëntsá jabuátambana:

“Base bobachtema chë más delicadentse ndoñe šmonjenotëtšese, ntšamo Moisesbe leyinë endayancá, ndoñe quenátopodena tšëngaftanga atsebácanënga jtsemnama ca.”

<sup>2</sup> Chíyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y ínÿenga Jerusalenoye chamotsama, choca chë Jesucristbe ichmónëngaftaca y chë chentse Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtšanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerta oyejuayënga imojtsemna.

<sup>4</sup> Pablo y chë ínÿenga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá.

<sup>5</sup> Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentse base bobachtema tëtšenënga jtsemnana, bënga judiëngcá; y tšëngaftanga

cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

<sup>6</sup> As, chë Jesucristbe ichmónënga y bëtsëjemëngcá mándayënga tmojánenefjna jencuéntama, chë ndoñe judiënga aíñe o ndoñe yonjánamnama chë más delicadentse base bobachtema tëtšenënga jtsemnama, ntšamo chë judiënga imojanamancá.

<sup>7</sup> Bën y bëtscá chënga tmojanencuentá chentšana, Pedro tojantsbaná y mëntšá tojanëyana: “Jesucristbeyeca catšátanga, tšëngaftanga šmondëtatšëmbo, ya bayté entsemna Bëngbe Bëtsá tšëngaftangbentšana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema.

<sup>8</sup> Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninýanjé, chë ndoñe judiëngnaca imnobena chabe entšanga jtsemnama, chábeñe tmojtsošbuáchese, chë Uámana Espíritu chëngbe ainaniñe cháúamashënguama cha tojanma ora, ntšamo cha bëngbe ainaniñe tojanmcá.

<sup>9</sup> Y chca, Bëngbe Bëtsabiamana nyetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnama y ainaniñe tšabe juabna chamotsebomnama, Bëngbe Bëtsabe palabriñe jtsošbuáchiyëse.

<sup>10</sup> Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplinama, mo nda

ínÿabioye uauta uasmanésha cuaftsasmēmñacá; pero lempe chē mandēnga, ni bēngbe bēts taitanga ni bēnga ntsobenana jocūmpliana.

11 Y chca ndoñe chaondētsemna. Bēnga mondošbuaché bēnga atsebácanēnga imomnama Bēngbe Utabná Jesús chabe tšabe juabna šojaninÿanÿeyeca, y Bēngbe Bētsá cachcá chē ndoñe judiēngnaca tojatsebacá ca” –cha tojanéyana.

12 Chorna, chentše imojtsemna entšanga nÿetscanga iytēca tmojanobiana, y tmojanuena Bernabé y Pablo jtsóyebuambnayana, chē bēts soyēngama, Bēngbe Bētsabe obenana entšanga jinÿanÿiyama, y inÿe soyēngama chabe obenánaca, ntšamo chē ndoñe judiēngbeñe Bēngbe Bētsá chátaftaca tojanmcá.

13 Chē útata jóyebuambayama tbojanpochocá ora, Santiago mēntšá tojánayana: “Jesucrístbeyeca catsátanga, šmochjouena:

14 Simón šonjabuayená ntšamo Bēngbe Bētsá natsana tojaninÿanÿé, chē ndoñe judiēngnaca cha iuanÿenama, y chíyeca cha chēnguentšana banga tojubuáyana chabe entšanga chamotsemnama.

15 Ntšamo Simón šonjabuayenacá entsemna cachcá ntšamo chē Bēngbe Bētsabe juabna oyebuambnayēnga tmojanayancá, ntšamo yochjanopásama y ntšamo Bēngbe Bētsabe uabemana palabreñguiñe endayancá, mēntšá:

16 Chentšana atše chanjésabo

y chē Rey Davidbe pamíllanga cachiñe uámanēnga chantabiama;

mo nda canÿe uáshajayena yebna tojētsjebcá, atše,  
Davidbe pamíllanga cachiñe uámanēnga

chantabiama;

17 chca, chë inye entsanga chamonguango ndayá jamana atše, tšëngaftangbe Utabná, más chašmotsábuatmama, nýetsca ndoñe judiënga, chë atšbe entsanga chamotsemnama atše tijábacacanga.

18 Chca atše, tšëngaftangbe Utabná sentsichamo, nda ya bayté entsemna tonjanma entsanga chë soyënga chamotsetatšëmbuama ca –chiñe endayana.”

19 Chentsana Santiago mëntšá tojanéyana: “Chíyeca atše sëntsejuabná, bënga ndoñe šontsamna chë ndoñe judiëngbiana jamana más totcá chaotsemnama Jesucristo jtsëstonama.

20 Chamna, šontsamna chënga juabuábiamana y jáuyanana ndoñe chamondëtsesá, sananga chë ndaye soyënga entsanga tmojuabná diosënga yomna ca jadórama tmojuiyëbana; bacna soyënga shembásenga o boyabásengaftaca ndoñe chamondëtsama y ndoñe chamondëtsesá tšešana bayëngbe mëntšena, y buiñe cach ndoñe ca.

21 Er chë natsana tempënga orscana, nýetsca pueblënguenache mondmëna chë Moisés tojëftsanayana soyënga entšángbioye abuayiynayënga; y chabe leyënga, nýetsca ochnayté mondbetsalíaye chë bënga judiëngbe enefjuana yebnënguenache ca” –cha tojanéyana

*Chë Jerusalenoca ichmónënga y bëtsëjemëngcá mándayënga canye tsbuanácha tmojanichmó chë ndoñe judiëngbiana*

22 Chentsana, chë Jesucristbe ichmónënga y bëtsëjemëngcá mándayënga, nýetsca chë

Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše.

<sup>23</sup> Y chëngaftaca canye tsbuanácha tmojanichmó, y chiñe mëntšá yojétsayana:

Bënga chë Jesucristbe ichmónënga y chë bëtsëjemëngcá mándayënga, cach tsëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tsëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

<sup>24</sup> Bënga fsëntsetatšëmbo bëngbentsana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tsëngaftanga ndoñe šmontsetátšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnama.

<sup>25</sup> Chcasna, bënga fsënjenoyeuná y šonjúnyñana tšabá yojtsemna báseftanga bënguentšana jaba-cacayana tsëngaftangbioye jontješiyama chamot-sama, y Pablo y Bernabé, chë Jesucristbeyeca bëngbe bonshana catšátataftaca, choye chamot-sama.

<sup>26</sup> Chë útatna ba soye tbojotsbocá vida jáshbiana, Bëngbe Utabná Jesucristbiana oservëniñe.

<sup>27</sup> Chátaftaca Judas y Silas fsënjichamó; y chatna cach tsëngaftangtaftaca bochanjóyebuambaye ntšamo

quem tsbuanáchañe yojtsábemanama.

28 Chë Uámana Espíritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguñe chašmotsocumplínama. Nýe quem uámana soyënga chiñe aíñe cmontsamna jtsobedecénana:

29 Ndoñe šmattsesaye mëntšena, chë ndaye soyënga entšanga tmojuabná diosënga yomna ca jadórama tmojóba bayëngbiana; ndoñe šmatjofšiye buiñe, ni šmatjase tsešana bayëngbe mëntšena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca —  
chiñe yojétsayana.

30 Chcasna, chë quem Jerusalenocana ichmónënga tmojésanodiošoftanentšana, Antioquía puebloye tmojána; y chocna, nýetsca chë Jesucristbeñe ošbuachiyëngbiye tmojanëbuaja y chë tsbuanácha tmojanayentšbuaché

31 Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye.

32 Judas y Silas Bëngbe Bëtsabe juabna oye-buambnayata ibnamna; as, chátnaca chë chentša Jesucristbeñe ošbuachiyëngbiye ba soyënga tmojanéyana, chënga añemo chamotsatsbomnama y Jesucristbeñe corente chamotsošbuáchema.

33 Chentšana baseftaytese, chentša Jesucristbeñe ošbuáchiyënga chëngbiye tmojtana-

diošoftá, chë ndëmuanÿenga tmojanichamóngbioye jtama.

<sup>34</sup> Pero Sílasna tšabá ibojtsinÿana cachentše más jëftsajëtanama.

<sup>35</sup> Pablo y Bernabé baseftayshinÿe Antioquía pueblentše tbojanototoná y ba ínÿengaftaca Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

*Pablo cachiñe inÿe luarëngoye tojána, Bëngbe Bëtsabe trabajo jamama*

<sup>36</sup> Chentšana baseftaytese, Pablo Bernabébioye tbojaniana: “Bëngbe Utabnabe palabra tbonjanabuayená luarëngoye bochjésa, chocha Jesucristbeñe ošbuáchiyënga jábuachama y jányama ntšamo imojtsemnama ca.”

<sup>37</sup> Bernabé yojtseboše, Juan chë Marcos ca uabobuatmábioye chátaftaca jëftsbetšama.

<sup>38</sup> Pero Páblëna ndoñe tšabá ibontsinÿana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana.

<sup>39</sup> Y chë palabrama tondaye tbonjanenóyeunata causna, Pablo y Bernabé cachcá tbojesanenonÿaye. Y chca, Bernabé, Marcos tbojëftsanbetše, y bejaycá Chipre luaroye tbojánata;

<sup>40</sup> y Páblëna, Silas tbojanábuayana jëftsbetšama. Chë Antioquía pueblentša Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë chabotsemnama, chatbe trabajuiñe chaotsanÿenama. Chentšana, Pablo Sílasestaca tbojánbocna y



41 Siria, Cilicia luarënguëjana tojánachnëngo entšanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchema.

## 16

### *Pablo Timotéobioye tbojáninýena*

1 Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaqiñá y chabe taitana griego entšá inamna.

2 Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná.

3 Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nýetsca judiënga imnatátšëmbo Timoteobe taitá griego inamnana.

4 Chë ibojtsachnëjuana pueblënguenache chata ibojtsana Jesucristbeñe ošbuachiyëngbioye abuayiynaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá.

5 Nýets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

*Pablo mo otjenayoquëcá canÿe Macedonioca entšábioye tbojáninÿe*

<sup>6</sup> Chë Uámana Espíritu, Pablo y Sílasbioye tojaninÿanÿé, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana.

<sup>7</sup> Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondëtsama.

<sup>8</sup> Misia luarëjana tmojánachnëngo ora, Troas luaroye chënga tmojána.

<sup>9</sup> Chë te ibeta, Pablo mo otjenayoquëcá tojáninÿe canÿe Macedonioca boyabása ibojtsebiatsana y mëntšá ibojtseimpadana: “Diosmanda Macedonioye mabo y šmabëjabuache ca.”

<sup>10</sup> Pablo chca tojáninÿe y cachora lempe tmonjanprontá Macedonioye jama. Atšnaca, chë quem soyënga uabiamnayá, chënga sënjétsatjëmbambnaye. Bënga fsënjëtsejuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entšanga jábuayenama.

*Pablo y Silas Filipos puebloca*

<sup>11</sup> As, Troasentšana bejaycá fsënjána Samotracia luaroye, y yëfsana Neápolis puebloye,

<sup>12</sup> y chentšana Filíposoye. Filipos enjamna canÿe uámana bëts pueblo Macedonioca y bëtscá romanënga oyeniñe. Chë luarentše baseftayté fsënjanoquedanga.

13 Canÿe ochnaytena, chë pueblentsana fsënjëftsanbocna y chë fshájaye tsachoye fsënjána. Fsënjanuena chentše canjamna canÿe luare Bëngbe Bëtsáftaca jencuéntama ca, y fsënjána janguanguama. Fsënjáninÿena ora, chentše fsënjantobiama y Bëngbe Bëtsabe palabra fsënjano yebuambá chentše tmojanójoto shembásengbiama.

14 Enjamna canÿe shembása, Lidia ca uabainá, Tiatira pueblocá, y cha enjamna uámana uabuángana uafjatsenga entšayá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema.

15 Cha y chabe yebnentše oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átšbentše chašmoquedama ca.”

Y šonjanëtarié bënga chentše joquédama.

16 Canÿe te, chë Bëngbe Bëtsáftaca encuéntaye luaroye fsënjétsajna orna, šonjanëbiatše canÿe tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáše yojanmalísiaye soyëngama.

17 Chë tobiáše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservénënga y tšëngaftanga

cmontsabuaiyiná ntšamo Běngbe Bětsá yobena tšěngaftanga játsebacama ca!”

18 Y bayté chca enjanchembumbuana; chě causa, Pablo bonjětsetana y cabana, tonjanobuértana y chě bacna bayějbioye měntsá tbonjaniyana: “¡Jesucristbe obenánaca y cha jótšěmboněse, cbontsemánda chě tobiášbentšana chacuaisebocnama ca!”

Y cachora chě bacna bayėja chě tobiášbentšana tojésanbocna.

19 Pero, chě bayějbe juabna chábentšana tojésanbocnama y chěngbiamama más crocénana jabe-mama chora chě tobiáše ndoñe yontsobenama, chě tobiáše nduiñěnga tmojáninýe ora, Pablo y Sílasbioye tmojánishěche y tmojtsanasjojoye plazoye, mandayěngbioye.

20 Chě mandayěngbioye tmojaněnatse ora, chěnga měntsá imojtsichamo: “Quem boyabásata judío entšata bondmēna, y muatbe causa běngbe pueblentša entšanga montsenbouenana,

21 y bontsabuatambá soyěnga jamama ntšamo chě judiěnga imuamancá y běngbe leyěnguiñe chě soyěnga jamama ndoñe quenátslesenciana. Běnga ndoñe quešnátamna ni jouenana, ni jamana chě soyěnga, romaněnga bétsemnayeca ca” –chěnga imojtsichamo.

22 Chora chě entšanga tmojanontsé uayebuáchana; as, chě mándayěnga tmojanaměnda chata entšayá jtsětsejquēcana y niñěfjěngaca jtsachebuánganjana.

23 Jabuache tmojanachebuánganjentšana, cárceloye tmojanautame y chě utámeněnga shanyá tmojanmandá yejuana chaotsabuajěnyama.

24 Chca tmojanmandá ora, chë utamianá chata tojanënatse chë más tsoye utámenoye y shecuatšentsana tsbuanëšini tojanatsebuá.

25 Pero tsëntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana.

26 Ndeolpe, corente jabuache yojsëbánjua y chë utámena yebna fshantsocana yojsábonjnaye. Cachora, nýetsca chë utámenentša bëšašangá tojantëfjo y nýetsca utámenënga chë cadenëjuangá yojsayentšjafjona.

27 Pero chë utámenënga shanjá tojanofšená y chë utámenentša bëšašangá yojsatëfjnama tojáninýe ora, cha tojanjuabó nýetsca utámenënga tmojtsanacheta ca; chë causa, chabe espadëja yojenosëngbotëntšena jtsenóitanama.

28 Pero Pablo tbojánbochembo: —¡Acbe cuerpo ndocá matenábomana; nýetscanga camuentše fsëndëtsomñe ca!

29 Asna, chë utámenentša shanjá canýe uajuinýanësha tojanëyá y chë utámenoye ochamanana tojánamashëngo y auatja causa ngmëmnyáy Pablo y Sílasbe shecuatšentše yojoshëntsamentšiy.

30 Chentšana tojtanëbuacna y tojanëyana: — Señorata, ¿ndayá šojtsemna jamama atše atsbočaná jtsemnama ca?

31 Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

32 Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená.

33 Cach ora chë ibeta, chë utamianá chata tojanënatse chë lisianënguiñe jetsajabiama. Chentšana, cha y chabe pamíllanga tmojánenabaye.

34 Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtšošbuáchema.

35 Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama.

36 Chë utamianá Páblëbioye tbojaniyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

37 Pero Pablo chë soldadënga tojanëyana: — Bëndátnaca fsëndmëna mo Romoca onýnanatcá derecho bomnata y šonjáchebuanganja entšangbe delante, bacna soyënga aíñe o ndoñe tatifjamama cabá ndinýanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

38 Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja.

<sup>39</sup> Chcasna, cach mándayënga tmojána chata perdón jatétejañama; chentšana tmojtanebuacna y tmojanéyana: “Diosmanda, muentšana inye luaroye motsoñata ca.”

<sup>40</sup> As chata chë utámenentsana tbojëftsanbocna y Lídiëbe yebnoye tbojëftsanata. Chentšana, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata inýoye tbojtsanoñe.

## 17

### *Tesalónica puebloca, Pablo y Silasbioye ndoñe tšabá tmonjanëbuaja*

<sup>1</sup> Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica ca uabáinoye tbojánashjango. Chentše, chë judiënga canýe yebna innabomna chënga jénefnama.

<sup>2</sup> Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrënguñe iuayana soyëngaca,

<sup>3</sup> chënga yojanabuayiyná y ndegombre yojaninýanýná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiama atše cbontsabuayiyná ca.”

<sup>4</sup> Judiënguentsana báseftanga chiñe imo- jtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá

adórayënga, Jesucristbeñe imojtsošbuáchiye y ba uámana shembásengnaca.

<sup>5</sup> Pero chë judiënga ndošbuáchiyënga chca tmojáninÿe ora, puerte envidia imojtsebomna. Asna, chënga tmojánachembo banga, tondaye amënga y bacna entšanga, y chënga tmojanenu-taná jamama nÿetsca chë pueblentša entšanga chamotsenbouéнанama; y canÿe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšinë jabáshejuanama.

<sup>6</sup> Pero chentše ndocná tmonjáninÿena; as chë entšanga Jasón imojtsesjojye y chentša mándayënga imojétsemnoye tmojanánatse y Jesucristbeñe inÿe ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanÿata ibojtsama nÿetsca luarentša entšanga chamuenbouéнанama, quem luaróynaca tbojabo,

<sup>7</sup> y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguiñe ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nÿetscángbeñe yojtsemánda ca!” —chënga imojtsáyebuache.

<sup>8</sup> Chë entšanga y chë pueblentša mándayënga chca tmojanuena ora, corente imojenbouéнанa.

<sup>9</sup> Pero Jasón y chë ínÿenga, cháftaca imojtsemnënga, crocénana tmojtanjajó, y as tmojtan-abáshejuana.

*Pablo y Silas Berea Puebloa*



<sup>10</sup> Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bêts puebloye chabuétsebocnama. Y chata choye tbojánashjango ora, chë judiëngbe enefjuana luaroye tbojánata.

<sup>11</sup> Chentša judiënga imojamna más tšabe ainana bomnënga chë Tesalonicoca judiëngbiamá; chcasna, oyejuayënga chë buayenana soye Jesucristbiamá tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsësnacá aíñe o ndoñe ndegombre yojtsemnama.

<sup>12</sup> Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca.

<sup>13</sup> Pero, Pablo Bereoca chë Bëngbe Bëtsabe buayenana soyama entšanga yojsabuayiynama chë Tesalonicoca judiënga tmojántatšëmbona ora, chënga choye tmojána y tmojanma chentša entšanga chamuenbouénanama.

<sup>14</sup> Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y bėjaye tsachoye chaotsoñama; chëntscuana, Silas y Timoteo Bereoca tbojanoquedá.

<sup>15</sup> Pablo tmojantjëmbambá entšangna, Atenas ca uabaina bêts pueblóntscóñe cháftaca tmojána. Chentšana, Pablo chënga tojanabuayená chamuaishhéconama Silas y Timoteo jaúnayama betscó jtsayana, Pábloftaca jateninýenama.

*Pablo Atenas puebloca*

<sup>16</sup> Pablo Atenas bêts puebloca Silas y Timoteo yojtsëbatmanëntscuana, puerte tbojanongmé, er cha tojáninÿe chentša entsanga imojtsadorana bëtscá cachëngbe pormana soyënga, ndayama chënga imojanjuabná diosënga yojamna ca.

<sup>17</sup> Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanÿenga chentše imojanashjuanëngaftácnaca.

<sup>18</sup> Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entsangbe diosëngbiana muentše entsabóyebuambnaye ca.”

Chënga chca imojtsichamo, er Páblëna Jesusbiana y chë obanënga jtayenama yojanoyebuambná.

<sup>19</sup> Asna, chentša entsanga cha tmojanánatse canÿe luaroye, entsanga jénefnama y oyebuambnayënga joyaunayama luare, Areópago ca uabáinoye. Chentše imojanamana uámanënga jénefnana, nderado ndabiana jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bétsayanana bënga quefstsobena jtsetatšëmbuama ca?

<sup>20</sup> Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bétsayanana.

<sup>21</sup> Er nÿetscanga Atenasentša oyenënga y inÿe

luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuéntayana.

<sup>22</sup> As Pablo tojantsá chëngbe tsëntsaca chë Areópago ca uabáinentse y tojánayana: — Atenasentša entsanga: ntšamo bominyë sënjajajcá, atše sëntsetatšëmbo tšëngaftanga ba diosënga puerte šmayaunana y šmadoránama.

<sup>23</sup> Atše sëndánrreparana tšëngaftangbe diosënga šmétsadorana luarënguenache y sënjinýena canýe altar y chentše mëntšá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuaiyná.

<sup>24</sup> “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entsangbe jebna yebnënguiñe,

<sup>25</sup> ni quebnatájaboto ndocná chabiama tondaye chaondëtsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nyetsca soyënga šnetsatšatnaye.

<sup>26</sup> “Cha nýe canýe boyabásabentšana nýets luarënguentša entsanga tojánabiama, nýets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entsanga chamuetsiyenama;

<sup>27</sup> chca, Bëngbe Bëtsá chamonguan-guama, masque chabiama ndoñe corente tmontsetátšëmbo, y chamuinýena y chábeñe chamotsošbuáchema; pero ndegombre, Bëngbe

Bëtsá bëngbentše cada cánÿabentsana ndoñe bënoca quenátsmëna.

<sup>28</sup> Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentša báseftanga bëts soyëngama uabiamnayëgnaca tmojanayancá: ‘Bënga nÿetscanga Bëngbe Bëtsabe básenga mondmëna ca’.

<sup>29</sup> Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entšangbe castelano, midio o chë ndëtsbeca pormana soyëngcá ca, er chë soyëngna nÿe ntšamo entšanga tmojuabocá y tmojtsobencá japórmana.

<sup>30</sup> Pero Bëngbe Bëtsá tojanjuabó ndoñe ntjatonÿayana chë entšangbe tempsca ndosertánana, y morna, nÿetsca luarënguentsa entšanga entsamënda, ndaye bacna soyënga tmojtsamama ngmënacá chamuenojuabó, chca amama chamotsajbaná y Bëngbe Bëtsabe benache chamuatishache ca.

<sup>31</sup> Bëngbe Bëtsá canÿe te tojuinÿaná, y chë tena, ndocnábioye ínÿabiana más tšabá ntjatonÿaycá, cha echanjayana entšanga tšabá o ndoñe tšabá tmonjamama; lempe chca cha echanjama canÿa cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinÿanyé, chë bocacaná Jesús cháuatayenama cachá tojánmayeca ca” —Pablo tojánayana.

<sup>32</sup> Chë obanënga mochtayenama ichámuana chë entšanga tmojanuena ora, báseftanga Pablo imo-

jtsáboyejuana, y ínÿengna mēntšá imojtsichamo: — Bēnga fsēntseboše chē contsichamo soyēnga más chcoye cachiñe jatuenama ca.

<sup>33</sup> As Pablo chēngbentšana tojésanbocna.

<sup>34</sup> Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chēnguentše imojamna Dionisio, canÿa chē Areopagoca tbiamanēnguentšá; canÿe shembásanaca, Dámaris ca uabaina, y ínÿenga.

## 18

### *Pablo Corinto puebloca*

<sup>1</sup> Chē soyēnga tojanochnēngüentšana, Pablo Aténasentšana Corinto bēts puebloye tojána.

<sup>2</sup> Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiēnga Romocana chamuáisebocanama choca bēts mandado Claudio tojanmandá causa. Pablo tojána chata jautsētsayama,

<sup>3</sup> y ntšamo chata jamama Páblēnaca jamama inatátšēmboyecna, chátaftaca yojtsoquedañe y cánÿiñe chēnga imnatrabájaye; chēnga imnatátšēmbo mo tambotemēngcá entšējuaca japórmana.

<sup>4</sup> Y nÿetsca ochnayté, Pablo yojanamana chentša judío entšangbe enefjuana yebnoye jana, Bēngbe Bētsabe soyēngama jóyebuambayama, y puerte yojtsentšena judiēnga y ndoñe judiēnga chamotsošbuáchema, ntšamo cha yojtsanētsētsnacá ndegombre bētsemnama.

<sup>5</sup> Silas y Timoteo Macedoniocana choye tbojánashjango ora, Pablo nyets tempo Bëngbe Bëtsabe soyëngama entšanga yojtsabuayiynaye y puerte tšabá chë judiënga yojaninyáná, Jesús ndegombre Bëngbe Bëtsabe Uámana Uabuayaná bétsemnama.

<sup>6</sup> Pero chë judiënga Páblëbe contra imojtsemna y tmojanontsé podesca chabiamá ichámuana. Asna, Pablo chabe uichëtjonyangá yojtsenántšasajaye, chënga jinýanýiyama chënga ndoñe tšabá tmonjáchjanguama, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

<sup>7</sup> Chorna, chë judiëngbe enefjuana yebnentšana tojëftsanbocna y canye boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena.

<sup>8</sup> Y Crispo, canye chë enefjuana yebnentša mandayá, Bëngbe Utabná Jesucristbeñe yojtsošbuáchiye y nyetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye.

<sup>9</sup> Canye ibeta, Bëngbe Bëtsá Páblëbioye mo canye otjenayoquëcá tbojaniyana: “Ndoñe matauatjana; nye cochtsana atšbe soyëngama oyebuambnaye y ndoñe iytëca cattsemana.

<sup>10</sup> Er atše ácaftaca sëntsemna y ndocná quecmochátsbojajo ntšámnaca jáborlama; atše bëtscá entšanga quem pueblentše sëndábamna ca.”

11 Chcasna, Pablo Corinentse canye uata y chñenguana shinye tojanototóná, Bëngbe Bëtsabe palabra entsanga abuatambaye.

12 Pero, Galión chë Acaya luarentsa mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojanánatse.

13 Chocna, chë mandado tmojaniana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

14 Pablo jóyebuambayama uatajanóntsa orna, Galión chë judiënga tojanéyana: —Quem entšá nderado ínÿabioye matbënjóba o ndayánaca chca matënjobuachjanguá, as cocayé atše matijótbema tšëngaftanga judiënga yejuana joyaunayama;

15 pero ntšamo šmotsichamcá entsemna nye buatëmbana soyëngama, nye tšëngaftanga šmëbuatma entsangbiana y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atše quem base soyëngama ndoñe quetsátsboše ngoberna jtsemnana ca.

16 As Galión tojanamëndá chë tribunal luarentsana chë judiënga jtëbuacnama.

17 Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

*Pablo Antioquioye tojtaná y chentšana cachiñe inye luarëngoye tojána, Bëngbe Bëtsabe trabajo jamama*

18 Pablo cabá bayté Corintentše tbojántotona. Chentšana, Jesucristbeñe ošbuachiyëngbentšana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea puebloca nÿets stjënashe yojtsenátshotje, Bëngbe Bëtsábioye jinÿinÿiyama canÿe soye tbojanšbuáchenama.

19 Efeso puebloye tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye.

20 Báseftanga Pablo tmojanimpadá inÿe baseftayté chentše chauesomñama, pero chana ndoñe tonjanoyauaná;

21 chentšana, chëngbentšana tojesanodiošoftá, mëntšá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna.

22 Cesarea puebloye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentšana Antioquiroye tojána.

23 Chentše baseftayté yojëftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

*Apolos, Efeso puebloca Bëngbe Bëtsabe soyëngama yojanabuayiná*

24 Cach tempo, Efesoye tojánashjango canÿe judío, Apolos ca uabainá, Alejandría bëts puebloca; cha puerte obená inamna jonguamiyama y



corente inatátsëmbo Bëngbe Bëtsabe uabemana palabrëngama.

<sup>25</sup> Bëtsá tojánatsjinÿe chë Bëngbe Utabná tojaninÿanÿé benachama; añémoca yojanoyebuambná y Jesusbe soyëngama botamana yojanabuatambá, masque cha nÿe ntšamo Juan entsanga tojánabuatambama y tojanëbáyama inatátsëmbo.

<sup>26</sup> Ndauatjá Apolos tojanontsé jóyebuambayama chë judiëngbe enefjuana yebnentse. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inÿinÿena benache bëtsemnama.

<sup>27</sup> Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañémó y choca Jesucristbeñe ošbuáchiyëngbiama canÿe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiama yojanjuabnáyeca, chënga Jesucristbeñe corente imojtsošbuáchiye.

<sup>28</sup> Entšangbe delante chë judiëngaftaca jabuachana imojánenatsëtsnaye y nÿetscanga tojaninÿanÿé, ntšamo ndoñe tšabá inamncá chë judiënga imnatatsëmbuama; y Bëngbe Bëtsabe uabemana palabrëngaca chënga tojaninÿanÿé, Jesús Bëngbe Bëtsabe Uámana Uabuayaná bëtsemnama.

## 19

*Pablo Efeso puebloca*

<sup>1</sup> Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanyëna, pero chëngna nÿe ntšamo Juan chë Ubayaná tojanabuatambacá imnatátšëmbo.

<sup>2</sup> Pablo chënga tojanatjá: —¿Uámana Espíritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiama ora ca?

Chora chënga tmojanjuá: —Ni mo queftsátstatšëmbo chë Uámana Espíritu yomnama ca.

<sup>3</sup> Y Pablo tojanëyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

<sup>4</sup> As Pablo tojanëyana: —Juan tojanëbaye chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábertšana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

<sup>5</sup> Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema.

<sup>6</sup> Pablo chëngbe bestšasiñe chabe cucuatšënga tojanajó ora, Uámana Espíritu chëngbe ainaniñe tojánamashëngo jtsemándayama; tmojanontšë inÿetšá biyangana, chënga tempo ndmabiyañe, y Bëngbe Bëtsabe juabna imojtsoyebuambná.

<sup>7</sup> Chentše imojtsemna bnëtsana uta entšanga.

<sup>8</sup> Unga shinÿëntscuana Pablo yojánaye chë judiëngbe enefjuana yebnoye y ndauatjácá

Jesucristbe soyëngama yojanoyebuambná; entšángaftaca imojánenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema.

<sup>9</sup> Pero ba nduauenanënga ndoñe imontsošbuaché y Bëngbe Utabná tojaninÿanyé Benachama entšángbeñe bacna soyënga imojtsichamo. Chcasna, Pablo chëngbentšana tojtsanojuánañe y nÿe chë Jesucristbeñe ošbuáchiyënga tojanëbuaja canÿe scueloye, canÿe entšá Tirano ca uabainabe yebnoye. Chentše cada te chë ouenanëngaftaca yojanoyebuambná,

<sup>10</sup> y chca yojánama uta uatëntscuana; y chca, nÿetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca.

<sup>11</sup> Y Bëngbe Bëtsá puerte bëts soyënga Pábloftaca yojtsama.

<sup>12</sup> Tša bëts soyënga tojanma; chíyeca, nÿetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšángbentšana jésebocanana.

<sup>13</sup> Pero básefta judiënga tsáshenañe bacna bayëjënga entšángbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntsá imojtsëtsëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentšana chašmuaisebocnama ca.”

14 Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá.

15 Pero canÿe, Escévëbe uaquiñënga chca tmojánayana orna, chë bacna bayëja mëntśá tojanéjua: “Atşe Jesús sënduábuatma y sëndëtatsëmbo nda Pablo yomnana; pero tśëngaftanga, ¿ndëmuanÿenga śmomna ca?”

16 As, cachora chë bacna bayëjbe juabna uambayá chëngbioye tojanontśënja y tśa añemo bomná bétsemnayeca chënga tojtsanayëñaná, jabuache jtsajantśetayëse; chë causa, chënga chë yebnentsana tmojtsanacheta enaśënga y lisiánënga.

17 Nÿetscanga Efesoca oyenënga, judiënga y ndoñe judiënga, chca tmojántatsëmbona y corente imojtsanauatja. Y chca, Bëngbe Utabná Jesús entsanga más imojtsatschuanaye.

18 Jesucristbeñe imojtsoşbuachiyënguentśana, banga imojánashjajuana y entsangbe delante imojtsecompşaye, tempo bacna soyënga tmojanmama;

19 banga, chë bocjuanana soyënga jamama imojanëntśënënga, chëngbe bocjuanana librëşangá tmojaniyëbo y entsanga imojtsantjeşna ora, chëşangá imojtsajuinÿiye. Tmojanjuabó ntsachetśá chë librëşangá betsámanama y tojanóbocna shachna bnëtsana uaranga crocénana nÿetśá.

20 Y chca, Bëngbe Utabnabe palabra más ba entsanga imojtsuenana y chiñe imojtsoşbuáchiye y Bëngbe Bëtsá chabe obenana entsángbeñe yo-

jtsinÿinÿnaye.

21 Chca tojanochnëngüentsana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentsana Romoye jama ca.

22 Asna, chabe uajabuachanënguentšana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentşe tbojanjétana.

### *Efesoca entsanga tmojánenbouenana*

23 Chë tempo, Efesoca entsanga corente tmojánenbouenana, chë Bëngbe Utabná yojtsinÿanÿná Benache imojtsisháchichanëngbe causa.

24 Chë entsanga chca tmojanma, er canÿe entsá mídioca soyënga pormayá, Demetrio ca uabainá, chënga tojanayëjaná chca jamama. Cha yojanama binche soyetémënga japórmana y chëtémënga yojáninÿna mo chë Efeso puebloquëngbe diosá Artemisa jadórama bëts yebncá. Demétrioftaca imoJantrabájangna bëts cá crocénana imoJanóJacañe chë soyetémënga eniñe.

25 Demetrio tojanëbuaja cháftaca imoJantrabáJanga y ínÿenga cach mídioca soyënga pórmayënga, y mëntsá tojanëyana: “Baconga, tšëngaftanga šmondétatšëmbo, bënga bëts cá crocénana jtsebonnamna quem trabajuentšana chca jopódiana.

26 Pero tšëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entsangbe

pormana soyënga ndoñe yontsemna jtsadoránana ca; y chca ba entsanga tojabuayená y chënga aïne montseyeunana. Chë soyna ndoñe nÿe muentše Efesentše chca quenátapasana; nÿets Asia luaríñnaca chca entsopasana.

<sup>27</sup> Resjo entsemna; chca causa, entsanga bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántsuchamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabuatma, nda Asientše y nÿets luaríñnaca mondadorana ca.”

<sup>28</sup> Chca tmojanuena ora, chca pórmayënga puerte tojánetëna y tmojanáyebuachena: “¡Efesoquëngbe Artemisa corente bëtsá endmëna ca!”

<sup>29</sup> Y chca, nÿetsca chë pueblentša entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntscoñe.

<sup>30</sup> Pablo tojánbošena choye jamashënguama chë entsángaftaca jóyebuambayama, pero Jesucrístbeñe ošbuáchiyënga ndoñe tmonjanlesenciá.

<sup>31</sup> Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

<sup>32</sup> Chëntscuana, entsanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsenbouenana causa, y banga chentše

imojtsemnënga ndoñe imontsetátšëmbo ndayama choye tmojanobéconama.

<sup>33</sup> Pero básefta judiënga, canÿe entsá, Alejandro ca uabainá, chë entsangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánefjatsëmbo cucuátšeca iytěca chamobiamama, er cha yojtseboše entsangbe delante chë judiënga jobuauyanama.

<sup>34</sup> Pero, Alejandro judío bemnama chë entsanga tmojántatsëmbona ora, nyetscanga tmojanáyebuachena uta horëntscuana, mëntšá: “¡Efesoquëngbe Artemisa corente bëtšá endmëna ca!”

<sup>35</sup> Chë pueblentša mándayëngbe uajabuachaná, entsanga iytěca jábiamama tojanobená ora, tojanëyana: “Efesoquënga, nyets luariñe endótatsëmbo, quem pueblentše oyenënga iuamna jtsinÿenana chë Artemisa jadórama bëtš yebna y chë cha jadórama celocana otsatšena ndëtšbé.

<sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá.

<sup>37</sup> Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiamana ndoñe podesca tmonjoyebuambá.

<sup>38</sup> Demetrio y cháftaca šmotrabájanga, nderado ndabiama ndaye demanda šmojtsebomñësna, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda.

<sup>39</sup> Y tšëngaftanga inÿe soye šmojtsenguasna, cmontsamna ntšamo bëngbe leyënguiñe yomandancá, nÿetsca quem pueblentše oyenëngaftaca jenóyeunayana.

<sup>40</sup> Ndayá mënté tojopasá causa, resjo entsemna bëngbiana chamuayana, ntšamo leyënguiñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” –cha tojanëyana.

<sup>41</sup> Y chca jayanëse, chë entsanga tojtanichamó.

## 20

### *Pablo, Macedonia y Grecia luaroye tojána*

<sup>1</sup> Chë enbouenanana tojanochnëgo ora, Pablo chë Jesucristbeñe ošbuachiyëngbioye tojanëbuaja jábuayenama, añemo chamotsatsbomnama; tojesanodiošoftá y Macedonioye tojëftsanbocna.

<sup>2</sup> Chë luarënguëjana cha tojánachnëgo Jesucristbeñe ošbuáchiyënga becá añemo atatšatnaye, ba chabe palabréngaca; chentšana, Grecia luaroye tojánashjango,

<sup>3</sup> y chentše unga ishinÿe tojanoquedá. Barquëshañe Sirioye játama Pablo yojtseprontana orna, tojántatšëmbona chë judiënga cha jtsóbama tmojanenóyeunama. Asna, tojanenojuabó jesshëconama, cach Macedonia luarëjana jésachnënguse.

<sup>4</sup> Pablo quem boyabásenga tmojantjëmbambá: Sópater, chë Bereocá, Pirrbe uaqiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata.



5 Chënga tmonjanonatsé y šonjanëbatma Troasoca.

6 Chë levadúraca ndëpormana tandëse saye fiestentsana, Filíposentsana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishêche, y chentše canÿe semana fsënjanouedanga.

### *Ntšamo tojanopasá Troas puebloca*

7 Chë inÿe semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cánÿiñe jasama; y Pablo entšanga enjétsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana.

8 Fsënjamna canÿe tsoye tsbanana tsañoca y chentše ba uajuinÿanëshangá enjanamna;

9 y canÿe bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocayana tbonjanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná.

10 As, Pablo tonjánastjango, chë bobóntsbioye tbonjanotsbuajó y tbonjanotsejcuá. Y chë entšanga tonjanéyana: “Ndoñe nÿetšá matauatjëngana; ainá cha entsatsmëna ca.”

11 Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entšángaftaca tonjanse y tontëtanontsé oyebuambnayanana, jabinÿnëntscuana. Chora Pablo chentšana tontsanoñe.

12 Y chë otsatsëna bobontsna ainá imojtsatánatseñe, y chama chë entsanga corente oyejuayënga imojtsemna.

*Pablo Troasentsana Mileto puebloye tojána*

13 Bëngna fsënjanonatsé y barquëshañe fsënjána Aso pueblóntscoñe, chentshana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana.

14 Asoca Pábloftaca fsëntaneninÿena ora, bëngaftaca barquëshañe cha tonjána Mitilene puebloye.

15 Chentshana fsënjéftsanbocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentshana fsënjána y yëfsana Mileto puebloye fsënjánashjajna.

16 Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndétsemnama. Chca tojánbošena er cha enjétseboše betesco Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

*Ntsamo Pablo chë Efesoca ošbuachiyëngbeñe bëtsëjemëngcá mándayënga tojanëyana*

17 Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana.

18 Chënga tmonjánashjajna ora, Pablo tonjanëyana: “Tšëngaftanga šmondétatšëmbo ntšamo atše quem Asia luaroye sënjabánashjango orscana tšëngaftangbeñe snetsamana.

19 Nyëts tempo Bëngbe Utabná sëndëserveda y cach atše uamaná ndoñe quetsatenobiamná.

Corente shëchbuiye tijëftsoperdé y ba soyënguiñe tijasufri, chë judiënga atse jóbama mondboše causa.

<sup>20</sup> Y lempe ntšamo tšëngaftangbe tšabiana yomncá tcbonjabuayená; tondaye ntjatsbue-tamencá. Njëtschangbe delante sënjabuatambá y tšëngaftangbe yebnënguenáchnaca.

<sup>21</sup> Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngménaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema.

<sup>22</sup> Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatsëmbo.

<sup>23</sup> Nye mëntsá aíñe sëndëtatšëmbo: Njëtsca bëts pueblënguenache ndayëjana atse chandbëtsana, Uámana Espíritu šondbëtsebuayiynaye entšanga cašmochjutame y puerta chaisufrima camochjama ca.

<sup>24</sup> Atšbe vida cach atšbiana ndoñe yapa que-natámana, chaitsaina o chayóbana. Pero atšbiana iuámanana endmëna ndayá atse jobenayana atšbe trabajo jëftsepochočana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšángaftaca tšabia yomnama jábuayenama.

<sup>25</sup> “Y mora atse ndegombre sëntsetatšëmbo, tšëngaftangbentšana, chë ndëmuanÿengbentše Bëngbe Bëtsabe amëndayama sënjabuayená, ndocná atse más quešmochátinÿe.

<sup>26</sup> Chíyeca, atse ndegombre mënté cbetsëyana: Atše tondaye quetsátstatsëmbo nderado nda ndats-

bocaná chaojóbanabiana,

<sup>27</sup> er atše ntšamo Běngbe Bětsá jamama yojuabnacá lempe tcbonjabuayená, tondaye ntsebueta-mencá.

<sup>28</sup> Chcasna, cach tšěngaftangbiana šmochtsantješna y nŷetscanga muentše Jesucristbeñe ošbuachiyěngbiámnaca. Chěngbeñe mo chěngbe abujěnyāngcá Uámana Espíritu tcmonejajayé, Běngbe Bětsabe entšanga chašmotsanŷenama, chěnga Běngbe Bětsá chábenga tojábiana, chabe Uaquiñabe buiñe juabuáshanese y jóbanese, mo bětscá cuafjopagacá.

<sup>29</sup> Atše sěntsetatsěmbo, atše chaitsoñe orna, banga mochanjabo y chěnga mochántsemna mo corente tšátjaye tjañe quešěngcá, Jesucristbeñe ošbuáchiyěnga chábeñe ošbuáchiyana chamotsajbanama chěnga jamama.

<sup>30</sup> Y tšěngaftangbentšáněnaca báseftanga mochanjábocana y entšāngbioye uayátšenaye soyěnga mochanjabuatambá, chca, báseftanga Jesucristbeñe ošbuáchiyěnga chě inŷengbentšana chamotsoluarema y nŷe chě abuátambayěngbioye chamotsěsetonama.

<sup>31</sup> Chcasna, sempre šmochtsantješna; ndoñe chacmondébnětjomba, atše unga uatěntscuana, bněté y ibeta, tšěngaftanga cada ona cbondětsabuayiyana y chama atše puerte tijasufrí.

<sup>32</sup> “Y morna, Jesucristbeyeca catšátanga, Běngbe Bětsabe cucuatšiñe cbětsabashejuana y ntšamo tšěngaftangbiana chabe tšabe juabna yomnama palabrěngaca, tšabá chašmuesomñe. Cha endobena jamama tšěngaftangbe ainaniñe

más chašmotsošbuáchema, y endobena tšabe soyënga tšëngaftanga jatsatayama, ndayá jatsatayama tojanašebuachenacá mo tšëngaftangcá entšángbioye, ndëmuanÿenga cha tojáchembo chabe entšanga chamotsemnama.

<sup>33</sup> Atše ndocnabe crocénana, o castellano o entšayá atšbiana quetsatántšaboše;

<sup>34</sup> más inÿetsá, y tšëngaftanga lempe šmondétatšëmbo, atše cach atšbe cucuátseca tijéftsetrabajama, atšbiana y átšeftaca imojamnëngbiana opresido enjamna soyënga janguangama.

<sup>35</sup> Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnayëse: ‘Canÿe entšá más oyejuayá jtsemnana ndayánaca ínÿabioye tbojtsatsetná ora, y ínÿabioye tbojtseyëngacá ora ndoñe nÿa nÿetsá ca’ ” —Pablo tonjanoyebuambá.

<sup>36</sup> Pablo chë soyënga tonjánayanentšana, tonjanoshamentšé y nÿetscanga chentše monjëtsemnëngaftaca Bëngbe Bëtsá tmonjanótšëmbona.

<sup>37</sup> Nÿetscanga tmonjánenobošachna y Pablo tmontanotsejcuá y tmontanámocho.

<sup>38</sup> Y entšanga corente ngménaca monjëtsemna, chënga ndocna te más cha mochántinÿe ca Pablo tojanëyana causa. Chentšana, chënga chë barquëshna enjetsamnëntscoñe cha tmonjantjëmbambá.

## 21

### *Pablo Jerusalenoye tojána*

1 Chë Jesucristbeñe ošbuáchiyënga fsënjëftsanabashejuana ora, barquëshañe fsënjanojayé y ndericho Cos luaroye fsënjána; chë yëfsana Rodasoye y chentšana Pátara puebloye.

2 Pátara pueblentše canye barquëshañe fsënjáninýena, Fenicioye enjëtsaye; asna, chëshañe fsënjanojayé y chentšana fsënjëftsanbocna.

3 Fsëntsanachnëjuana ora, fsënjáninýe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentše chë barquëshentša uasmanëshangá jëftsáboshjonama yojámnayeca, chë puebloye bënga fsënjëftsanamashjna.

4 Chentšana, Jesucristbeñe ošbuáchiyënga fsënjánanýena y canýsëfta te chëngaftaca fsënjanoquedá. Chënga Pablo tmonjanियana cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama.

5 Chë canýsëfta te tonjanochnëngo ora, chentšana fsënjëftsanbocna y nyetscanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentše, chë chënyañe fsënjanošamentsé y Bëngbe Bëtsá fsënjanimpadá.

6 Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

7 Tirentšana fsënjëftsanbocna y Tolemaida puebloye fsënjánashajna; y chentše

tonjanopochocá bēngbiana bejaycá chē te ayana. Tolemaidentse Jesucristbeñe ošbuáchiyēnga fsēnjanacheuá y chēngaftaca canye te fsēnjanoquedanga.

<sup>8</sup> Yēfsana, bēnga chentšana fsēnjēftsanbocna y Cesarea luaroye fsēnjánashjajna. Chocna, bēnga fsēnjána Felipe chē Jesucristbiana tšabe noticiēnga abuayiynayabe yebnoye y cháftaca fsēnjanoquedanga. Felipe enjamna canya chē Jesucristbe ichmónēngbioye ujabuachanēnguentšá, Jerusalemoca ubuáyanēnga.

<sup>9</sup> Felipe enjánabamna canta ndēbouamna bembiana y chēnga monjamna Bēngbe Bētsabe juabna oyebuambnayēnga.

<sup>10</sup> Ya bayté chentše fsēnjétsemna orna, Judeocana tonjánashjango canya Bēngbe Bētsabe juabna oyebuambnaya, Agabo ca uabainá.

<sup>11</sup> Agabo bēngbioye tonjánashjango ora, Páblēbe uasnanēja tonjanca y cucuatšēnga y shecuatšēnga cachá tonjanenabatsēca y mēntšá tonjánayana: “Uámana Espíritu entsichamo, Jerusalemoca quem uasnanēja nduíñbioye chē judiēnga mēntšá camochjama y ndoñe judiēngbe cucuatšīñe camochjáboshjona ca.”

<sup>12</sup> Chca fsēnjanuena ora, bēnga y chentša entšanga Pablo fsēnjanimpadá Jerusalemoye ndoñe chaondétsama.

<sup>13</sup> Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerta ngménana chaotsemnama ca? Atše sēntseprontana y ndoñe nye chašmobatsēcama; Jerusalemoca jobanámna sēntseprontana, Bēngbe Utabná Jesusbiana ca —cha tonjánayana.

14 Jáyëñjanama ndoñe chibiatanobená ora, ndoñe más chibiatanimpadá; nýe mëntšá fsëñjaniyana: — Ntšamo Bëngbe Utabná yojtsebošcá chaotsemna ca.

15 Chë soyënga tonjanochnëngüentšana, fsëñjanoprontá y Jerusalenoye fsëñjána.

16 Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canýe Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

### *Pablo tojána Santiago jauatsëtsayama*

17 Jerusalenoye fsëñjánashjajna orna, chentša Jesucristbeñe ošbuáchiyënga oyejuayënga šonjanëbuaja.

18 Yëfsana, Pablo bëngaftaca tonjána Santiago jábuachama, y chentše, nýetsca chë ošbuachiyëngbeñe bëtsëjemëngcá mandayëngnaca monjëtsemna.

19 Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

20 Chca tmonjanuena ora, Bëngbe Bëtsá tmontanchuá y Pablo mëntšá tmonjaniyana: “Morna, Jesucristbeyeca bëngbe catsata, contsonýá ntšamo ba uaranga judiënga Jesucristbeñe imojtsošbuáchema, y chënga nýetscanga montsantješna nýetsca Jesucristbeñe ošbuáchiyënga chë Moisesbe leyentša nýetsca mandënga chamotsocumplínama.



21 Y entšanga chëngbioye noticia tmojatsatá, aca chë inye luarënguenache imoyena judiënga cojtsabuatabá, Moisés tojanmandá soyënga ndoñe ntseyeunanama y basetëmënga base bobachtema chë más delicadentse ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatsëmbcá ndoñe chamondëtsamana ca.

22 Y morna, ¿ntšamo chë soyëngama cochtsem-ana? Ndegombre, chënga mochanjátatsëmbona aca moye tcojabama.

23 Chcasna, ntšamo cbochanjabuayenacá cochjama: Bëngbentse canta boyabásenga montsemna y chënga entsamna Bëngbe Bëtsabiamana canye šbuachenana soye jamama.

24 Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábenga jtsatsmënama ntšamo chamojtsama ora, y ntsachetšá jëtsjájuama chaojtsamncá, aca cochjëtsjáju, as chënga chamobená nyets stjënashë jtsenátšbotjiamana, jinyanjyiyama, ntšamo Bëngbe Bëtsábioye tmojašbuachenacá ya tmojamama. Y chca, nyetsca judiënga mochanjinye ndoñe ndegombre yontsemna chë ntšamo chëngbioye acbiamana tmojacuntacá; masna, chënga mochanjátatsëmbona aca ndegombre ntšamo Moisesbe leyiñe yomandancá icuamama.

25 Y chë ndoñe judiënga Jesucristbeñe imojtsošbuachengbiamna, bënga ya fsënjubuábiamana y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtsesá mëntšëna, chë entšanga tmojtsejuabná diosënga imomna soyënga jadórama tmojjiyëbana; ni buiñe, ni tsešana

bayëngbe mëntšena; y ndoñe chamondëtsama bacna soyënga shembásenga y boyabásengaftaca ca’ ” —chënga tmojánayana.

*Bëngbe Bëtsabe bëts yebnentse judiënga Pablo tmojánishache*

<sup>26</sup> As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábenga jtsatsmënama. Chentsana, Pablo Bëngbe Bëtsabe bëts yebnoye tonjánamashëngo chë bachnanga júnyama, ndayténtsoñe yojamna chë cantangbiamama soyënga jtsamama, Bëngbe Bëtsabe delante tšábenga jtsatsmënama, y jayanama ndayté chëngbiamama yojtsemna ndaye ora cada ona ibo-jtsemna ndayánaca Bëngbe Bëtsabe bëts yebnoye juambana, Bëngbe Bëtsabiamama juatšëmbonama.

<sup>27</sup> Chënga tmojanenoyeuná y tmojánayana canÿsëfta tentscuana chca jamana ca. Chë canÿsëfta te ya jochnënguama yojtsemna orna, básefta judiënga Asioquënga Pablo tmojáninÿe Bëngbe Bëtsabe bëts yebnoca y tmojanma entšanga chamuenbouénanama. Y cha tmojánishache,

<sup>28</sup> mëntšá jtsayebuáchëse: “¡Israeloca entšanga, šmabétsëjabuache ca! Quem boyabása entsemna chë nÿets luarënguenache iuana abuatambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashëngo, y chca cha tonjama chë Bëngbe Bëtsabe bëts yebna Bëngbe Bëtsabe bominiñe ndoñe tšabá chaondëtsemnama ca” —chënga imojtsichamo.

29 Chca imojtsichamo, er entšanga Pablo tmojáninye chë bëts pueblentše Trófimo Efesocáftaca; y imojétsejuabnaye chábioye Bëngbe Bëtsabe bëts yebnoye Pablo tbojanánatse ca.

30 Nyetsca chë pueblentša entsanga tmojánenbouenana, y ochamanana chë Pablo yojtsemnoye tmojánashjajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame.

31 Jtsóbama ya imojtsebuachéta ora, chë Romoca soldadëngbe mandayá tojántatsëmbona nyetsca chë bëts pueblentša entsanga imojtsenbouenanama.

32 Asna, chë mandayá chabe soldadënga y inye chentša amëndayënga tojánachembo y cányiñe chë entsanga imojtsemnoye tmojëftsanótjajo. Entšanga, chë mandayá y chë soldadëngbioye tmojánanye ora, tmojtsanajbaná Pablo jantšetayana.

33 Chorna, chë soldadëngbe amëndayá tojanobconá, Páblëbioye tbojánishache y tojanmandá uta cadenëjuaca cha chamotsebátsécama y tojanatjá: “¿Nda mua yomna y ndayá tojama ca?”

34 Pero chë entšángbeñe, ínÿenga canye soye imojtsáyebuache y ínÿengna inye soye; y chca, ntšamo ndegombre tojanopasama jtsetatsëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama.

35 Chë soldadëngbe oyenoca grádasbengoye tmojánashjajna ora, chë soldadënga tojanotocá Pablo cutsnana juambama, chë entsanga tša

rábiaca imojtsemna causa,

<sup>36</sup> er chënga ústonoye imojétsaye y “¡Chaóbana ca!” imojtsaiuáyebuache.

*Ntšamo Pablo entšangbe delante tojanenëuyaná*

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjalesencia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama!

<sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entšanga yojanëtsëtná chë mándayëngbe contra chamotsemnama y chë canta uaranga podesca uamana entšanga puñálaca uajatëngaftaca, entšanga ndoyena luaroye tojanbočná ca?

<sup>39</sup> Chora Pablo tbojanjuá: —Atše judío sëndmëna, Tarso pueblaca onÿnaná, canÿe uámana pueblentše Cilicia luaroca; Diosmanda šmolesenciá entšanga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatše tojanatsbaná entšanga iytëca chamobia-mama. Nÿetscanga iytëca imojtsemna orna, Pablo hebreo biyañe mëntšá entšanga tojanëyana:

## 22

<sup>1</sup> “Baconga y taitanga, mora šmochjouena atše jenëuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yo-jtsóyebuambnama entšanga tmojanuena ora, más iytëca tmojanobiamama. As Pablo tojanëyana:

3 “Atše judío sēndmēna. Tarso pueblentše, Cilicia luaroca sēnjanonŷn, pero muentše Jerusalementše sēnjanoboch y sēndtatšēmbo soyēngna Gamalilbeyeca chca botamana sēnjanatsjinŷe. Cha corente tšab ŷonjanbuatmb bēngbe bts taitangbe leyēnga; nŷets atšbe ainnaca Bēngbe Bts sēndservena, ntšamo nŷetsca tšngaftanga mora ŷmontsamanc.

4 Atše sēnjnama ch Jesucristo tojaninŷanŷ Be-nache stonnga chamosufrima y chambanama; boyabsenga y shembsenga sēnjantabaye y crceloye sēnjanautame.

5 Ch judo bachnangbe ms umana amnday, nŷetsca ch judingbeņe btsjemngc mndaynga y inŷe muentša mndaynga mondobena jayanana ntšamo sntsichamc ndegombre yomnama. Chnga uabemana tsbuanachang ŷmonjaninŷ, bēngbe catštanga judinga chamotsetatšmbuama atše mando stsanbomnama, Jesucristbeņe ošbuchiynga jtabayama; y Damascoye sēnjna choca Jesucristbeņe ošbuchiynga jtabayama, moye Jerusalemoye junatsama jacastgayama.”

*Pablo tojanacunt ntšamo Jesucristbeņe  
ošbuachiy tojanbema  
(Hch 9.1-19; 26.12-18)*

6 “Pero canŷe te benachiņe Damasco bconana sēnjtsaye orna, mo nŷetsto ora, nŷe ndeolpe atšbe juachaņe canŷe bts tcuinŷe celocana ton-janbuashinŷinŷena.

7 Y fshantsoye sēnjétseshajaye y canye oyebuambnayana sēnjanuena mēntsá: ‘Saulo, Saulo, ¿ndáyeca šcojtsacmena ca?’

8 Atše sēnjantjá: ‘¿Nda comna, Bēngbe Utabná ca?’ Y chē oyebuambnayana šonjanjuá: ‘Atše sēndmēna Jesús Nazaretocá, y aca condama atšbe entšanga chamotsesufrínama ca.’

9 Chē átšeftaca monjánajnēnga chē bēts tcuinye tmojáninye y tmojanouatjananga, pero chē oyebuambnayana ndoñe tmonjanuena.

10 Chora atše sēnjantjá: ‘¿Bēngbe Utabná, ndayá jamama šojtsemna ca?’ Y cha šonjaniyana: ‘Matētsbaná y mētētontsé Damascoye jama. Chentše canya cmochanjabuayená ndayá jamama cmojtsemnama ca.’

11 Chē tcuinye yapa tonjanbuashinýinýena causa, atše jtaná sēnjanoquedá. Chcasna, chē ínýenga šmontanobuacuetēntsé y chca, Damascoye sēnjánashjango.

12 “Chentše enjamna canye bacó Ananías ca uabainá; cha inoyena ntšamo Bēngbe Bētsá yobošcá y yojánama ntšamo bēngbe leyēnguiñe iuayancá, y nýetsca chentša judiēnga monjanamana chabiama tšabá jtsóyebuambnayana.

13 Cha tonjánabo atše jinýama y tonjánashjango ora, šonjaniyana: ‘Jesucristbeyeca atšbe catšata, Saulo, chacmotsatabinýna ca.’ Cachora y cha sēnjáninye.

14 “Chentšana cha tonjánayana: ‘Bēngbe bēts taitangbe Bētsá aca tcmojuábuayana, ntšamo cha acbiama yobošcá chacotsetatsēmbuama, chē

n̄yetsca soyēnguiñe Tšabá Amá chacuin̄yama y cachabe uayásentšana chacóyeunama.

15 Bēngbe Bētsá chca tojama, aca chē chabe buayenana soyēngama entšángbeñe chacóyebuambama, y chamna n̄yets luarentša entšángbeñe cochjacuénta, ntšamo tcojin̄ye y tcojouencá.

16 Y mora, ¡ndoñe más matobátmanana! Motsbaná y cochjenábaye Jesucristo jótšēmbonēse, chca, acbe bacna soyēngama perdonaná chacotsemnama ca' ” —cha šonjaniyana.

*Pablo tojanacuntá ntšamo chē ndoñe judiēngbioye tmojánichmoma*

17 “Jerusalenoye sēntaná ora, Bēngbe Bētsabe bēts yebnoye sēnjána cháftaca jencuéntama, y ndeolpe atše mo otjenayoquécá sēnjanoquedá.

18 Chca orna, Bēngbe Utabná sēnjánin̄ye y cha mēntšá šonjaniyana: ‘Betsco motsa y cam ora Jerusalenentšana métsebocna; quemuentša entšanga ndoñe quecmochatóyeunaye ntšamo atšbiana condétatšēmbó y contsētšētnacá ca.’

19 Atše sēnjanjuá: ‘Bēngbe Utabná, chēnga mondétatšēmbó atše sēnjánana n̄yetsca chēngbe enefjuana yebnēnguenache y chē ácbeñe ošbuáchiyēnga sēnjanētámiana y sēnjánatsetšenaye;

20 y acbiana ndegombre oyebuambnayá Esteban tmonjanóba ora, átšnaca chentše sēnjamna y tšabá imojtsama ca chama sēnjétsejuabnaye, y cabá chē monjanóbanangbe entšayējuangá atše chora sēnjanabojan̄yá ca' —atše sēnjanjuá.

21 Pero chca sĕnjánayana ora, Bĕngbe Utabná šonjaniyana: ‘Motsa; atše bĕn luarĕngoye, ndoñe judiĕngbioye cbochanjíchmua ca.’ ”

*Pablo y chĕ soldadĕngbe amĕndayá*

22 Chĕ entšanga chĕntscoñe tmojanuena; pero chĕ ndoñe judiĕngbiama tojanoyebuambá orna, chĕnga tmojanontšĕ uayebuáchana: “¡Ndoñe tšabá quenátsmĕna cha vídaca chaotsemnama! ¡Motsóba ca!”

23 Y chĕnga más imojtsáyebuache; puerte rábiaca chĕngbe uichĕtjonĕjuangá tsbanánoye imojtsĕbéntaye y tsbanánoye polvĕshe imojtsĕtšana;

24 chĕ causa, chĕ mandayá tojánayana chĕ soldadĕngbe oyenoye Pablo chamotsĕmashĕngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache.

25 Pero jtsetjanjama ya tmojanbatsĕca orna, chentše imojtsemna soldadĕngbe amĕndayábioye Pablo tbojantjá: —¿Tšĕngaftanga šmobena canĕ entšá derecho bomná mo canĕ Romoca onĕnanacá jatjanjana, ndegombre tšabá o ndoñe tšabá tonjamama cabá ndayana ora ca?

26 Chĕ básefta soldadĕngbe mandayá chĕ soye tojanuena ora, tojána y nĕtsca soldadĕngbe amĕndayábioye chama ibojuenaye, mĕntšá: —¿Ndayá cochjama? Chĕ entšá derecho bomna mo canĕ Romoca onĕnanacá canmĕna ca.

27 As chĕ amĕndayá tojána Pablo yojtsemnoye y tbojaniyana: —Šmĕyana, ¿aca derecho bomná mo canĕ Romoca onĕnanacá comna ca?



Y cha tbojanjuá: –Arseñor ca.

<sup>28</sup> Chora chë amëndayá tojánayana: –Atše becaá crocénana sënjëtsjajó mo canya Romoca onyñanacá derecho jtsebomnama ca.

As Pablo tbojanjuá: –Y atšna derecho bomná mo canya Romoca onyñanacá sëndmëna atše tianonyná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbentšana tmojanojuaná; y chë mandayánaca tojanojuaná y yojsauatja, Pablo derecho bomná mo canya Romoca onyñanacá yojamnama tojántatsëmbona ora, er cha tojanmandá Pablo chamotsebátsëcama.

*Pablo, Jerusalenentša uámana mándayëngbe delante*

<sup>30</sup> Chë soldadëngbe amëndayá yojtseboše ndegombre jtsetatsëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyëtsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

## 23

<sup>1</sup> Chora Pablo, nyëtsca chë mandayëngbioye tojanënyanyë y tojanëyana: –Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama.

3 Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtsjantsetá, bacna entsá, ntšamo ndegombre tcojuabnacá ndinÿinÿnayá! Aca chentše contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

4 As, chabe béconana imojtsemna entsanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

5 Chora Pablo tojánayana: —Taitanga, atše ndoñe quetsátstatsëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrenguiñe mëntsá endayana: “Entsangbe mandayabe contra ndoñe catjayana ca.”

6 Pablo tojáninÿe chë mándayënguentsë báseftanga saduceunga y ínÿengna fariseunga imojtsemnama; as, mëntsá tojanáyebuachena: — Taitanga, atše fariseo sëndmëna; atšbe bëtsëtsanga fariseunga mondmëna. Atše, jtsošbuáchiyëse chë obanënga mochtayenama tsobátmana causa, atše ndoñe tšabá sëntsama ca tšëngaftanga šmochjayana ca.

7 Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nÿetsca entsanga ndoñe cachcá imontsejuabnaye.

8 Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga

ndoñe mondmëna ca; pero chë fariseunga aíñe chë soyënguifne jtsošbuáchiyana.

<sup>9</sup> Y nÿetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntsá imojtsáyebuache: “Quem boy-abása ndocna bacna soye tonjama. Nderado mo Bëngbe Bëtsabe canÿe ángel o espíritu muábioye ndegombre tbojauyana ca.”

<sup>10</sup> Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentšana jaisábocnama y chë soldadëngbe oyenoye cachiñe jesánatsama.

<sup>11</sup> Yëfsana ibeta, Bëngbe Utabná Páblëbioye tbojánëböcna y tbojaninyana: “Pablo, ainaniñe añemo cochtsebonna. Ntšamo aca atšbiamna condétatšëmbo y muentše Jerusalemntše condoyebuambnacá, cachcá cmontsemna Romoca jamama ca.”

### *Judiënga tmojanenoyeuná Pablo jtsóbama*

<sup>12</sup> Chë inÿe yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

<sup>13</sup> Chca jamama tmojanjuabó entšanga imojamna canta bnëtsanëngama más.

<sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe

fsënjocumplise: Tondaye ntjasana, ni ntjofšiyana, Pablo jóbantscuana.

<sup>15</sup> Morna, tšëngaftanga y chë inye muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblëbe uabenbe uaquiñá chë soye tojántatsëmbona; asna, tojána chë soldadëngbe oyenoye, chama Pablo jauenayama.

<sup>17</sup> Chorna, Pablo canye básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyetsca soldadëngbe amëndayábioye; canye soye entsebomna chábioye juenayama ca.”

<sup>18</sup> As, cha chë bobontse tbojëftsanbetše, chë nyetsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebomna canye soye aca jauyanama ca.”

<sup>19</sup> Chë soldadëngbe amëndayá chë bobóntsbioye tbojëftsanobuácuëtëntsiye, luaroye tbojanánatse y tbojantjá: —¿Ndayá cojtsebomna atše jauyanama ca?

<sup>20</sup> As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca.

<sup>21</sup> Pero ndoñe catjóyaunaye; chënguentsana canta bnëtsanëngama más entšanga iytëmenënga

Pablëbiama montsanÿá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca –chë bobontse tbojaniana.

<sup>22</sup> Chentšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuéntayana, y chentšana tbojtanichmó.

*Pablo tmojanánatse Félix, chë Cesareoca mandádbioye*

<sup>23</sup> Chentšana, chë soldadëngbe amëndayá tojánachembo útata chë inÿe soldadëngbioye mándayënguentšana, y tojanamëndá chamoprontama uta patse soldadënga, inÿe canÿsëfta bnëtsanënga couayënguiñe y inÿe uta patse lanzëšangaca, Cesarea puebloye ibeta, las nueve ora jabocanama;

<sup>24</sup> y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye.

<sup>25</sup> Y canÿe tsbuanácha chëngaftaca tojanichmó y chëchañe mëntšá yojtsábemana:

<sup>26</sup> Claudio Lisias, chë bëts uámana mandado Felixbiama: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama

sējáatatsēmbona ora, atšbe soldadēngaftaca sējá y chēngbe cucuatšentsana cha sējnatsbocá.

<sup>28</sup> Atše sēntseboše jtsetatsēmbuana ndaye soyama chēnga chabe contra imojtsichámuama; as, cha sēnjuánatse nýetsca chē judiēngbe amēndayēnga montsemnoye;

<sup>29</sup> y chentšana, atše sējáatatsēmbona chēnga chabe contra imojtsichamo ana cachēngbe leyentša soyēngama, pero cha tondaye tonjobuachjanguá, cha jóbama bēnga chašotsamnama, ni mo cárceloye jutámiamama.

<sup>30</sup> Pero atše sējáatatsēmbona chē judiēnga tmojenoyeuná cha jtsóbama; chíyeca, cam ora cha ácbioye sēntsichamná, y chabe contra ichámēngna sējjáuyana, ndayá muabe contra jayanama imojtsebomncá acbe delante chamuayana ca.

<sup>31</sup> Chentšana, chē soldadēnga tmojanma ntšamo tmojanamēndacá, ibeta Pablo tmojéftsanbetše y Antípatris puebloye tmojanánatse.

<sup>32</sup> Yēfsana, chē shecuátšeca tmojána soldadēngna cach soldadēngbe oyenoye tmojésanshēcuana, y chē couayiñe enjaquenēnga Pábloftaca tmojána.

<sup>33</sup> Cesareoye chēnga tmojánashjajna ora, chē tsbuanácha chē mandádbioye tmojanantšabuaché, y Páblēnaca chabe cucuatšiñe tmojánboshjona.

<sup>34</sup> As chē mandado chē tsbuanácha tojanalía; chentšana, cha tojanēnoticiá ndaye luarocá Pablo inamnama, y Cilicia luarocá cha inamnama cha tojántatsēmbona ora,

<sup>35</sup> tbojaniyana: “Acbe contra ichámēnga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bêts yebnocá Pablo chamotsebojanŷama.

## 24

*Ntšamo Pablo chë mandado Félixbe delante tojanenëuyaná*

<sup>1</sup> Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bêtsëjemëngcá mándayënguentsana y canŷa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerte obiashjachá cómnayeca ba tšabe soyënga quem luarentša entsangbiama yojtsebinŷna.

<sup>3</sup> Nŷets tempo y nŷetsquénache chë soyënga fsëndóyëngacañe, bêts uámana mandado, y bënga chama corente cbondetsechuaná.

<sup>4</sup> Pero ndoñe yapa bën jatenbiamnayamna, Diosmanda ratotema šmotsoyauná.

<sup>5</sup> Bënga fsëntsetatšëmbo quem boyabása entsanguentše entsemna mo bacna shacuaná, nŷets luarënguenache yojtsana y yojtsama chë judiënga nŷetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná.

<sup>6</sup> Y tonjábošena jamama Bëngbe Bëtsabe bêts yebna, Bëngbe Bëtsabe bominiŷiñe ndoñe tšabá

chaondětsemnama; chíyeca bēnga cha fsēnjotbá. Bēnga fsēnjábošena chabiama jayanana tšabá o ndoñe tšabá tonjamama, ntšamo bēngbe leyēnguiñe endayancá;

<sup>7</sup> pero chē soldadēngbe amēndayá Lisias tonjon-tremeté y jabuachana bēngbe cucuatšentsana tbojtsánatseñe,

<sup>8</sup> y tonjayana chē chabe contra ichámēngna caojtsamna ácbioye chama jabana ca. Cach taitá chacojatjá ora, ndegombre soyēnga cochántsetatšēmbo ndáyeca bēnga muabe contra fstsichámuama ca” — cha tojánayana.

<sup>9</sup> Y chē judiēnga chentše imojétsemnēngna imojtsanichamo aíñe chca tojanopasá y lempe ndegombre yojtsemna ca.

<sup>10</sup> Chentšana, chē mandado Páblēbioye tbojánefatšēmbo chaóyebuambama; as Pablo tojánayana: “Atše sēndětatsēmbo aca ba uatama comna muentša entšangbiama tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenēuyaná.

<sup>11</sup> Ntšamo cach aca jtsetatšēmbuama contsobencá, cabá bnētsana uta te entsemna atše Jerusalenoye sēnjá, Bēngbe Bētsá jadórama.

<sup>12</sup> Y quemēnga ndoñe chešmátinýena nderado ndáftaca jabuachana enatsētsnayıñe, ni entšanga chamuenbouénanama amiñe, Bēngbe Bētsabe bēts yebnoca, ni chēngbe enefjuana yebnēnguenache, ni inýe luarēnguenache chē bēts pueblentše.

<sup>13</sup> Quem entšanga tondaye quemátsbomna ntšamo jayanama, atšbe contra montsichamo



soyënga ndegombre yojtsemna ca.

<sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninÿanyé benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nÿetsca chë Moisesbe leyiñe y Bëngbe Bëtsabe juabna oyebuambnayëngbe uabemana librëšanguentša soyënguiñe sëndošbuaché;

<sup>15</sup> y atše cach chëngcá, puerte jtsošbuáchiyëse Bëngbe Bëtsabeñe sëndobátmana cha yochjama chë mochjóbanënga chámuatayenama, nÿetsca entsanga, lempe tšabá amënga y chë ndoñe tšabá amëngnaca.

<sup>16</sup> Chíyeca, atše nÿets tempo puerte tšabá sëndama, tondayama ntjatenócochinÿenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

<sup>17</sup> “Básefta uatama inÿe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjémënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama.

<sup>18</sup> Atše sënjama soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínÿena, pero ndoñe chešmátinÿena ni ba entsángaftaca, ni enbouenaniñe.

<sup>19</sup> Chë šmonjinÿenënga entsamna ácbioye jabana y acbe delante atšbe contra chamuayana, nderado

ndayá tmojtsebomnëse.

20 O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijobuáchjanguama chešmënjínÿena, atše castiganá jtsemnama šojtsemna ca chënga chamuayanama;

21 o nderado nántsemna chë atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

22 Félix bëtscá inatátšëmbo Bëngbe Utabná tojaninÿinÿé Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entšanga tojanëyana: “Chë soldadëngbe amëndayá Lisias chaojáshjango ora, chanjayana ntšamo quem tšëngaftangbe sóyeca jamama ca.”

23 Y chentša soldadëngbe amëndayábioye tbojanmandá Pablo jtsebojanÿama, pero nÿe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

24 Chentšana baseftaytese, chë mandado Félix Cesareoye tojtanashjango, chabe shema Drusíaftaca, canÿe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canÿa nanjobenaye Jesucrístbeñe ošbuachiyá jtsemnama.

<sup>25</sup> Pero, nÿetsca soyënguiñe tšabá jtsamama, cachá jenomándama jtsobenama y ntšamo tmojamama nÿetsca entšangbiamama Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianama: “Mora, mata; luare quétstsebmoma ora, cchochjachembo ca.”

<sup>26</sup> Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanóffajana cháftaca jencuéntama.

<sup>27</sup> Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadca tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

## 25

### *Pablo Festbe delante*

<sup>1</sup> Festo chë luaroye tojánashjango y unga tianoye, Cesarea pueblentšana Jerusalenoye cha tojána.

<sup>2</sup> Chocna, chë bachnangbe amëndayënga y chë más uámama judiënga Fëstbioye tmojána Páblëbe contra jayanama.

<sup>3</sup> Y tmojanimpadá, mo chëngbiamama canÿe bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama.

<sup>4</sup> Pero Festo tojanéyana, Páblëna Cesareoca utamená yojtsemna y baseftaytese cha choye jtama ca.

<sup>5</sup> Y tojanéyana: “Chamna, tšëngaftangbe amëndayënga átšeftaca Cesareoye chamua y chë

boyabása ndaye bêts soye tojobuáchjanguase, chocha chabe contra šmochjayana ca.”

<sup>6</sup> Festo Jerusalenentše posufta o bnětsana te más chěngaftaca tbojěftsanjétana y chentšana Cesareoye tojtaná. Yěfsana, cha tojanótbema chabe puestentše tribunaloca y tojanmandá Pablo choye chamuánatsama.

<sup>7</sup> Pablo choye tojánashjango ora, Jerusalenocana tmojánashjajna judiěnga tmojanobobeconá y ba uabouana soyěnga chabe contra imojtsichamo, pero ni canye chě soyěngama tmonjanobená jinŷanŷiyana chca ndegombre bětsemnama.

<sup>8</sup> Y Pablo, cachá jeněuyanama měntšá yojtsichamo: —Atše tondaye chiyatobuachjanguá, ni judiěngbe leyěngama, ni Běngbe Bětsabe bêts yebnama, ni Romoca bêts mandadbe contra ca.

<sup>9</sup> Festo yojtseboše chě judiěngaftaca tšabá joquédama; as Páblěbioye tbojantjá: —¿Tacatjábošena Jerusalenoye jama, chocha atše quem acbe soyama jayanama ca?

<sup>10</sup> As Pablo tojánayana: —Atše sěntsemna chě Romoca bêts mandado tojichamó aměndayěngbe delante y chěnga entsamna jayanama atše tšabá o ndoñe tšabá sěnjamama. Ntšamo ndegombre contsetatsěmbcá, judiěngbe contra atše ndocna bacna soye chiyatsma.

<sup>11</sup> Nderado atše ndaye bêts soye tijobuachjanguá y chama atše jóbanama šojtsemněse, atše tondaye quichátayana atše ndoñe chayóbanama; pero atšbe contra montsichamo soyěngama tondaye ndegombre tontsemněse, ndocná queochatobenaye chěngbe cucuatšišne atše jaboshjonana. Chíyeca, Diosmanda chě Romoca bêts mandado

cháuyana tšabá o ndoñe tšabá sënjama ca —Pablo tojánayana.

<sup>12</sup> As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošenësna, chábioye cochjá ca.

*Festo, Rey Agrípaftaca tbojanencuentá ntšamo Pábloftaca jamama*

<sup>13</sup> Chentšana baseftayté tojanochnëngo ora, Rey Agripa y Berenice Cesareoye tbojána, Festo jau-atsëtsayama.

<sup>14</sup> Bayté chata chentše tojanajëtana; y chca, Festo chë réybioye tbojancuentá Páblëbe soyama. Cha mëntšá tbojaniyana: —Muentše endmëna canÿe entšá, Pablo ca uabainá; Félix utamená tbonjëftsebošhona, atše mandadcá sënjontsé ora.

<sup>15</sup> Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama.

<sup>16</sup> Y atše sënjáuyana: “Chë romanënga ndoñe quematamana ndocnabiamana jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.”

<sup>17</sup> Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puententše tribunaloca sëntótbema y sënjamandá chë boyabása jobetšana.

<sup>18</sup> Pero chabe contra ichámënga, ntšamo atše sëndanjuabnacá chënga mochjayanamna ni mo

canÿe bĕts soye chabe contra chemátayana, chĕnga jóyebuambayama tonjóyentsbuache ora.

19 Chĕnga chabe contra montsichamo, nÿe cachĕngbe Dios ntšamo jadórana yomnana y canÿa Jesús ca uabainábiana; cha tojanóbana, pero Pablo entsichamo cha ainá yotsomñe ca.

20 “Chora atše ndoñe quetstétsetatsĕmbo ntšamo chĕ soyiñe jamana; asna, Pablo sĕnjantjá Jerusalenoye jama tayojétseboše ca, choca atše jayanama tšabá o ndoñe tšabá cha tonjanmama.

21 Pero cha šonjaimpadá camuentše jaboshjona, cach Romoca bĕts uámana mandado chĕ soyama tojayanĕntscuana ca. Chcasna, atše sĕnjamandá cha chamotsebojanÿama, chĕ mandádbioye jíchmuama atše jobenayĕntscuana ca” —Festo tbojançantá.

22 Chca tbojanencuentá ora, Agripa Féstbioye tbojaniana: —Atšnaca séntseboše chĕ boyabása joyeunayama ca.

Y Festo tbojanjuá: —Cach yĕfse oído chábioye cochanjabuájua ca.

23 Chĕ yĕfsana, Agripa y Berenice corente uachuanentše chĕ tribunaloye tbojánamashjna y chátaftaca tmojánamashjna chĕ soldadĕngbe amĕndayĕnga y chĕ pueblentša uámana taitanga. Chentšana Festo tojanmandá Pablo jobetšana;

24 y chora cha tojánayana: “Rey Agripa y nÿetsca taitanga béngaftaca šmojtsemnĕnga: Chentše entsemna chĕ boyabása. Nÿetsca judiĕnga chabe contra átšbentše montsabíchamo, Jerusalenoca y quem Cesarea puebléntšnaca, y

nña jtsayebuáchëse tša šmontseimpadana cha chaóbanama;

<sup>25</sup> pero atše sëntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmuua.

<sup>26</sup> Pero atše, atšbe bëts uámana mandádbioye quem boyabásabiama juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atše chaitsebonnama.

<sup>27</sup> Er atše sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

## 26

*Pablo tojanontsé rey Agripbe delante jóyebuambayama*

<sup>1</sup> Chentšana, Agripa Páblëbioye tbojanियana: —Jóyebuambayama contselesenciana, cach aca chacuenëuyanama ca.

As Pablo, chë réybioye jachuayama cucuatše tojanatsbaná y jenëuyanama tojanontsé mëntšá jayanama:

<sup>2</sup> —Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenëuyanama nyetsca soyëngama ntšamo judiënga atšbe contra montsichámuama;

<sup>3</sup> y más sēntsoyejuá, taitá conduábuatmama lempe ntšamo judiēnga monduamancá y condētatsēmbo chē judiēnga ndayama imuenoboyebuambnama. Chcasna, Diosmanda uantádoca šmotsoyeuná.

*Pablo tojanacuntá ntšamo cha tempo inam-nama*

<sup>4</sup> “Njētsca judiēnga mondētatsēmbo ntšamo atše tempšana chēngbeñe tsiyenama, bobontse sēnjamna orscana, atše sēnjanonŷná luarentše y Jerusalemēntše.

<sup>5</sup> Chēngnaca mondētatsēmbo y montsobena jayanana, chēnga tmojtsebošēse, chca ndegombre yomnama; atše njēts tempo fariseucá vida sēndbomna, y chē fariseunga mondoyena más soyēnga jtsamēse chē judiēngbe leyēngaca chē inŷe judiēngbiana.

<sup>6</sup> Y mora, ntšamo Bēngbe Bētsá bēngbe bēts taitanga tojanašebuachenacá, chē obanēnga jtayenama cha yochjamama puerte jtsošbuáchiyēse atše obatmana causa, šmojuánatse atšbe contra jayanama.

<sup>7</sup> Bēngbe bnētsana uta Israeloca bēts pamíllanga mondobátmana chē šbuachenana soye chēngbiana chaóshjanguama y chíyeca, cada te bnēté y ibeta chēnga Bēngbe Bētsá mondadorana y mondēservena. Y atše cach soyama obatmana causa, bēts rey Agripa, judiēnga mora atšbe contra montsabíchamo.

<sup>8</sup> ¿Ndáyeca tšēngaftanga judiēnga šmojtsichamo, chē obanēnga chámuatayenama Bēngbe Bētsá yochjamama jtsošbuáchiyama ndoñe šmontsobena ca?



*Pablo tojanacuntá, ntšamo tempo cha Jesucristbeñe ošbuáchiyënga yojanaborlánama*

<sup>9</sup> “Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima,

<sup>10</sup> y chca Jerusalenentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiana montsanichamo ora, átšnaca aíñe chca chamoma ca sënjánichamo.

<sup>11</sup> Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjëtsemna causa, chë inye luarëngoca bëts pueblënguenáchnaca chënga sënjanëcamena.”

*Pablo tojanacuntá ntšamo cha Jesucristbeñe ošbuachiyá tojanóbema*

*(Hch 9.1-19; 22.6-16)*

<sup>12</sup> “Y cachcá jamama canye te Damascoye sënjétsaye; chë bachnangbe amëndayënga uabemanëchangá šmonjanëntsabuaché chca jamama y, cachënga choye šmonjanichmó.

<sup>13</sup> Pero, uámana rey, chë benachëjana mo njetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átšeftaca ajnëngbe shëconana corente enjëtsebuashinýinýana.

<sup>14</sup> Njëtscanga fsënjánshajaye y atše sënjanuena canye oyebuambnayana, hebreo biyañe, mëntsá

šonjétsatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmêche niñêfjiñe cha tojtsoscunjná orcá, cachá jenótsetšenana ca.’

<sup>15</sup> As atše sējánayana: ‘¿Nda comna, Bēngbe Utabná ca?’ Y chē Utabná šonjanjuá: ‘Atše sēndmēna Jesús, y aca condama atšbe entšanga chamosufrima ca.

<sup>16</sup> Pero matētsbaná y matētsá. Atše cbonjébēbocna jinjīnyiyama aca tchojuábuayanama atše šcochjaserviama, y chacotsetatšēmbuama y entšanga chacuacuntama, mora tconjinje soyama y más chcoye atšbiamá cbochanjinjīnyie soyēngámna.

<sup>17</sup> Atše chanjama judiēnga y ndoñe judiēnga tondaye chacmondēborlama; y morna, ndoñe judiēngbioye cbontsichamná,

<sup>18</sup> chēnga atšbe soyēngama josértama aca chacomama. Chca, chēnga bacna juabnēnga ndoñe chamondētsebomna, mo ibetiñe cuaftsemnēngcá, sinó mo binjīniñcá chamotsemna átšeftaca, atše chē entšangbe juabnēnga binjīnyayá. Satanasbe cucuatšiñe ndoñe chamondētsemnama, sinó Bēngbe Bētsabe obenánaca chamotsiyenama; chēnga átšbeñe chamotsošbuáchema, y chca, chēngbe bacna soyēngama perdonánēnga chamotsemnama y chēnga chamotsebomnama canye luare entšángaftaca, chē ndēmuanjēngbioye Bēngbe Bētsá tšabe entšanga y chabe entšanga tojábiamá, chēnga átšbeñe betsošbuáchiyama ca’ ” —cha šonjaniana.

*Pablo tojanma ntšamo chë mo otjenayoquëcá tojaninÿcá*

<sup>19</sup> “Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo šonjaniyancá;

<sup>20</sup> y natsana, Damascoca entšanga chë tšabe noticiëngama sënjanabuayená; chentšana, Jerusaleñoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama.

<sup>21</sup> Chca sënjánama causa, judiënga Bëngbe Bëtsabe bëts yebnocá šmonjanishache y tmonjánbošena atše jtsóbana.

<sup>22</sup> Pero Bëngbe Bëtsá sempre šonduájabuachana, y chca, cada te méntscoñama, nÿetscanga Bëngbe Bëtsabiana sëndabuayiyná, uámanëngbioye y nduámanëngbioynaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe.

<sup>23</sup> Chënga tmonjánayana: ‘Bëngbe Bëtsabe Uámana Uabuyaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

*Pablo tojanma rey Agríbioye jáyēnjanama, Jesucristbeñe ošbuachiyá chaóbemama*

24 Pablo, cachá jenēuyanama chē soyēnga tojánayana ora, Festo mēntšá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

25 Pero Pablo tbojanjuá: —Opá ndoñe quetsásmēna, bēts uámana Festo; inyētšá entsemna; atše sēntsoyebuambná nyēts juábnaca, y ndegombre soyēnga.

26 Chentše rey Agripa entsuenana, y cha puerte tšabá chē soyēngama endētatsēmbo, chíyeca, tondayama ntjatauatjá, atše chabe delante sēntsoyebuambná; atše corente sēndētatsēmbo chánaca chē soyēngama yotatsēmbuama, er ndayá Jesús tojanmcá, ndoñe tonjopasá ndaye iytēmena chaboye.

27 Bēts rey Agripa, ¿Bēngbe Bētsabe juabna oyebuambnayēnga tmojánayana soyēnguiñe aca quecošbuaché? Atše sēntsetatsēmbo aíñe chiñe cošbuáchema ca —Pablo tbojaniana.

28 Chora Agripa tbojanjuá: —Batšatema más y mašcjayēnjaná Jesucristbe ustoná atše jóbemama ca.

29 As Pablo tojánayana: —Nyē batšatema más o bēts cama más, atše Bēngbe Bētsá sēntseimpadana, ndoñe nyē bēndatbe barie, sinó nyēts canga chē mora šmojtsuenanēnga, atšcá Cristbe ústonēnga chašmobiamama, pero utámenēnga ndoñe chamondētsemna, ntšamo mora atše sēntsemncá ca.

30 Chorna, chē rey, chē mandado, Berenice y chē chēngaftaca imojantbiámanēnga tmojantsbaná,

<sup>31</sup> y luaroye tmojána chë soyama jencuéntama. Mëntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

<sup>32</sup> Y Agripa Féstbioye tbojanियana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

## 27

### *Roma bëts puebloye Pablo tmojanichmó*

<sup>1</sup> Italia ca uabaina luaroye Pablo jíchmuama tmojanenoyeuná ora, atše, quem librëša uabi-amnayá, cháftaca sënjána. Chora Pablo y chë inye utamenënga Julio ca uabainabe cucuatšinë tmonjánabashejuana. Julio enjamna canya chë Romoca bëts mandadbe soldadënguentsá mandayá.

<sup>2</sup> Asna, fsënjánašëngo canye Adramitio puebloca barcuinë; ya chë Asioca bëts pueblëngoye juama enjétsamna. Cesarea pueblentsana fsënjánbocna y Aristárcnaca bëngaftaca enjétsamna; cha enjamna Tesalónica bëts pueblócá, Macedonia luaroca.

<sup>3</sup> Chë inye yëfsana, Sidón puebloye fsënjánashjajna. Chentše Julio, tsabá mandbomná Pábloftaca enjétsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama.

<sup>4</sup> Sidonocana fsënjëftsanbocnentsana, bëngbe contra corente enjétsëbinÿiaye. Chíyeca, Chipre fshantsënga catšbioicajana, ndoñe yapa quentétsebinÿiyëjana bënga fsënjána.

5 Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

6 Chë soldadëngbe amëndayá, canÿe Alejandría puebloca barco chentše tonjáninÿena, Italia luaroye yojétsaye; asna, šonjanamëndá chë barcuifne jenójajiyana.

7 Baseftaytentscuana uenana fsënjánana y pordonto fsëjanobená Gnido pueblentša ndirichiñe jashjanguana. Cabá bëngbe contra enjëtsebinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana.

8 Y chca, pordonto bejaycá fsënjánana, fshantsënga béconana; chentšana, canÿe pueblo, Tsabe Puertënga ca uabáinentše fsënjánashjajna, Lasea ca uabaina pueblo béconana.

9 Chca, bayté tonjanochnëngo y chora chë bejaycá jama puerta resjo enjëtsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuaperdonama, y chora chë uaftena tempo joshjanguama ya enjëtsobeco.

10 Chíyeca Pablo chë entšanga mëntšá tonjanabuayená: “Baconga, atše šontsinÿana mora puerta resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiamama cach ndoñe, mo nderado muanjanóbana ca.”

11 Pero chë soldadëngbe amëndayá Páblëbioye ndoñe ntjoyeunayana; más, chë barcuentša mandayá y chë barco nduíñbioye aíñe.

12 Ndoñe tšabá yonjamna, chë barco chora enjëtsemnentsë chë uaftena tempëntscuana jëftsemnana; chë causa, nÿa mo nÿetscanga tmonjanenoyeuná cachiñe bejaycá chentšana játama, nderado cuanjobenaye Fenice pueblöye jashjanguama y chentše jëftsemnama chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinÿe endbetsenatjëmbambana juachoica tsjuanoicajana y tsmanoicajana.

*Mar béjayiñe puerta uaftena y binÿia tojanóshjango*

13 Chentšana tonjanontsé tsmanoicana batšá binÿiayana, chíyeca chë entsanga tmonjanjuabó ya yojtsanopodena jtétóntšana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana.

14 Pero baseftayté chentšana, chë fshantsëngocana tonjanontsé corente jabuache binÿiayana y chë barquëshoye enjëtsohajuana. Chë binÿia yojanabaina Nordeste binÿia ca.

15 Chë barcna nÿe chë bínÿiëbe ponto tonjanontsé uayana; chë binÿia enjëtsohayëjana jama ndoñe quentëtso podena causa, šonjanotocá nÿe ntšamo tojtsebinÿiacá chašúyambama.

16 Chentšana fsënjánachnëjna Cauda ca uabaina stëtsoicajana, base fshantsënga mar béjayoca; chiñe ya ndoñe tša jabuache quentëtsebinÿiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsóndbemama.

17 Ya chë barquëshoye fsëntanëshëngo orna, chë entsanga lazëjangaca chë barquëshä tmonsan-abatsëcaca, más uamorochëshä chaotsamnana. Pero chënga monjétsauatja nderado chë barco chë Sirte ca uabaina cascajuentše nanjetsánjua; asna, chë barcuentsä ancla tmonjanashëbëútsëna, chë barco ndoñe betesco chaondëtsábonjnana, y ntšamo enjetsanbinÿiaycá fsënjána.

18 Chë inÿe yëfsana y chë binÿiayana cabá jabuache enjëtsemna causa, chënga tmonjanontsé chë barcuentsä uasmanëshangá jtsëshbuétsetsana;

19 y unga tianoye bëngnaca šonjanotocá, cach bëngbe cucuátseca, chë barcuentsä soyënga buyeshoye jtsëtšanana.

20 Baytentscuana bënga ndoñe chibiatanobená jinÿana ni shinÿe, ni estrellatëmënga, tša tonjëtseibetata causa; y tša jabuache enjëtsebinÿiaye causa, bënga ya ndoñe quefstëtsanobatmana chentshana jótsbocana.

21 Ya bayté enjëtsemna y chëntscuana tondaye saná ntjascá fsënjëtsemna. Chentshana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoyeuná y Creta luarocana ndoñe matmënjëftsanbocna; chca mora ndoñe mal mamojtsepasá y ndoñe nÿa nÿetšá matmënjobuetše.

22 Pero mora ngménaca ndoñe matsmënëngana; masque chë barco echantsenatjëmbe, tsëngaftanguentsá ndocná queochatóbana.

23 Ibeta canÿe ángel šonjébëbocna; Bëngbe Bëtsá, ndabia atše sëndmëna y nda sëndësvervena, cha tbojichmó;



24 y chë ángel mëntšá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nÿetsca quem barcuiñe ajnënga jobanámentšana cha echanjatsebacá ca.’

25 Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbcna.

26 Pero mora entseyta canÿe fshantse mar béjayiñe chašúshejanguama ca” —cha tonjanëyana.

27 Canÿe ibeta, uta semana fsënjánana chentšana chë Adriático ca uabaina mar béjayiñe fsënjétsemna, y nÿe ínÿoye y ínÿoye chë binÿia šonjétsëyambaye. Y mo tséntseto yojétsemna orna, chë barcuentsa trabájayënga tmojanjuabó ya fshantse béconana imojétsemna ca.

28 As chënga tmonjanmedidá ntsachetšá chë búyeshe buajtjoye inamnana y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canÿsëfta metro tonjanóbocna.

29 Chënga monjétsauatja nderado bëts ndëtsbéngaca nanjetsántšëtjiama; asna, chë barco stëtšoicajana canta ancla buyeshoye tmonjanashëbëútsena, chë barco ndoñe más chaondëtsábonjnana, y tša monjétsesebese betscó chaobínjnana.

30 Chëntscuana, chë barcuentsa trabájayënga tmojánbošena chentšana jtsachetana; chamna, chënga tmojanontšé chë canouše buyeshoye justjanguana, pero chca imojétsama, mo chë

anclēnga chē barco natsanoica cuaftsēstjajuancá.

<sup>31</sup> Pero Pablo chē soye tojáninýe, y chē soldadēngbe amēndayábioye y chē soldadēngbioye tonjanēná y mēntśá tonjanéyana: “Chē barcuentsá trabájayēnga cach quem barcuentsē ndoñe chamonjoquedase, tšēngaftanga ndoñe quešmochatobenaye muentśana jótsbocama ca.”

<sup>32</sup> As, chē soldadēnga tmonjána y chē canoušentsá lazējēnga tmontsantētsetše y buyeshoye chēše tmontsantsatše.

<sup>33</sup> Enjētsebinýana ora, Pablo nýetscanga tonjanaimpadá ndayánaca chamosēngama, mēntśá jáuyanēse: “Ya uta semana entsemna y tšēngaftanga ni mo batśatema chešmatamaná, y tondaye chešmatsbmuananga.

<sup>34</sup> Diosmanda, masque nýe mo batśatémnaca šmochjase. Chca cmontsamna jamana ndoñe chašmondóbanama, er ndocná ndocá queochat-spása ca.”

<sup>35</sup> Pablo, chca tonjánayanentśana, canýe tandēse tonjanca y nýetscangbe delante Bēngbe Bētsábioye tbontanchuá. Chorna, tonjanjatá y tonjanontśé jasama.

<sup>36</sup> Chentśana nýetscanga tmonjanenñemó y chēngnaca tmonjanse.

<sup>37</sup> (Chē barcuentsē nýetscanga fsēnjamna uta patse y canýsēfta bnētsana y chnēnguanēnga.)

<sup>38</sup> Ntśamo innabošcá tmonjansentśana, buyeshoye trigo tmontsanashaná, chca, chē barco ndoñe yapa chaondētsautama.

*Chē barco tojtsanenatjēmba*

39 Ya tonjanbinÿna ora, chë barcuentša trabájayënga ndoñe quemëntétsetatsëmbo ndaye fshantse chentše bétsemnama, pero tmonjáninÿe chë fshantsentše canÿe luare jachañe, chë bėjaye chë luaroye omashjuanentše, y chiñe canÿe chënÿañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana.

40 Asna, chë anclentša lazëjënga tmontsantétsetše y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentša natsanoica niñësiñe entsëjua tsbanánoye tmontanëšëngo, y chë binÿia tonjanma chë barco chaontsé chë chënÿoye juabëconama.

41 Pero chë barco canÿe luaroye tonjánashjango, y chentše chë bėjaye catatoicajana enjetsobuá y chë barco cánÿentše, bëtscá cascajo buyeshiñe binÿnentše tontsananjó. Chë barcuentša natsanoica lado chë cascajuiñe entsanajuena, ndócnoye juabónjuama ntsopodencá, y chë stëtšoica lado puerte entsanashatiyiyná y lempe entsanandbiamná, yapa binÿia causa y búyeshe chentše enjësojantšetaye causa.

42 Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondétsachetama.

43 Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nÿetscanga chë jachbabama obenëngna natsana chë buyeshoye joshbuetšana tsachoye chamuash-

janguama,

<sup>44</sup> y chë ínÿengna tablëshënguiñe o chë bar-cuentša pedazënguiñe chamoshbuetsama. Y chca, nÿetscanga fsënjanobená tšabá y ndocá ntjapasacá fshantsoye jashjanguama.

## 28

### *Pablo Malta luaroca*

<sup>1</sup> Ya nÿetscanga fshantsoca tšabá fsënjétsemna ora; fsënjántatšëmbona chë luare Malta ca yojan-abaina.

<sup>2</sup> Chë luarentša entsanga bëngaftaca corente tšabá mándbomnënga monjétsemna; canÿe íñeshe tmonjanangbotjó y sonjanëbuaja choca bënga jatóšboniyama, er tša enjétsaftena y yapa enjétsesësna.

<sup>3</sup> Pablo tojanatbaná básefta buashana chamesëfjënga y chë íñeshoye enjétseshacjnaye ora, canÿe mëtšcuaye tojánbocna y enjetsachaye, chentše yapa obonÿaye causa, y Páblëbe cucuatšíñe tontsanonjyá.

<sup>4</sup> Chë luarentša entsanga, chë mëtšcuaye Páblëbe cucuatšíñe yojsajonÿanama tmonjáninÿe ora, monjétsenatsëtsnaye: “Quem boyabása ndegombre inÿa obanayá cuanmëna; mar bëjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnama ca.”

<sup>5</sup> Pero Pablo tontsanenacuestëtoná y íñeshoye chë mëtšcuaye tbontsantsatše y Pablo ndocá chen-atanpasá.

<sup>6</sup> Chë entsanga imojétsejuabnaye chábioye bochtsacuefshachá y nÿe ndeolpe obaná

yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntétsanjuabnaye y tmonjanontsé ichámuana Pablo canÿe dios inamna ca.

<sup>7</sup> Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina.

<sup>8</sup> Chë tempo, Públiëbe taitá šocá jut-sněshañe inajájona, calentóraca y buiñeca buamachnëjuanánaca. Pablo tonjána cha jinÿama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanjajó, y chca, cha shnaná enjétsatsmëna.

<sup>9</sup> Chca tonjanopasá chentšana, chë luarentša inÿe šoquënga Páblëbioye monjánajna y cha enjánashnaye.

<sup>10</sup> Bëtscá tšabe soyënga chentše bëngbiana tmonjanma, y cachiñe játama ya chë barcuiñe fsëntanenojayenga orna, lempe ntšamo bejaycá jama šonjanëjbotcá chënga šonjanatsatá.

### *Pablo Romoye tojánashjango*

<sup>11</sup> Chë fshantsentše mar béjayoca unga ishinÿe fsënjéftsemna, y chentšana canÿe Alejandriocana yojanabá barcuiñe fsënjanenojayé; chë barco nyets uaftena tempo chë luarentše yojéftsamna y enjanabaina Cástor y Pólux ca, mo chë romanëngbe uta diosata catsatcá.

<sup>12</sup> Chentšana, Siracusa bëts puebloye fsënjánashjajna y chentše unga te fsënjéftsemna;

<sup>13</sup> y chentšana fshantse béconana bejaycá fsënjána, Regio puebloye jashjanguëntscuana.

Yěfsana, tsmanoicana tsjuanoye enjětsebinÿiaye, y chca, chë inÿe yěfsana Puteoli puebloye fsënjánashjajna.

<sup>14</sup> Chentše básefta Jesucrístbeñe ošbuáchiyënga fsënjánanÿena, y šonjaněbuaja chëngaftaca canÿe semana chentše jěftsajětanama; y chentšana Romoye fsënjěftsanbocna.

<sup>15</sup> Romoca Jesucrístbeñe ošbuáchiyënga ya imojětsetatsëmbo bënga choye fchjanashjajnama; chcasna, chënga tmonjánbocna bënga jajébenguama canÿe luare Foro del Apio y Unga Tabernënga ca uabainóntscoñe. Pablo chënga tonjánanÿe ora, Bëngbe Bětsá tbontanchuá y puerte añémoca enjětsemna.

<sup>16</sup> Romoye fsënjánashjajna ora, soldadëngbe amëndayá Páblëbioye tbonjalesenciá cánÿabe yebnentše chaotsiyenama, y tonjanmandá canÿe soldado chabotsebojanÿama.

### *Ndayá Pablo Romoca tojanma*

<sup>17</sup> Choye fsënjánashjajnentšana unga tianoye, Pablo tonjanmandá chentše imnoyena judiënga más uámanënga chamobéconama; y nÿetscanga ya tmojánenefjna ora, cha tojaněyana: —Catšátanga judiënga, masque atše tondaye chiyatsma bënga judiënga mondbétsama soyëngama contra, ni bëngbe běts taitanga imojanamana soyëngama contra, judiënga Jerusalenoca šmonjanishache y romanëngbe cucuatšinë šmonjánboshjona.

<sup>18</sup> Chë romanënga lempe šmonjantjá chentšana, monjětseboše atše jětsboshjonana, er ndocna bacna soye chemátaninÿena atše jóbanama chašotsemnama.

19 Pero chë judiënga ndoñe quemtétseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entsanga, judiëngbe contra jayanama.

20 Chíyeca, atše tcbonjúbuaja jányama y jáuyanama, er ndayama chë Israeloca entsanga puerte jtsošbuáchiyëse mondobátmanama, chë obanënga mochtayenama, atše mora utamená sëntsemna ca –tojanëyana.

21 Chora chënga tmojanianyana: –Bënga ni mo canyë tsbuanácha Judeocana fchiyatáyëngaca acbiama noticiëngaca, y ni canyë catsata judío, chocana moye ashjajnënguentsá, ndocna bacna soye acbiama chešnatacuntá.

22 Bënga fsëntseboše jouenana ntšamo aca cojuabnama, er ntšamo Jesucristbe ustonëngbiana fstsëtatšëmbcá, entsemna ana nyets luarenache chëngbe contra entsanga imojtsichamo ca.

23 Asna, canyë tescama Pablo tmojanianyana chca chaotsemnana; y chë tena, ba entsanga chë Pablo posada inabomnoye tmojanobeconá. Y cachëscana tojanjétanëntscuana, Pablo entsanga yojanëtsëtsná Bëngbe Bëtsabe amëndayama, ndayama cha ininye y inatátsëmbo; y yojtsentšena chënga jáyëñjanama Jesúsbeñe chamotsošbuáchema, Moisesbe leyënguentsá soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca.

24 Báseftanga aíñe imojtsošbuáchiye ntšamo

Pablo yojtsanëtsëtsnacá ndegombre bétsemnama, pero ínÿengna ndoñe.

<sup>25</sup> Nÿetscanga ndoñe cachcá montsanjuabnaye causa, tmojanontsé chentšana jésebocanana. As Pablo tojanéyana: “Nÿets razónaca chë Uámana Espíritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntšá:

<sup>26</sup> Motsa chë entsanga jauyanama:

‘Bëtscá šmochantsuenana, pero tondaye quec-  
mochátësertana;  
tša šmochantsafšna, pero tondaye  
quešmochátinÿe.

<sup>27</sup> Muentša entsanga ainánaca josértama ndoñe quemátsboše causa,

chënga nduauenanënga montsemna y  
nduabinÿnëngnaca;

chënga bomínÿeca ndoñe chamondobená jinÿama,  
ni chëngbe matscuašeca jouenama,  
ni chëngbe ainánaca josértama ndoñe chamon-  
dobená,

chca, atšbe benache ndoñe chamondishachama,  
atše ndoñe ntjátsebacama ca.’ ”

<sup>28</sup> Pablo chora mëntšá tojanéyana: “Ndegombre šmochtsetátšëmbo, cach quem Bëngbe Bëtsabe buayenana soyënga entsanga bacna soyënguentšana játsebacama, chë ndoñe judiëngbioye mochanjábuayenaye, y ndegombre chënga cocayé aíñe mochanjóyeunaye ca.”

<sup>29</sup> (Pablo chca tojánayana ora, chë judiënga chentšana imojésebocana y tša imojtsenatsëtsnaye.)



<sup>30</sup> Pablo uta uata chentše tonjanoquedá canye uántšamena yebnentše; y nyetscanga cha jau-atsətsayama monjánajnənga cha enjanəbuájajana.

<sup>31</sup> Nyetscangbe delante puerta añémoca entšanga enjanabuayiyná Bəngbe Bətsabe aməndayama, y enjanabuatambá soyənga Bəngbe Utabná Jesucristbiana, y ndocna Romoca mandayá quebənjatanauyá chca jtsamama.

**Bëngbe Bëtsa Cabëngaftaca Entsoyebuambna  
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files  
dated 29 Jan 2022  
19104c0e-9046-5ff3-82fb-eb838c88dcf9